



M

R. Ind., To. I, p. 407, n. 13



~~XXXI~~ 16. II. XIV. 4. 33.

EPISTOLAE

CLARORVM VIRORVM,
SELECTAE DE QVAMPLVRIMIS
optimæ,

AD INDICANDAM NOSTRORVM
temporum eloquentiam.



AL

DVS



VENETIIS, M. D. LVI.
Apud Paulum Manutium, Aldi filium,
cum priuilegio.



EPISTOLAE
CLARORVM VIRORVM,
selectæ de quamplurimis optimæ.

Lazarus Bonamicus Mario Sauorniano, et Bene-
dicto Rhamberto S. P.



HERI à nobis mihi reddita epistola fuit; in
qua tam multa me delectarunt, ut, quid maxime,
non facile iudicarem. nam amor ille uester, ut in-
genius in omnes bonos, sic in nos pene singularis,
etsi testimonio, aut confirmatione nulla egebat;
eius tamen commemoratio me dulci quodam modo
afficiebat. Diligentia uero, quæ, in tanta magnitu-
dine, ac uarietate rerum aulicarum, quibus sæpe,
tanquam Circeo poculo, immutari hominum mores
solent, non solum passa non est me uobis memoria
excidere, sed ultro etiam effecit, ut de Turcarum
equitatu, de Lutherana re, quo loco esset, quæ spes,
nos doceretis, an non iucundissima esse debuit? me
quidem incredibili lætitia extulit: qui quanti hoc
æstimem, sum mihi ipse conscius. De Iulio, de Lo-
go, de Rosino gratissimum fuit audire: quos omnes
eo iudicio amo, ut in eorum ingenijs, ac uirtutibus

EPISTOLAE

Germaniæ ornamenta collocare soleam. Theu-
 poli quidem grauitas, auctoritas, in omni genere
 literarum præstantia, si tantum mihi ab eo tribui-
 tur, quâtum scribitis, in cælo me constituit. ut præ
 hoc uel opes Cæsaris possim contemnere. probata
 enim uirtus, à magnis præsertim uiris, omnibus
 fortunis est anteponenda. huius uiri cohortatione,
 ut uos scitis, cæperam ante de Patauiis cogitare:
 nunc autem, rogante Episcopo, precante Veneta in-
 uentute, omnibus scholasticis, ac amicis nitenti-
 bus, victus tandem, contra commoda, contra di-
 gnitatem meam, quod uos facile iudicabitis, si
 quando rem totam cognoscetis, ab urbe Roma, quò
 honestissime à plurimis, ijsq; maximis uiris uoca-
 bar, ad Patauinam conditionem accipiendam ani-
 mum reieci: idq; feci eo potissimum consilio, ut,
 si quid sim consecutus, quo possim prodesse quam-
 plurimis, id totum ad communem utilitatem con-
 ferrem. hoc si quid erit, in eo, mihi credite, libera-
 litas nostra extabit: & ut aliquid sit, omni studio
 contendam: itaq; uiuam, ut bonorum causa ipsi
 me boni uigilare intelligant. plura non scribam
 hoc tempore. nam cum secus, atque mihi proposue-
 ram, euenerit; multa agitem, necesse est, & proui-
 deam:

deam : quorum cogitatione districtus teneor . his cum liber ero , & numero , & longitudine literarum explebo , ut arbitror , desiderium uestrum . nūc hæc satis , si uos rogauero , ut Iulium , uestro amore dignissimum adolescentem , omni charitate complectamini , & , quod commodo uestro fiat , nostris uerbis admoneatis , Polybii libellum de rep. Romana iccirco ad eum non esse missum , quia exemplar , cum quo conferrem , non est inuentum . cum primū nactus ero , in desiderio huius diutius nō erit . Theopolo , ornatiss. uiro , me etiam atque etiam cōmendate , nosq; diligite . Iulio , Iogo , Rosino à nobis salutem plurimam dicite . Valete .

Venetijs .

Lazarus Bonamicus Mario Sauorniano , & Benedicto Rhamberto S.D.

QVID causæ sit , non intelligo , cur per binas literas apud Episcopum Bononiensem accusare me uideamini negligentiae . quid enim à uobis accepi literarum , quibus non responderim ? aut quis ad scribendum promptior , quā ego sum ? quòd si tam recte scriberē , quā facile scribere possum : in cæ-

lo me planè esse sentirem. si uero essem ubi uos, quibus in locis ea nascuntur; quæ cuius suppeditent materiam ad scribendum: frequentia literarum uobis fortasse molestus fuisset. in quo aut uestro me iudicio condemnastis; qui, quæ à Cæsare, multorum seculorum principe, aguntur, quæq; ad summam rei Christianæ pertinent, nos minime curare scire putauistis: aut, cuius nos negligentiae accusare iniuria uidemini, eodem uos crimine insimulari potestis. quod quidem non facimus, occupationes uestras cogitantes, præsertim cum speremus eadem ex uobis audire: iam enim & de successore, & de reditu uestro optato, atque expectato multa cognouimus: qui tamen maturus tam non erit, ut mihi longior non fuisse uideatur. uelim autem ita redeatis, ut non minus ad uos peregrinationis uestre rationem, quam ad Nicolaum Theupolum, sapientiss. uirum, nobilissimæ, ac gloriosissimæ legationis renunciationem, pertinere existimetis. nos certe si minus simili, at quo poterimus industriæ nostræ munere remunerabimur. Valete, & nos optimo uiro, & homini doctissimo Theupolo etiam atque etiam commendate. Patavij, XVI. cal. Oct.

Lazarus Bonamicus Petro, Hofio, Polonis
omnibus S. D.

MI Petre, mi Hofi, mei optimi & nobilissimi
adolescentes, qui uestra sponte honori meo tam ar-
denter, tam constanter, tanta animi magnitudine
consuluitis: utinam consilium, diligentiam, assi-
duitatem meam uidere, mentem uero, & sollicitu-
dinem perspicere potuissetis; quibus omni conatu
enixus sum, ut; uestræ uoluntati obsecutus, ali-
quam partem uestrorum erga me meritorum asse-
querer. hæc enim si uidissetis, & rebus tractandis
interfuissetis; mecū potius ipsi doluissetis, quàm ali-
quod officium amantissimi hominis, uestriq; cupi-
dissimi à me prætermisum quereremini. Quæ ex re
intelligi potuit, quid esset τῶν ἀδυνάτων ἐργῶν: o-
mnia tentauī, omnes quasi neruos consilij, indu-
striæq; intendi, ut ad uos per eos, qui constituendæ
Patauinae Academiæ procurationem habent, ueni-
re, aut accurrere potius liceret. ardebam incredi-
bili cupiditate, primum singulos amplectendi, qui
tantum beneuolentiæ erga me præ se tulerūt, dein
de omnibus declarandi, quidquid à uobis in me col-
latum esset, in gratissimum hominem, omniaq; uo

bis officia debere confitentem, collatum esse. sed
 obstitit id, de quo scribere non possum quid sen-
 tiam: animo uero inclusus dolor, & tacita indi-
 gnatio mœrore nos pene conficiunt. obsecro autem
 uos, atque obtestor, adolescentes, per uestram nobi-
 litatem, per studia literarum, quæ sanctissime co-
 litis, ut me potius uestra bonitate subleuatum con-
 firmetis, quàm aliquo minus æquo iudicio damna-
 tum affligatis. una enim reliqua hæc consolatio;
 si uos persuasissimum habere ex uobis cognouero,
 me nihil maluisse, quàm uoluntatem meam ad ue-
 stram aggregare, & cura, opera, diligentia deside-
 rio uestro, aut potius nostro non defuisse; si quid ob-
 tineri non potuit, id potius aliorum iniuriæ, quàm
 mihi, esse tribuendum. hoc si ad conscientiam egre-
 giæ meæ erga uos uoluntatis accesserit; non medio-
 cri me dolore allenatum putabo: sin minus; est, cur
 semper ingemiscam. nullo autem modo fieri pote-
 rit, ut non de referenda uobis gratia, dum uiuam,
 semper cogitem, & bonam partem operæ meæ ad
 uestra studia referam. valete, & nos, ut soleba-
 tis, diligite. hoc gratius contingere nihil potest.
 Venetijs, M. D. XXXV. eo ipso die, quo de aduen-
 tu ad uos meo desperabamus.

LAZARUS,

Lazarus Bonamicus Iacobo Sadoletto S. D.

O EXPECTATAS literas tuas, hoc uero tempore expectatissimas. iam enim desiderio pene conficiebar aliquid de te audiendi: nec satis mirari poteram, quam ob causam nihil tandiu literarum daretur ad me; qui tam crebro ad te scripsissem: ut uel tibi, uel fortunæ, uel improbitati eorum, quibus literæ committerentur, interdum subirascerer. fortunam quidem proxime accusavi. nam Auilas, Bembi, ut scis, familiaris, cum ad te cum meis literis proficisceretur, ratione itineris commutata, quod alter ex equis ferendo itineri non esset, Genuæ conscendit, ut in Hispaniam ad suos transmitteret. de literis non curasse arbitror, ut ad te perferantur. nisi forte eius nos fides cum diligentia fefellerit. quæ in mandatis habebat, nihil opus esse uideo. hoc enim ipso die, quo mihi literæ abs te redditæ fuerunt, certam rationem cognoui, qua percommode & tuæ ad me & meæ inuicem ad te literæ perueniant. quo mihi quidem nihil esse potuit optatius. Auinione Ernius est Remiliasius, uir sane nobilis, & clarus. Ioannem filium habet; qui Patauî in studijs bonarum artium ita uersatur, ut
iam

iam excellat; et eam ipsam ob causam mihi est coniunctissimus. peropportuna utrique occasio. tu patri, ego filio literas dabimus. illis pro fide, & officio maximæ curæ erit, ut, quod fieri poterit, quæ celerrime perferantur. in quibus si fides erit, quam mihi dederunt; multo, mihi crede, crebriores a me epistolas accipies. Vale. Patavij XII. Cal. Iun. M. D. XXXij.

Lazarus Bonamicus Paulo Manutio S. D.

A M A B A M te antea tantummodo, quod esses eius patris filius, cui græcæ, latinæq; literæ plurimum deberent; cuiq; priuatis ipse in me adolescentulum officijs obligatus ita esse uellem, ut amor meus ad eius etiam posteros pertineret. nunc uero, lectis tuis literis, ex quibus cognoui paternam gloriam te, tanquam amplissimum patrimonium, non solum tueri, & conseruare, uerum etiam augere posse: uix credi potest, quàm ex ea spe, quam & eximiam, & certam de te concepi, creuerit amor meus. nihil enim in hac ætate, qua tu es, amabilius, quàm uirtutis significatio. ad quam te cohortarer pluribus, nisi & natura, ut uideo, & domestica

slica disciplina id iam esses consecutus, ut cohortatione non egeres. gratulabor potius tibi, & manibus parentis tui: quos arbitror plus ex hac una re voluptatis percepturos, quàm omnes ex omnibus triumphis imperatores ceperint. perge igitur adulescens, & literarum laudem, iamiam pene manibus comprehensam, noli dimittere. cætera enim, mihi crede, leuia, & caduca, & interdum nobis molesta: hæc una, nunquam non iucunda, in memoria hominum nomen. semper retinet nostrum, suaq; luce cuncta obruit. quæ tibi sæpe in mentem uenisse non dubito; cum hac ætate hos progressus feceris: sed tamen & incredibilis amor meus in te, memoriaq; parentis tui, & sollicita quædam lubricæ ætatis tuæ cura me adduxere, ut hæc non necessariâ scriberem. De beneuolentia tua erga me, equidem eam amplector; mihiq; eam deberi persuadeo, cum, quanta mea erga te sit, intelligo. De quaternionibus uero quod scribis nomen meum ex Egnatij tabulis inductum, fidem, & diligentiam, multo ante mihi cognitam, & perspectam, declarasti. de quibus doctissimo, ac eloquentissimo uiro, Egnatio meo nomine gratias ages: non quo tanti aestimem, quanti, antequam scriptum legerem, aestimabam:

mabam: sed egregia hominis uoluntas gratissima mihi fuit: quam omnibus rebus soleo antepondere. Vale. Patavij. IIII. cal. Nou. 1532.

-Lazarus Bonamicus Mario Sauorniano S. D.

QVANTVM te amem, semperq; amaue-
rim, ita notum esse arbitror, ut res non egeat argu-
mentis. amoris autem causæ, (ut omittam nobili-
tatem, quæq; tua propria non sunt) quod excellēs
in te ingenium esse cognoram, eiusq; excolendi stu-
dium pene incredibile. in quo etsi multa tibi impe-
dimento fuerunt: id tamen es consecutus, ut in te
maior prudentia sit, quæ ætas patiatur; & ea lege-
ris, quæ ratione confirmata, præsidio tibi ad om-
nes casus esse possunt. cuius autem uita aut fuit un-
quam, aut esse potest, in qua multa non expectata
non acciderint? circumspecte mi Mari, & ex ueterū
monumentis, quā longissime potes, memoria repe-
re, quā nihil, præter animos nostros, non in fortu-
næ potestate. qui si franguntur, aut debilitantur ex
incommodis, quæ undique se nobis effundūt: quid
imbecillius, aut miserius humano genere? contra,
hos si erectos habeamus; si indignum putemus, di-
uinam

uinam rationem fortunæ succumbere : nobis nihil
beatius . si quidem summum hominis bonum alia
quadam ratione continetur , quā fortunæ temerita-
te regatur . quæ quoties nobis aduersatur ; (aduer-
satur autem sæpissime) illud occurrat ; ut peritior
gubernator existimatur , qui ex turbulentissimis
tempestatibus se in portum receperit , quā qui secun-
da nauigatione semper sit usus , sic multo maior , ac
præstantior uir , qui fortiter tulerit , quā qui nun-
quā senserit aduersam fortunam . hic enim in pri-
mis , ut ait uir admirabilis , ἐκλάμπει τὸ καλόν .
liberos amittimus : cogitare debemus , num soli . fra-
tres , parentes , coniuges desideramus : quā multi
his orbatifunt ; regno præterea eiectioni , fortunis om-
nibus spoliati , in ignominia , & calamitate uixe-
runt . exempla plura , quā sint commemoranda . an
tam superbi erimus , ut aliquid priuatim a natura ,
& æquissima parente , nobis optemus ? an tam stulti , ut
impetraturos nos putemus ? an tam ingrati , ut non
propter innumerabilia bona gratias Deo agamus
potius , quā , si quid contra euenerit , ac uellemus ,
queramur ? Multa sunt alia , mi Mari , quibus cor-
roboremur aduersus omnem uim fortunæ , & qui-
bus ipse proxime usus sum , cum de morte Constan-
tini

tini fratris allatum est . etenim , quia te , illumq;
 amabam , uehementer sum commotus . eisdem ute-
 ris & tu . quid enim agas ? nam , dolere propter ca-
 lamitates , ipsas calamitates est augere . qui morbo
 corporis laborant ; medicinam quærunt . animi ue-
 ro medicina ratio est . refer animum , optime adole-
 scens , ad Deum ; & , quæ ab illo acceperis , diligen-
 ter considera ; summam nobilitatem , diuitias , opes ,
 tot fratres , cognationes , affinitates , speciem , &
 ualeitudinem corporis , ingenium , egregiam , ut sem-
 per cognoui , ad optima quæque uoluntatem . fac ut
 tot tantarumq; rerû memineris magis , quàm affli-
 garis , si non omnia , quod fieri non potest , uotis
 tuis responderint . at erat frater . quid ? an non mul-
 ti omnes amiserunt ? tibi tanta , & tam florens co-
 pia superest . quòd si eo doles , quia sapientissime
 rem familiarem gubernabat , teq; omni molestia li-
 berabat : uide , ne tua magis , quàm illius causa dolere
 uidearis . quod in moribus tuis hæere non potest .
 esset enim turpissimum . Dices , genere te mortis tor-
 queri . obsecro te , clarissime adolescens , mihiq; ca-
 rissime , hic te eum præsta , qui mihi semper es co-
 gnitus ; hoc est , ut paulo interius rem spectes , quàm
 uulgo homines solent . non enim genus mortis ul-
 lum

lum lamentabile, quod sine uitio, & culpa nostra est: cum turpitudine uero nullum non dolendum. neminem inuenias, qui fratrem tuum arguat. omnes nefarij sceleris auctorem detestantur. quod igitur genus hoc? in quo inimicorum uestrorum facinus uituperetur, omniumq; odia in eos accendantur; uestrum reprehensorem non reperiat? sed cogitatione paulisper abeas ab his communibus nobis cum alijs: & hoc dies ac noctes mediteris: Christianus sum: ducem optimum, & uerissimum, Deum sequor: quid ille non est passus? quot, & quanta indignissime tulit? ego ne quouis fortunæ fluctu obruar? meliore ne, quàm Deus, conditione esse cupiam? quin huc me potius paro, ut, omnia ferendo, quæ Deo meo placent, & nō nomen solum, sed etiam illius præcepta, & facta imitando, ex breui, & caduca, & molestiarum plenissima, in æternam ac iucundissimam uitam migrem. Hæ cogitationes non mediocriter leuantur dolorem meū, quem ex morte fratris tui capiebā: easdem arbitror leuaturas tuū. et quanquam non ignorabam eā esse præstantiam animi ingenijq; tui, ut plura per te consequeris: scribenda tamen esse hæc pauca ex multis duxi; ut esset amoris erga te mei testimonium

nium non necessarium. Vale, & nos ama: Patavij,
 pridie Non. sext. M. D. XXXIIII.

Lazarus Bonamicus Gaspari Contareno,
 Cardinali, S. D.

C V M optatissimum mihi nuncium Rhamber-
 tus attulisset, in collegium te summorum patrum
 cooptatum fuisse; quo minus sperata fuit hæc digni-
 tas, eo accidit iucundior: nam constituendæ rei chri-
 stianæ non obscuram significationem dabat. quid
 enim factum est post hominum memoriam, uel ad
 commendationem Pontificum illustrius, uel ad reli-
 gionem ex tot incommodis recreandam aptius, ac sa-
 pientius, quàm ex uirtute homines deligere, qui in
 genio, doctrina, usu rerum, uitæ in primis exem-
 plo negotium christianum gerere & possint, & ue-
 lint? nam etsi contra uoluntatem tuam euenisse ar-
 bitror, ut ab reip. tuæ administratione ad nouū ge-
 nus uiuendi abstrahereris: nihil tamen dubito,
 quin libèter sis facturus, ut, cum præclarū existima-
 ris in patriæ tuæ rep. caste, atque integre uersari,
 quod omnes iam intelligunt, multo maius esse tibi
 persuadeas rem Dei publicam curare: cum præser-
 tim

tim omnia in te summa a Deo sint profecta, quæ religioni præsidio non mediocri, atque ornamento uel maximo esse possunt. Quare uehementer tibi gratulor, non propter istam quidem dignitatem, ad quam sæpe dissimiles peruenerunt tui, sed quia sis nactus ubi latius ingenium, & uirtus se diffundat tua, dignitatemq; in qua proxime optimi Pontificis sapientissimo iudicio es collocatus, non tueatur modo, sed etiam augeat, atque amplificet. quod ita mihi exploratum est, ut putem Cardinalatum istum tuum posteritati etiam admirationi futurum. Valde te uidere cupio: ut, si qua maior, quamqua te contemplans absentem afficior, uoluptas esse potest, eam capiam. quod erit, cum per hoc munus publicum mihi licebit. Vale.

Patauij, VIII. cal. Iunij, 1535.

Lazarus Bonamicus Principi Melphitano
iuniori S. D.

CUM mihi literæ tuæ redditæ fuissent, primum admirabar quis esset, qui scriberet: deinde, illis perlectis, dici non potest, quàm magna uoluptate sim affectus. delectabat me parentis tui, cum mul-

B totum

torum sermonibus, tum Sadoleti testimonio summi principis, & probatissimi uiri, commemoratio uoluntatis erga me, itemq; tuæ, quam egregiam esse profiteris: eoq; magis mecum ipse tacitus commonebar, quod intelligebam non fuisse tanti officia mea, quanti à uobis aestimarentur. sed uobis, grati animi abundantia, ea quoque, quæ parua sunt, magna uidentur esse. quæ res, mea quidem sententia, nobilitatem uostram imprimis arguit, & nobilitat. quam ob causam mirifice me & a parente, te filio, & abste, tali parente dignissimo, amari gaudeo: uobisq; affirmo, cum omnibus alijs in rebus a uobis me superari patiar, fide, obseruantia, pietate erga uos uestræ in me beneuolentiæ facile responsum. Te uero, adolescens optime, & ad omnem uirtutis laudem expectatissime, cum cognouerim ex tuis literis quanta & quam certa spes non familiæ tuæ solum, quam amplissimā, & splendidissimam esse non ignoro, sed etiā nostrorum temporum sita sit in te, hoc mihi sumam pro eo studio, quo omnia tibi, & clarissimo patri tuo, uniuersæq; familiæ & læta, & gloriosissima exopto, ut cohorter ad ingenium excolendum. quod ut præcipuum in nobis est, solumq; diuinum: sic omnia, quæ ad ipsum

ipsum pertinent, & maxima; & maximæ laudis existimanda sunt. huius tibi facultatem natura elargita est, parentis autem voluntas ea est, ut nihil malit, quàm te, non fortunæ bonis, in quibus quantum infirmitatis inesset; etsi iniuria, nimium tamen experti estis, sed animi dotibus abundare; quæ nobis adimi non possunt, & tum, tranquillam ut uitam uiuamus, præstant, tum memoriam nostri in omne tempus, omnesq; gentes disseminant. uides quàm nihil esset tota uetustas, nisi lumine literarum illustraretur. uides, neminem prope dixerim paulo nobiliores fuisse, qui se nobilitatem tueri suam posse crederet, nisi uera nobilitas uirtutis accederet. Neque te auferat nostrorum temporum deprauata disciplina; quibus nobilitas literarum splendore obscuriorem se fieri putat. nimis enim stulte, quanta in ignominia uersentur, non intelligunt. propone tibi ante oculos nobilitatem Romanorum, Atheniensium, omnium denique gentium, quæ magnam gloriam sint consecutæ. eam imitare: ad eam te exerce: huc confer cogitationes tuas. habes parentem huius rei causa uigilantem. es in ea ciuitate, in qua græcæ latinæq; literæ hoc tempore prope nasci uideantur. noli tantas opportunitates adulescens

omittere: & tibi persuade, si eo animo fueris, ut
 uirtutem maxime ducas expetendam, cetera om-
 nia fore tibi facilia. Atque hæc scribo amore po-
 tius incitatus meo erga te, patremq; tuum; quo
 necesse est ut uestra omnia mihi carissima sint, quã
 ut uerear ne ab hac opinione dissentias: in qua per
 omnes uitæ tuæ gradus ut maneat, te uehementer
 rogo; oroq; una cum præstantissimo uiro patre tuo,
 me in uestrorum numerum reponatis. Quid uero tu
 tam multa de missione literarum? ego tibi contra
 gratias ago, quòd me dignum putaueris, ad quem
 scriberes, agamq; , quoties ad me aliquid tuarum
 literarum dederis. quod ut sæpius facias, miran-
 dum in modum cupio. erit tibi non inutilis exer-
 citatio, mihi uero etiam iucundissima. nūquã scri-
 bes, quin rescribam; et in eo occupationes nos, mihi
 crede, nihil impediunt. Bembo ostendi tuas literas:
 qui tuam ad summam gloriam indolem complexus,
 tibi primum gratias agit, deinde tibi, patriq; tuo
 se etiam atque etiam commendat. Vale, & nos tui
 studiosissimos dilige. Patavij, III. idus Quint.
 M. D. XXXIII.

Lazarus Bonamicus Iacobo Sadoletto S.D.

I A M plane constitueram leuare me hoc impedimento potius, quàm onere, in quo quadriennium fui, cū tuæ literæ perlatae ad me sunt: quæ summa quidem sententiarum grauitate, uerborumq; copia, admista incredibili quadam suauitate bonitatis, excellentisq; naturæ tuæ, (quid autem dicam, de bene uolentia, quæ nullibi tam efficax, tamq; perspicua, quàm erga nos?) uehementer me ab hac ratione reuocabant. sed erat in his nihil, quo cuperem mutare sententiam: etsi omnia prudentissime, & amicissime scripta non ignorabam, quæ scriberes. Nam quod uidebaris suspicari, me id uelle aut leuandi, aut fugiendi laboris causa: hoc tibi persuade, nihil tam alienum a me: cōtra uero, hoc mihi sempre animo insedisse, homini turpissimum esse labore frāgi, industria ne debilitari, qui ceteris usui ad uirtutem esse, aut ipse magnam consequi præstantissimarum rerū cognitionem posset. qua ex causa, cum feriari nobis publice licet, tum maxime in studijs uersamur, multoq; plus laboris toleramus. cognosce igitur et iudica, quàm falsa fuerit opinio de me. tu putas me Patauinæ conditioni renunciare uelle, labo-

rem ut uitem: ego me cupere id scio, ut plus laboris impendam: Nam quòd proponis communem utilitatem: eam nunquam deferendam existimaui: sed, cum maiora onera in re literaria non nulli ex amicis me sustinere posse sibi persuasissent, id consilij dabant, ut leuiora relinquerem, maiora amplexarer: idq; boni uiri esse docebant: meq; ipsum, mihi diffidentem, impellebant, ut non uiuentium solum, sed etiam posteritatis memoriae consularem. quam rem in hoc publico impedimento, nihil erat, cur quispiam optaret. uideo & tibi, & his, & ipsi philosophiae idem placere, ut utilitati hominũ inuigilem. idq; mihi persuasissimum est: sed imbecillitas ingenij uenit in dubium. in altera utilitatem multo maiorem esse animaduerto. ad utram minus ineptus sim, explicare non queo. in altera plus laboris, & ingenij inest: quod ut perexiguum est in me, eoq; deterreor, ita labore nunquã impediri soleo, & propterea sum alacrior. Hæ mihi erunt de liberandi causæ, cum ad te scribebam: sed non audebam aperte scribere: quòd erat scribendum aliquid de me a me ipso: quod facio perinuitus. quam ob rem multa prætermisi, quæ ab amicis dicuntur, falsa quidem illa, sed dicuntur tamen. utinam hic esset:

ses. ut aut te illi, aut illos tu in tuam sententiam adduceres, si modo alia esset tua, re quæsitâ inter nos, & disputata: de qua iterum uelim audire quid sentias, id est ad utram me hominum utilitatem potius cohorteris. in qua cogitatione, obsecro te, ut nihil dubites, nos esse ad omnem laudem paratissimos. Vale. Patavij, idibus Iulij, M. D. XXXIII.

Lazarus Bonamicus Iacobo Sadoletto Card. S. D.

INCREDIBILEM antea uoluptatem ceperam ex reditu tuo in Italiam, & ipsi Italiae, Romæq; gratulabar; quæ te aliquot iam annos carentes, tui nominis gloria quodam modo carere, eamq; sibi Galli vindicare uidebantur. qua in lætitia dolore tamen non mediocri afficiebar; quod subuerebar, ne iterum nobis eriperere, et trans alpes usque euolare. sed, proxima renunciatione Card. audita, Dñi immortales quanto gaudio exultavi, sublato timore, quo angebar: & cum summi Pontificis iudicium, & uirtutem admirabar; tum sperabam, aut confidebam potius, omnia in re christiana fore lætissima. quid enim post hominum memoriam aut

cogitatum sapientius, aut gloriosius in urbe factum est? non enim ex uoluntate principum, ut saepe, in amplissimum ordinem asciti: at sapientissimi, innocentissimi, clarissimi, & summa auctoritate praediti uiri, euocati, rogati, facti sunt Cardinales. o praeclara comitia, o his difficillimis temporibus necessaria, o Pauli III. sapientiam, & bonitatem singularem. Christiano itaque nomini, & tibi gratulor: mihi gaudeo; & tibi reliqua ex sententia euenire cupio. nam quae sentis, quaeque optas, omnia semper cognoui ad religionem, ueramque pietatem referri solere. quae causa fuit, ut de adepta tibi dignitate tuenda nihil scriberem hoc tempore: quid enim te potest latere in tanto ingenio, tantaque doctrina, usu denique, et tractatione rerum diuinarum? si quid tamen es admonendus; illud te non dubitauerim admonere, ut ueterem consuetudinem tuam conserues, & te ipse imiteris. ita enim, ut omnes ad istam te dignitatem iure, & cum ipsius dignitatis pulcherrimo ornamento peruenisse iudicant: sic multo ampliore dignissimum existimabunt. Vale. Patavij, III. Cal. Ian. M. D. XXXVII.

Lazarus Bonamicus Reginaldo Polo Cardinali S.

VTRVM tibi magis, an religioni christiane gratuler, nescio. utrique certe mirandum in modum gratulor: sed tibi, quod in eum locum ascenderis, unde præclarum lumen uirtutum tuarum ab omnibus clarius conspici, & quamplurimis præluce ad ueræ religionis pietatem, & decus poterit: ipsi uero religioni propterea, quia ex una dignitate homines uideo eligi cœptum esse, non ex copijs, ut antea uideri fortasse poterat; atque diuitijs. nam etsi in Contareno, singulari uiro, idem prius factum erat: eo tamen minus Pontificis animus apparebat, quo plures uarie interpretabantur Pontificis propositum. nunc uero ipsius constantia, omnia ad rem christianam constituendam referendi, ea fundamenta iecit, ut sperent omnes istam dignitatem, in qua te uirtus tua collocauit, multo apud omnes augustiorem, ac uenerabiliorem fore. quod utinam aliquot iam annis factum esset. istius enim ordinis auctoritatem non eam, quæ esse cœperat, sed eam, quæ olim fuit, hoc est amplissimam haberemus. de qua multa scriberem: teq; cohortarer, ut non tam a

Paulo

Paulo III. quàm ab ipso Deo, in summorum patrum collegium cooptatum esse existimares; qui dies ac noctes excubares, & reip. christianæ diligentior, quàm tui ipsius, procurationem susciperes; nisi impetus animi tui diuinos penitus nosses. si quidem es ausus rei christianæ causa similia tuorum. quos ego ita miror, ut in religione nostra nihil æque mirabile multis iam sæculis extitisse putem. a quorum crudelissima, & nefaria cæde tu unus superfuisti; qui religionem possis singulari doctrina, dicendi gravitate, & copia, uita denique & factis defendere, & in priscam dignitatem uindicare. quod ut tibi maximæ curæ sit facere, non es rogandus: nam ὡδὲ σὺ αὐτὸς ille tuus nos non latet. ut uero id facias, etsi prudentia tibi non deest, sed abundas potius; summa tamen mea erga te obseruantia, ac pietas hoc mihi facile concessit, ut te etiam atque etiam obsecrarem, nihil tu quidem in ratione uitæ mutares, (quid enim esse potest sanctius?) sed tamen eam & fideli custodia, & maiore diligentia contra iniquitatem temporum sepires, teq; nobis conseruares. quo enim diuturnior uita tua fuerit, eo in dies magis atque magis & utilem, & nomini christiano saluti, atque ornameto

mento speramus futuram. Priulo, & Rullo plurimam salutem adscribimus. utriusque letitiam incredibilem cernere uideor. ideo utrique pariter, et utrique summe gratulor. Vale. Patavij, III. Cal. Ian. M. D. XXXVII.

Reginaldus Polus Cardinalis Lazaro

Bonamico S. D.

VT debitores facere solent, mi Lazare, quibus non uoluntas, sed facultas deest, unde ex praesentibus fructibus soluant: si in temporis intervallo aliquam spem habeant, dies a creditoribus. auferendo, fidem suam tuentur: idem mihi tecum nunc faciendum iudico, qui cum gratulationem literarum tuarum acceperissem, statim quidem me debitorem respondendi tibi agnoui. sed tamen, ut, si soluere debeam, dies aliquot abs te auferam, sit necesse: nec enim praesentes fructus eiusmodi sunt; ut ex his confidentiam me, quod debeo, posse persolvere: quod si uerbis me tibi satisfacere potuisse existimassem; cum epistolam tuam grauem, & plenam amoris, atque iudicii, atque pietatis acceperissem; nunquam quidem mihi uerba defuissent, quibus facile tibi responderem.

derem. quid enim magis promptum fuisset, quam
ita dicere? eam mihi gratissimam fuisse: & cum
amorem tuum in me uehementer amplecti, tum pie-
tatem in Deum, & ecclesiam eius, quam tuæ lite-
ræ mirabiliter expressere, maxime exosculari. quæ
cum ex animi sententia dixissem; quod ad uerba at-
tinet, etsi nihil aliud adderem, non uideo quid desi-
derare posses. uerum cum, non uerba te, sed res ex-
pectare, tota tua epistola declares; ideo spatium a te
mihi concedi postulo, dum a Domino istius uineæ,
unde omnia, quæ uel ad mea debita persoluenta,
uel ad tuendam uitam præstentur, depromere so-
leo, hoc impetrem, ut mihi de suis fructibus tan-
tum donec, quantum ad liberandam meam apud te
fidem sufficiat. hoc quidem ab eo petere non de-
sino. cum autem totius bonitatis & benignitatis
sit fons, & exemplar, difficile in hac mea postula-
tione futurum nihil timeo: sed ad celeritatem ta-
men, si primo quoque tempore hoc debitum exigas;
nihil quidem magis adiuuabit, quam ut ipse quo-
que apud eundem D. aduocatum te meæ egestati
præbeas. quod si feceris, non modo de meo debito
tibi statim satisfactum iri auderem polliceri; sed,
quia benignitatem eius sum expertus, magnum
quoque

quoque præmium tui patrociniꝝ te reportaturum .
quare non tam mea causa quàm tua peto , ut cau-
sam meam suscipias: hoc uero mea maxime , quod
debitoribus molestissimum esse solet , ut me sæpius
per literas, quando coram non potes, de debito ap-
pelles. in hoc credas mihi uelim , ex tuis in me of-
ficijs nihil te mihi gratius facere posse . Vale. Ro-
mæ, IIII. cal. Feb.

LAZARUS BONAMICUS Iacobo Sadoletto Card. S. D.

VTRVM maior sit celebritas nominis tui ,
an eorum numerus, qui te uidere , atque ab eodem
amari cupiunt, non facile iudicauerim. quod etsi tu
ipse ex ijs literis aliqua ex parte perspicere potui-
sti, quas in hoc genere sæpe ad te scripsi: scito tamẽ
multo plures esse, qui, me, ut se tibi commendarem,
& per me in amicitiam tuam admitterentur, ro-
gantes, id assequi nequiverunt; non mehercule scri-
bendi molestia , (nihil enim facio iucundius) sed
uel quia facere iniuriam humanitati tuæ uideor ;
uel quòd uereor, ne nimia crebritate eiusdem gene-
ris literarum si non odiosam, at subinsulsam inter-
dum tibi satietatem asseram. hanc uero dubitatio-
nem

nem meam, aliâq; nonnulla, quæ scribi non oportet; singularis mea in Benedictum Rhambertum beneuolentia, & eiusdem Benedicti incredibilis non tam cupiditas, quàm quidam cupiditatis ardor tui uidendi, & per me in numerum tuorum adscribendi, uicit, ac sustulit. is cum hac epistola ad te uenit. adolescens est omnibus ijs rebus præditus, quibus ea ætas ornari potuit, scientia bonarum literarum, suauitate morum, uitæ innocentia, atque elegantia, obseruantia in primis, ac pietate erga similes tui; quos ut mortales Deos ueneratur. sed quid ego tibi plura de hoc? qui soles esse cum in alijs, tū in cognoscendis hominibus iudicio peracri, ac perpolitio. inuenē complecteris primum sua, deinde nostra quoque commendatione sic, ut in eo suscipiendo omnes illi tui summæ facilitatis, atque humanitatis lepores appareant. Paulus noster idem ut faciat, uehementer uelim. cui me etiam atque etiam comendabis. Vale. Patauij, XII. Cal. Maias, 1538.

Lazarus Bonamicus Ioanni Turitiano S. D.

LIBERE si licet loqui, amico præsertim, re-
ctius Crucius, & Paccius, quàm tu. illi enim, cum
scirent,

scirent, quibus fundamentis constituta esset mutua inter nos beneuolentia, quæ ad illos scripsisti, ut de tuo in me animo sæpius admonerent, ab egregia quidem ea uoluntate profecta, non tamen nostræ coniunctioni necessaria putauerunt; nosq; de omnibus cælauerunt. Tu uero quasi dubitans qua fide erga te sim, multa scripsisti, quæ ad nouas potius conciliandas, quàm ad constantes, & nulla ratione uiolabiles amicitias pertinebant. ignosco tamen tibi, nam urbis, in qua nunc es, morem non ignoro. cui etsi uideris Patauium antepone, id tamen Romano more uereor ne feceris. cum Romano more dico, scis quos significem Romanos; ne mihi forte Crucijs irascatur. Illud uere, nec Romano more mi loânes tibi uehementer persuadeas uelim; eam esse mihi opinionem de probitate, ingenio, doctrina, suauitate morum tuorum, ut, quæcunque tua causa facere possim, æque mihi incunda futura sint, atque tibi. itaque statim ad Sadoletum scripsi, ut Paccius, adolescens optimus, ex tuis literis me admonuit. illi te dabis: complectetur, mihi crede, more non uulgari; cum & ipse egregius uir, & sua sponte similiū tui cupidissimus, nostriq; amantissimus esse uideatur. cupio tamen scire, quantum ponderis

poderis testimonium de tuis uirtutibus meum apud illum habuerit . si qua in re præterea acciderit tibi opus esse studio, opera, gratia mea, ad illam clausulam reuocabis omnia; ut ne dubites, quin, quæ a me iure proficiſcentur, eo animo proficiſcantur, ut in eo me beneficium accepisse putem. hoc si feceris, gratissimum mihi feceris. Vale . Patauij, 8. cal. Decembris, 1533.

Lazarus Bonamicus instauratoribus Pataui-
ni gymnasij S. P. D.

LAURENTII Falerij prætoris iussu hodie cum essem accersitus, recitata mihi sunt literæ uestræ: deinde grauis, & uehemens illius cohortatio subsecuta est, ut munus interpretandi persequerer. quibus omnibus sic monebar, ut eodem tempore illius uoluntas, & contentio, uestra auctoritas, reip. Venetæ maiestas mihi occurrerent. Accedebat ad hæc naturalis quædam propensio, atque affectio in hæc loca, ubi natus, ubi educatus, ubi magna ex parte institutus essem. quam ob causam Patauinam academiam tanquam portum mihi delegeram, in quo, quod reliquum mihi uitæ est, conquiescerem.

sed,

sed, in hoc meo tamen tanto gaudio erga uos no-
menq; ipsum Venetum, respondi prætore, quæ di-
gnitas mea, quæ æquitas, quæ ratio literarû, quas
profitemur, cogebant respondere. Atque illa initia
breuiter attingi, ut à Laurentio Bragadeno, alijsq;
nonnullis sæpe rogatus hanc desertam, & prope
depositam prouinciã suscepim: ut, biennio con-
fecto, amplissima cum dignitate à Bononiensibus,
XL uirorum cunctis suffragijs, enitentibus om-
nium nationum scholasticis, conductus, Gaspare
Contareno, singulari uiro, & præstantissimo ciue;
ad collegium, senatumq; uestrum referente, ne
dimidio quidem stipendiũ Bononiæ mihi proposi-
ti, Patavi retentus fuerim. De Clemente VII.
adiunxi, Pontifice Max. quem dux amplissimus,
omni uirtute ornatissimus, immortalitate dignissi-
mus, Andreas Gritius mei incredibili desiderio ar-
dere cognouit, cum per Hieronymum Aleandrum
tum legatum egit, ut mihi per uos liceret Romam
ire, & meam, quantulacunque est, sibi operam da-
re. summi me beneficiũ tantus ac tam diuinus
princeps sempiterna memoria obligauit, cum re-
spondit, Venetam remp. suorum hominum, qualis
ego essem, opera uti malle, quàm alijs quibuscun-
que

que concedere. Commemoravi prouentum HS
 XXXVI M. & amplius, hoc est octingentorū Pan-
 nonicorū nummum, mihi delatum, ut essem in comi-
 tatu regis Ferdinādi, et magno animo sine ulla cun-
 ctatione repudiatum. Quibus rebus uidebar decla-
 rasse, quanti temp. uestram, otiumq; literarū fece-
 rim; modo cum dignitate in eo esse possem. sed an-
 possem, iubebam illum etiam atque etiam conside-
 rare. quod idem ut faciatis, uehementer à uobis pe-
 to, clarissimi, atque optimi uiri. Biennio iam pro-
 uinciam, quam iudicio senatus gerebam, ex con-
 suetudine aliorum renunciaram, non arroganter,
 ut multi, sed pro pudore ac modestia mea, proq; ea
 reuerentia, quam uestris magistratibus adhiben-
 dam semper putauī. Adū eos, qui in eodem magi-
 stratu ante uos fuerunt: aperui animum meum:
 rationes omnes uel officij mei, uel illorum æquita-
 tis explicauī: omnia in unum caput conieci, cum di-
 cerem aut esse unde stipendium alijs augetur,
 aut deesse: si deesset; meam me in omni fortuna uo-
 luntatem ad suam accommodaturum, & eodem
 contentum stipendio futurum quoad uiuerem: sin-
 esset; me non uidere, quo modo aut illi iusti esse
 possent, si, in pari industria ac labore, ne dicam
 multo

multo maiore, alijs accessio stipendij atque honoris fieret; aut ego uir bonus, si, cum æque, atque alijs, Patavinæ uestræ academix utilis esse nequirem, alteri non libenter cederem, qui existimationem assequeretur & gratia apud uos florentium, & auctoritate. Ab eo sermone ita discessi, ut singulo quoque anno integrum mihi esset sperare aliquid, nec deteriore conditione esse, quam alijs, qui uobis honestissime seruirent: nam & uobis potestas erat alterum substituendi, si quis forte magis probaretur, & mihi accipiendæ conditionis, si qua uberior, atque honestior oblata esset. quod tamen non feci, ac ne cogitavi quidem, cum possem uel maxime, in quo stultitiæ fui accusatus à nonnullis: ego uero non stultum sed bonum uirum esse arbitror, qui fide, ac pietate suos principes amplectatur, multoq; plus his tribuat, quam ceteris. à quibus tamen si se uideat contemni, aliosq; quosuis sibi anteferri; eiusdem ignoscerem iustissimo dolori, si, cum ab illis desereretur, se ipse non desereret, & in omni uita uirtutem sequeretur, & decus. Hic uelim uos, qui ex omni senatu academix constituendæ causâ delecti estis, selectissimi uiri, iudicare cuiusmodi fuerit ius postulationis meæ, quale testimonium

stimonium egregiae meae in remp. Venetam uolun-
 tatis. Omitto, feriantibus alijs, interpretationes
 saepe meas. non iacto duarum, & amplius hora-
 rum quotidianum prope laborem meum, qui a me
 una suscipitur, praeterea nemine. alia non prae-
 dico, quae possem. quid autem per uos a senatu decre-
 tum sit, discrucior, cum recorder. Alijs stipendij
 honor habitus: non reprehendo: commeriti sunt.
 mihi non est habitus: feramus & hoc a quo animo:
 esse enim audio, qui mirentur, aut querantur po-
 tius, tantum huic generi literarum tributum esse:
 qui iudicio fortasse, non uoluntate, falluntur. de
 me nihil dico: neque enim est, quod dicam: et, si
 esset, non dicerem. satis mihi sit quodcunque opi-
 nionis est de me, diuturnis uigilijs multoq; sudore
 collectum. de ipso genere studiorum loquor: de
 quibus me nonnunquam cogitantem subit tacita
 quaedam temporum miseratio. Queruntur ne tan-
 tum tribui eloquentiae studijs? per quam populi
 Romani, atque omnium gentium nomen extat, at-
 que illustratum est: qua omnis magna, atque am-
 pla res p. recte, & ordine administrata est, Rho-
 diorum, Atheniensium, Romanorum. huius lumi-
 ne, ac splendore cunctae artes, & disciplinae &
 lucent

Lucent ipsæ per se, & ad communis uitæ usum
 transferuntur. per hanc leges latæ, abrogatæ aliæ,
 aliæ antiquatæ sunt. bella è rep. suscepta, pax fa-
 cta, fœdera icta, optima quæque constituta. quod
 si hoc, superioriꝝq; tempore suus honor ei tributus
 non est: fuerit uel iniquitas hæc uel cæcitas tempo-
 rum: apud ueteres certe, in illa ingeniorum, eru-
 ditionisq; felicitate, tribuebatur; & hoc studium
 ceteris studijs anteponebatur. At nemo ante te. eo-
 dem pretio conductus fuit. Quid? nihil noui insti-
 tuendum? nihil corrigendum, etiam ueteri consue-
 tudine usurpatum? semper temporum ratio consi-
 lia prudentum gubernauit. Hispanus philosophus
 quāto præmio accitus est Patauium à uobis? multo
 maiore quidem, quàm alij ante se: si nemo ante me
 tantum præmij est consecutus: nemini ante me. du-
 plex interpretandi onus impositum est. Bononiæ
 unius lectionis professori tantūdem ferè merce-
 dis persoluitur. Florentiæ, in tanta tenuitate, at-
 que oppressione ciuitatis, quantum decretum sit
 hoc anno his studijs, non ignoramus. Venetijs ue-
 ro, in tanta dignitate, atque amplitudine imperij,
 quis erit qui se ab illis laude uinci patiatur? sed sit,
 ut quisque uelit, & iudicat de hoc genere studio-

rum. in petitione honoris omnes mihi praeferrî,
æquo, ut dixi, patiamur animo: tempus certe,
quod liberum hætenus mihi fuit, relinquatur.
quod cum ex illo senatus consulto, quod, uobis re-
ferentibus, proxime factum est, concessum non sit:
quid aliud fuit, quàm hoc toto triennio rationem
sperandi aliquid à uobis mihi adimere, & omnes
quasi nervos industriae cum dedecore, atque igno-
minia præcidere? Vos non accuso: fortunam meam
incuso, negligentiam condemno. sed tamen sine
uoluntate mea nec fieri debuit illud, nec potuit.
itaque illud decretum senatus tanquam ratum non
agnosco: rescindo, antiquatum uolo: in quo non
solum uoluntas mea non adfuit, sed etiam repugna-
uit. uestræ tamen, ornatissimi uiri, senatusq; au-
thoritati, & imperij Veneti maiestati hoc dabo,
ut sponte, non aliquo decreto, conditioneue alia
uestra obligatus, sed omni uinculo solutus, hono-
ris tantum atque amplitudinis reip: uestræ causa,
quo possum studio & labore, academiae uestræ suc-
curram, uestramq; uoluntatem non solum meam, sed
honori etiam meo anteponam. Vestrum erit, pro
prudencia, & bonitate uestra statuere, quo modo
decreto senatus non tenear; deq; eo aliquid ad me
scribere:

scribere: quo & meam hanc uoluntatem uobis gratam esse intelligam; & sperare posthac possim magnæ uobis curæ fore honorem meum: quem uobis magnopere commendo, & trado. Patavij, VII. idus Nouembris, M. D. XXXVIII.

Lazarus Bonamicus Rinutio Farnesio,
Priori Veneto, S. D.

ob EX sermone Ioannis Cornelij, & ex literis multorum tardio rem reditum tuum fore cognoui, quàm putaram. quam ob causam mihi ad te scribendum esse existimaui, non tam ut te admonerem, (monitores enim habes domi Alexandrum Mantiolum, & Galeatium, prudentissimos, & tui amantissimos uiros) quàm ut declararem me ualde sollicitum esse de tua gloria; quæ tibi ex tanto ingenio, tantâq; memoria proposita est: quam, obsecro te, mi Ranuti, ne patiari tibi eripi alicuius rei incuria. Magnum est, natum esse in tam nobili familia: maius, habere auum Pontificem, in omni genere Pontificij muneris excellentem: longe uero maximû, ingenij uirtutisq; laudibus florere: quas tu unus facillime omnium consequeris, si eorum pa-

rueris consilio, qui aetatem tuam docere & pos-
sunt, & uolunt: quibus te haecenus paruisse, nun-
quam, ut arbitror, te paenitebit. nos quidem, qui
te ut filium amamus, carumq; habemus; quiq; cu-
pimus splendore literarum per te nostra tempora il-
lustrari; breue est, quod tibi hoc tempore suademus:
ut habeas in memoria, atque in pectore illud Theo-
phrasti, πλὴν τῆς ἀνάλωμα ὅτιν ὁ χρόνος. ue-
lim igitur, et, si id pateris, rogo, ut bonam partem
huius temporis, quo absueris, audiendo, scribendo
cōsumas. nos autem cum te alio modo iuuare nunc
non possimus, scribendo certe, tuis studijs non de-
erimus; ut hoc genere exercitationis non medio-
criter proficias: neque enim dubito, quin rescri-
bas ad me: quod mihi erit gratissimum. Vale, &
Pontifici Maximo, si quando id commode fieri po-
terit, me etiam atque etiam commenda. Patavi,
VI. idus Aprilis, M. D. XLIII.

Reginaldus Polus Iacobo Sadoletto. S. D.

LEGITuas ad Lazarum nostrum scriptas li-
eras, nonis Iunijs abs te datas: quae me magna uo-
luptate affecerunt; cum quod ea, quae uolebam; de
ualetudine

ualetudine imprimis tua, de dulcissimo illo, quo tu frueris, & maxime delectaris, otio nunciabant; tum uero, quod ex iisdem tuum in me amorem, quem ad summum peruenire cupio, in dies augeri clarissime perspexi: idq; mihi eo iucundius fuit hoc tempore ex tuis literis intelligere, quod propter prætermissum iam diu scribendi officium, cum præsertim suauissimis & humanissimis tuis literis essem inuitatus, satis quidem habebam, si animum tuum nulla ex parte offendissem: ut uero noua tui amoris incrementa audirem, id uero nunquam expectare sum ausus. etenim, ut uere dicam, simul ac ad eam partem epistolæ tuæ legendo peruenissem, in qua nominis mei mentionem facis; statim animum meum perculit recordatio negligentiae in scribendo meæ; cuius ualde suppudebat, neque, quicquam quod de me scriberes, nisi ut mecum de hac scribendi tarditate expostulares, expectabam. tu uero, tantum abest, ut ulla in re me accuses, ut ultro me testimonio tuorum scriptorum, & nouo genere laudis ornes. quod quid aliud esse potest, quàm abundantia quædam tui erga me amoris? quæ facit, ut uel non uideas, quæ minus officiose erga te facta sunt; (sic enim amantes in erratis amicorum obcæcari



obscari solent) uel, si uideas, ita humanitate tua
quadam obruis, ut nusquam extare uelis: sed quo
maior est hac tua in me humanitas, uel potius in-
dulgentia: eo magis mihi cauendum esse uideo, ne
quid temere, uel negligenter faciam, quod non ex
omni parte tibi gratum futurum sit. si uero ita ne-
gligēs hoc tempore in hoc scribendi officio uideor,
ut etiam tui oblitus existimari possim; qui nec mea
sponte feci, quod maxime ad officium erga te perti-
nebat meum; nec exemplo tuorum, qui ad te saepe
scribunt, quos hic familiares habes, admoneri po-
tuerim, ut tuis aliquando literis responderem: hoc
tibi primum persuadeas uelim, quod sane uerissime
potes, me tui obliuisci non posse; quippe qui mihi
in uisceribus, etiam antea quam de facie notus es-
ses, hærebas, propter summam, quam de tua uir-
tute, & doctrina ex dignissimorum hominum te-
stimonio conceperam, opinionem. ut uero tui pro-
pius cognoscendi facultas data est, atque ad inte-
riora illa tua animi ornamenta penetrandi, quæ par-
tim in congressu, partim ex scriptis tuis, qualia es-
sent, facile perspexi: tanta me tui admiratio cepit,
ut non modo te amandum mihi, atque obseruan-
dum, sed in omnibus & studiis, & actionibus meis,
quasi

quasi exemplar aliquod præclarum, mihi imitan-
dum proposuerim. quod equidem libenter facio,
& si minus quam cupio proficio; (nec enim me fu-
git, quam longe ab exemplari absim) tamen, me
non aliter sentire, sed eo maxime conari, norunt o-
mnes, qui me, & consuetudinem meam norunt, ac
meos de te sermones, quos frequentes cum amicis
communibus habeo, audierunt. Quæ cum ita sint:
non, quod tui sim oblitus, quæ sic in oculis gero,
quem in ore, & amore semper habeo, in hoc officio
erga te deliqui: sed, si ueram causam exprimere de-
beam, quod eius facultatis sum oblitus, per quam
tibi, & meo officio satisfaciendum esset, eo factum
est, ut nullas a me literas acciperes, cum reliqui,
qui in hoc genere ualent, ad te sæpe scriberent.
defecit enim me iã pridem, sadolete, hæc facultas
scribendi, tanquam aquula quædam, quæ tenui al-
ueo fluens, si cura, & diligentia adhibeatur, cur-
sum tenet suum; neglecta uero, euanescit. sic mea
scribendi ratio, quam diu curæ mihi fuit, etsi te-
nuerit semper, nec satis pure fluebat, tamen secum
quoquo modo animi mei sensa ferebat: quæ nunc,
omissa pristina diligentia, ita exaruit, ut, cum ani-
mi cogitationes ad amicos deferre conor, sæpe me
hære

hære sentiam, plerūque uero tanquam in sicco destitui, ut ultra progredi non possim. quod quidem me pudet scribere. sed quid facerem? nosti genus studiorum meorum, quibus me ijs proximis annis addixi, quàm imperiosa ipsa sint, quàm non facile societatem aliorum studiorum admittant. quibus cum parere necesse habeam; ad illas elegantiores literas uix sane oculos conuertere audebam. sed tamen in Italiâ, ubi has primum noui, sperabam me; etsi non plenam uacationem, (nunquam enim hoc postulassem) at certe tantum temporis, a seuerioribus dominis impetraturum, ut cum ueteribus illis amicis, quasi adolescentiæ meæ socijs, & sodalibus iucundissimis, quos longo intervallo non inuiseram, familiaritatem renouare possem. atque hac spe fretus, Lazarum nostrum, quem magistrum, & quasi tutorem harum ingenuarum, & dulcissimarum artium cognoueram, in contubernium uocaui; ut, eo duce, & adiutore, facilius, quod uolebam, consequi possem. tandem uero, quod impetraui spatij, tantum fuit, quantum solent duriores magistri ad lusum, iocumq; pueris suis concedere. sic enim mihi, ad iuuenilia studia libenter reuertenti, subsicinas aliquas horas dabant. quibus tamen

contentus esse potuissem, nisi has ipsas sæpe inter-
rumpere. tandem uero ita penitus præciderunt,
ut hæc punctum quidem temporis ad has artes reco-
lendas relinquerent. quare, si ab illis relictus sum,
quos ipse prior deserui; si ipsæ fructum mihi dene-
garent suum; qui operam ipsis prior denegavi meam:
mirari certe non debes. cum Lazaro uero nostro sic
iam uiuo; ut, præter suauitatem consuetudinis, in
nulla re eius opera utar. sed mirum in modum eius
me consuetudo delectat: a qua plane non nisi inui-
tus discedo. cui tamen si persuadere possem, ut se
aliquando ad studia nostra transferret: nihil æque
absentis desiderium leniret. quanquam autem tum
maxime iucundum esset, unâ cum eo in iisdem li-
teris uersari: tamen nunquam non una esse me exi-
stimarem, si eadem utrūque nostrum studia teneret.
atque hoc cum eo agere cum sæpe essem conatus,
nunquam tamen aperte eum aggredi sum ausus. so-
lus enim non ualeo, res enim haud parua est: in
qua persuadenda, amicis adiutoribus, et auxilia-
toribus opus habeo. atque utinam, Sadolete, te mihi
socium, dum hoc efficerem, adiungeres. tu certe
unus instar multorum esses: immo tu solus, si huc
incumbères, totum negotium, per te conficeres.

scio

scio enim quantum iudicio tuo, quantum literis, quantum amori tribuat Lazarus noster. ut uel solæ auctoritas tua, quò uelles, eum adduceret. Quid ergo? si hæc sic se habeant; cur optantis potius, quàm rogantis personam sumo? cur non aperte in re honestissima, & mihi gratissima, in qua maxime ab te adiuuari possum, opem tuam imploro? Quia deterreor plane ea particula tuarum literarum, in qua præsentem Lazari statum, & conditionem illi probare niteris. hortaris enim ut in sua statione maneat; ut, cum eam provinciam insituerit, iuuenum animos in politioribus literis susceperit, eam ne relinquat, nusquam ab ea discedat: quam affirmas maximam illi gloriam, & Italicæ iuuentutis utilitatem summam allaturam. hæc enim ut a te prudenter, & amice scripta sunt; sic mihi, ne quid contra istam sententiam rogem, omnem prope occasionem præripiunt. nec tamen me contineo, quin hoc abs te petam, ut, quoniam ad communem amicū hæc pertinent, liceat mihi tecum pauca quædam quasi conferendi gratia scribere. quod dū facio, de facilitate tua nihil sane dubitabo. Principio igitur non te fugit; etsi Lazarus magnam laudem ex hac eleganti, quam nunc proficitur, do-
Strina

Strina sit consecutus; quam in dies cum maiori eorum fructu, qui eum audituri sunt, augere potest; tamen, non in hac sola eius industriam esse uersatam, sed multo maiora amplexam, ex quibus non minus, quam ex ijs, eius laus enitescere potest; fructus uero longe ampliores reportarent ij, qui fructum ex eius doctrina peterent. quis autem te melius nouit, cui, propter familiaritatem uestram, eius uitæ cursus notissimus esse debet, quantum studij, temporisq; in philosophia posuerit? quid uero iam habent oratorum, uel poetarum literæ uel dignitatis, uel utilitatis, si cum philosophorum libris comparantur? quæ, ut tu optime omnium nosti, si quid in se contineant, quod hominem studiosum uel ornare, uel iuuare potest, ex horum fontibus hauserunt. atque ex horum est doctrina non minus, quam ex ea, quam profitetur, quod Lazarum praeceptorem tam gratum, acceptumq; suis auditoribus reddit. sed quid eum Pomponatius, uir in philosophorum libris celeberrimus, tot annos exercuit? quid tot exhausti labores in ueterum philosophorum libris euoluendis; si tandem philosophiam in rhetoris, uel potius grammatici officina sit conclusurus, si nihil amplius ab ea expectetur, quam ut grammati-

ci scholæ, & puerili doctrinæ seruiat? Ama me, hoc non libenter uideo: et, ut nihil iam de amico loquar; hanc tantam philosophiæ illatam iniuriam reticere non possum; præsertim apud te philosophiæ ipsius patronum; neque certe iam dubitare, auxilium tuum implorare; ut una opera amici dignitati, & philosophiæ honori consulas. quod profecto facies, si a rethorum scholis abductum in philosophiæ eum gremio, unde aufugit, reponas. sed quorsum hæc iam ad ea studia, quæ paulo ante mihi tua ope communia cum amico nostro tantopere me cupere ostendo? an tam cito uoti mei, & desiderij sum oblitus? minime quidem; sed, cum illud difficilius esset, quod facillimum est tibi propono. quod si perfeceris, neque uoto meo prorsus frustrabor, & meo desiderio maxime satisfiet. etsi enim illud omnino incundius esset, in ijsdem studijs, quasi in ijsdem ædibus, cum eo uersari: tamen, quando hoc consequendi spes est tenuior, si uel ad uicina studia eum migrasse intelligam, delectatione carere non potest, præsertim etiam cum, hac migratione, eius & dignitati, & utilitati maxime consulitur. cui enim dubium esse potest, si uel ad eam partem philosophiæ se conuerteret, in qua præcepta uitæ traduntur

traduntur, & animi excolendi ratio ostenditur, quanto maiori cum fructu, et dignitate hic commoraretur, quam si apud oratores, & poetas manens, orationis formandæ præcepta ex M. Tullio, vel agricolendi ex Virgilio repeteret in quibus totus nunc uersatur. et tamen si ad illam maxime germanam, & uere ingenuam philosophiam se conferret, ut eius etiam præceptis obediat, diutius sane a nostris studijs abesse non poterit: nec enim ab illa retinebitur: quæ se inopem, & minime dignam, quæ animum ueritatis, & uirtutis cupidum, perpetuum hospitem, & contubernalem habeat, ingenue fatebitur. ut enim Plato, quem quasi parentem huius philosophiæ dicere possumus, cum esset interrogatus, quatenus suis præceptis insistendum esset, quæ diu autem eius doctrinæ obtemperandum; respondit; eatenus dum sacratior aliquis in terris apparuerit, qui uiam ueritatis patefaceret; cui tandem deo esset credendum: sic, cum facer ille iam pridem se ostenderit, qui stabilem, & nunquam intermouituram doctrinam reliquerit, qui se Deum declarauerit; quid putandum de eius philosophia? an non parentis sui uoci obtemperatura est? ut alumnos suos ad hunc amandet: ut se, & sua omnia illius



fidei, & tutela committat? sponte autem se suo im-
 perio abdicet? Equidem non dubito, iam pridem
 amicum nostrum has uoces audiuisse; sed, ut mode-
 stum discipulum, omnia magistrae suae tribuentem,
 non satis aduertisse, quae de sua inopia, & tenuita-
 te ipsa diceret: quam nunc interpretis eius uolunta-
 tis, si doctoris personam apud eam obtineat, melius
 animaduerneret, clariusq; perspiceret. quid enim,
 ut ueritate quærentes uere loquuntur, philosophia
 habet, in quo animo ueritatis studio satisfacere
 possit? quid illa primum nouit, nisi quod a sensibus
 fallacissimis magistris acceperit? qui ut nihil fal-
 lant; quantulum est, quod conferre possunt ad ueri-
 tatem ipsam perspiciendam; uel quantum potius ad
 obscurandam ueritatem proficiunt? quid enim ma-
 gis rationis lumini officit? quod ratione ipsa teste
 dico: quae cum se maxime ueritatis inuestigationi
 dat; tum maxime dat operam, ut se quamlongissi-
 me a sensibus, tanquam maximis impedimentis,
 abstrahat. sed quantulum est, quod sine ijs progredi
 potest? quam cito fatigatur ratio? quam cito ip-
 sa ad sensus redit? si redire eam dicere debeam eò,
 unde nunquam discesserit. ut enim paululum quasi
 temporis momento emineat; paululum etiam se su-
 pra



praesensus, quasi supra fluctus, quibus maior pars hominum immergitur, caput exerat: nunquam tamen eos penitus relinquere, neque ita se ab ijs liberare potest, ut in ueritate contemplanda non semper aliqua a sensibus emissa species, sese ueritatis lumini, tanquam nebula e terra orta, aliquando se solis lumini interponat. ubi est ergo illa sincera, & pura ueritatis facies, in qua contemplanda ueritatis studiosus acquiescere potest? cuius clarus aspectus, non aliquando, ut solis, sed perpetuo, sensibus caliginem, & tenebras offundentibus nobis, aufertur. an hanc nobis philosophia ostendere pollicebitur? & tantam suam ignorantiam cum suorum alumnorum perniciem dissimulabit? an potius, ut ipsa ingenua est, ingenue fatebitur, se in ueritatis studio, homini eius contemplationis cupido minime satisfacere posse? at fatebitur plane, & iam pridem fassa est. neque enim unquam ulla uox notior, aut uerior est a philosophia emissa, quam illa: animum humanum nulla arte humana, nullo studio humano ad ueritatis perfectam cognitionem perducere posse: se uero, si aliquid conducatur, si quicquam adiuvanti in ueritate indaganda praebat, eo maxi-

me iuuare, si nobis persuadeat nos nihil scire posse: hoc enim solum de ueritate compertum habere: cætera etsi probabilia uideantur, & prope ad ueritatem accedere; nihil tamen certi habere, neque aliud se dicere posse. Hanc ergo tam præclaram, et ingenuam philosophiæ confessionem de ueritate, & quid ipsa præstare possit, cum habeamus; & cum iam cœlitus nobis ueritas se ostenderit; cum Deus ipse, ignorantia suæ sobolis, & erroris in ueritate inuestiganda misertus, fontem ipsum ueritatis nobis aperuerit, a quo sacræ illæ artes fluxerunt, in quibus nihil non sincerum, omnia pura, & ueritatis plena sunt: quò potius nunc philosophia alumnos suos, si suæ ingenuitati constare uelit, quã ad has sacras arteis mittet? qui in ueritatis studio satisfieri cupiant, non ut ab illis scientiam ueritatis hauriant, (neque enim animus humanus, sensuum caligine circumfusus, eam aspicere ualet) sed ut fidem ijs, quæ de ueritate dicuntur, accipiat, omni humana scientia, propter auctoris nobilitatem, qui nec fallere, nec falli potest, superiorem, & certio-
 tiorem. Quare, ut eò iam reuertar, nec causam meã supra neglexi, cum amici nostri studium ad philosophiam per te conuerti suadebam, quanquam ni-
 hil

hil prorsus philosophiæ causa scripsi: hoc enim per
 suasum habeo; qui ingenue philosophari uelit, ea;
 quæ humano ingenio inuenta est, philosophia diu-
 tius contentum esse non posse: quæ nec se ipsa con-
 tenta est, sed hanc cœlestem respicit, ab hac opem
 flagitat, sine qua nunquam consistere potest, ut nec
 ulla humana sine diuinis, & ad hanc alumnos suos
 amandat. Quare, si uel huc paululum sese dederit;
 eum paulo post ultro illam cœlestem philosophiam
 requirentem iam uidere uideor, a qua cum edoctus,
 & instructus erit, si postea ad philosophiam descen-
 dere, & ἀσπάζεσθαι illam suam ornare placuerit,
 quoniam sic genus uitæ instituit, ut, humana do-
 cendo, hominibus proffit, neque hoc illi interdictum
 erit; quin tum maxime illi liberum, & tutum erit,
 per omne genus artium ire, posteaq; sacras illas an-
 teis, quæ ideo a fonte ueritatis sunt emissæ, ut quasi
 norma reliquis omnibus esset, terminosq; præscri-
 berent, plene gustauerit. iam uero cerno animo, quæ
 to omnia uberiora, & splendidiora in philosophia
 sint futura, si ijs sordibus, quibus a sensibus, dum
 ab ijs solis cognitionem trahebant, contaminari ne-
 cesse fuerat, sacris illis fontibus fuerint purgata
 tum denique solidum, & uerum fructum suis culta-
 ribus

72
 ribus darent. Habes nunc sadolete quæ ad te, non
 tam quidem conferendi causa, quàm impetrandi,
 scribere uolebam: ut, in ueritatis studio persequen-
 do, amicus noster eò tuo consilio dirigatur, quò ma-
 xime dignum est animum ueritatis studiosissimum
 perducì. in quibus scribendis iampridem me ine-
 ptum sentio; qui de huiusmodi rebus tam uerbose
 tecum disputo; a quo hæc melius doceri debeo. sed
 certè indulgentia tua hanc spem mihi dat, si ante
 ad silentium meum conuinebas, quod maxime con-
 tra officium fuit, nunc, cum officio fungor, uerbo-
 sitati facile ueniam daturum. quanquàm haud scio,
 an maius crimen faciliorem ueniam mereatur. il-
 lud enim te non offendere potest: hæc uero oratio-
 nis prolixitas quo pacto te non offendat, etiam si
 patientissimas aures habeas, uix uideo, maxime
 si scias qua moderatione uerborum, uel potius quo
 silentio cum Lazaro ipso, ad quem hæc maxime
 pertinent, hac in re sum usus: quo cum uix unquàm
 sum ausus ijs de rebus sermonem instituire: nulla
 uero re tam deterrebar, quàm pudore. nec enim de-
 corum uidebatur, cum ad annos meos respicerem, et
 tenuitatem doctrinæ, atque iudicij agnoscerem, ho-
 minem id ætatis, & literatissimum de literis, pru-
 dentissimum

dentissimum autem de instituendo uitæ genere ad-
 moneres: quanquam multa me, uel potius omnia,
 quæ præterea in eo uidebam, me maxime, ut id fa-
 cerem, inuitarent, summa uidelicet humanitas, mo-
 rum, uitæq; integritas, animus ab omni libidine,
 & ambitione prorsus liber, nullius rei præterquam
 scientiæ, & uirtutis cupiditate flagrans: pro qui-
 bus adipiscendis nullos labores, nulla etiam peri-
 cula, si res ita ferret, est recusaturus. hæc uero cum
 maxima inuitamenta essent, ut de cælesti hac philo-
 sophia cum eo agerem: nunquam tamen pudorem
 meum uincere potuerunt, ut uel uerbū cū eo de hac
 re facerē, nisi forte oblique animum eius tentarem;
 cum doctissimorum hominum, quos in summa ue-
 neratione habet, & maxime tui ipsius studia illi
 proponerem; ut exemplo eum uestro admonerem,
 quò tendere debet. aperte uero nunquam sum au-
 sus: & nunc multo maiora apud te audeo. quod ta-
 men, non audacia fretus, facio, sed libertate qua-
 dam, quam mihi dat tua indulgentia, & quòd ma-
 xime te dignum hoc munus iudico, ut amicum ho-
 minem studiosissimum ad cælestem hanc philosophi-
 am cohorteris, idq; illi beneficiū priuatim nunc con-
 feras, quod paulo post, edito Hortensio tuo, quem li-

brū auidē expectamus, ubi de optima philosophā-
di ratione scribis, commune omnibus futurum spe-
ramus: non solum quia ita res exigit; sed quia mihi
aliquando es pollicitus. hāc uerō accuratius scripsi,
querens consolationem aliquam digressus mei a
Lazaro; a qua sane discedere a gro animo fero: nul-
lam uero maiorem inuenio, quā si ad uiciniora no-
stris studia, tua opera perducī posset: quod maxime
in his literis ago. discedo uero Venetias, cum ob
alias causas, quae me urgent, tum uerō maxime, ut
duorum clarissimorum hominum consuetudine
fruar. quorum alterum, qui est Episcopus Theati-
nus, uir sanctissimus, & doctissimus, tibi notum
esse non dubito; ex eius autem honorifico saepe de te
sermone amicum tuum esse cognosco: alter uero est
Gaspar Contarenus, patricius Venetus: quem ui-
rum si tu nondum nosti, magna certe uoluptate ca-
res: qui enim eorum amicitia maxime delectaris,
in quibus uel umbram uirtutis perspexeris; quan-
to maiorem delectationem caperes ex eius uiri ami-
citia, qui ad praestantissimarum artium omnium,
quacunque uel humano ingenio inuentae, uel diuī
nobis beneficio nobis datae sunt, perfectam cognitio-
nem, omne uirtutis decus adiunctum habet? quem
quidem

quidem iam pridem amatorem habes: ut uero amicum etiam habeas, in tua potestate est positum. sed ualebis, & nos amabis. Patavij, XV. cal. Octob. M. D. XXXIII.

Reginaldus Polus Iacobo Sadoleto S. D.

GRATIAS tibi agam prius, ita enim rerum ordo, & mei officij ratio postulat; deinde ad mandata tua conuertar. Neque uero illa solum me ad agendum gratias impellunt, quæ tu in me præsentem officia contulisti, cum me domo, atque hospitio, honorifice sane, lauteq; acciperes, cum animum meum tui congressus cupidissimum, erudito illo, & pleno grauitatis sermone retineres, & plane pasceres, atque maximis de rebus quærentem, & hesitantem omni prorsus scrupulo, & dubitatione liberares, quæ quidem quoties in mentem reuoco, reuoco autem sæpiissime, quod de Platonis corna dixit Timotheus, cum ab eo inuitatus esset, & eundem postero die uidisset, cornas Platonis non modo in præsentia, sed in posterum quoque diem fuisse incundas; idem ego multo prælixius de tuo hospitio dicere possum, non modo in præsentia fuisse incun-

dum

dum, sed in aliquot menses iam fuisse, atque idem, ut spero, in multos annos futurum. At uero cum a tua consuetudine, cuius ego suauitatem tum primum quasi gustare cœperam, tam cito dirimi, atque tantorum locorum intervallo disjungi animo sane moleste ferrem, cum nec mihi tum integrum esset aliter facere, rationibus meis sic ferentibus, & in hæc loco penè trahentibus, ne huic quidem dolori meo defuisti: inita enim a te ratio est quemadmodum eo quo tantopere delectabar non usquequaque priuaretur, sed ut absens aliqua ex parte, te quasi fuierer, adiuncto mihi eiusmodi itineris comite, qui te mihi quotidie repræsentabat, qui iucundissimos tuos, & grauis. sermones sine intermissione referebat, nec sane intermori eam, quam ex consuetudine tua uoluptatem cepi, ullo pacto sinebat: quis enim te melius exprimere potuit quàm tu ipse, quàm scripta tua, quàm liber ille, quem me tabellario Bembo reddi uoluisti, in quo prudentia tua, grauitas tua, doctrina tua, quibus maxime delectabar, elucent; hunc certe mihi comitis loco accepi, qui non modo mihi in breui illa, & paucorum dierum uia, quæ in Italiam properanti instabat, pro uehiculo fuit, quod de facundo comite dici solet, sed

sed in maximo illo totius uitæ cursu, quo maxime,
& periculosissime laboratur, & uehiculi, & ducis
locum facile obtineret. Ex quo quidem hanc primo
aspectu uoluptatem cepi, quod mihi cognitionem om-
nem de eo in quo ingressus eram itinere, impedi-
to sane, & molesto, abstulit, ac prorsus obliuisci fe-
cit, meq; totum in contemplationem præclari illius
itineris abduxit, quod te duce, & monstatore ado-
lescenti ad laudem, & decus tendenti, certum, &
gloriosum proponebatur. in quo quidem ualde de-
lectabar, cum quasi oculis sic animo cernerem, &
grauissimum, & prudentiss. senem, & peritum
gubernatorem, expertum & locorum, & maris,
atque siderum, & tempestatum omnium, sic animo
prouidum, sic omnia pericula longe lateq; prospe-
cientem, ut nihil non prædictum, quod uel impedi-
re tam præclarum cursum, uel in periculum addu-
cere posset, nulli non rei abs te prospectum esset,
qui non cuius adolescenti in uulgi moribus educa-
to, uulgaribus parentibus orto, et qui filiorum edu-
cationem in postremis haberent, te ducem profitea-
ris, sed illi, qui ab optimis parentibus, pene ante-
quam in lucem puer ederetur huic tam præclaræ
expeditioni fuerit destinatus, cuius educationi Na-
tura

tura non obsisteret, sed suas dotes benigne largiendo se fautricem sponderet, qui ab incunabulis sic educatus, sic literis, & moribus formatus fuerit, quemadmodum est a te sanctissime, & prudentiss. praescriptum. hunc uero talem cum tibi ipse oratione formasses, uel potius Natura sic formatum, & parentum uotis huic rei destinatum cum Paulum tuum accepisses, quid non uoluptatis praeiuit praeclarus ille, quae recensens, in eo instituendo apparatus? Deinde cum ex puerili institutione, tanquam ex angustis, eum eduxisses, & in latum illud quod adolescentis institutioni quasi pelagus patebat adduxisses, tum sane maxime delectabar, cum te secundiss. illo orationis cursu, plenis eloquentiae uelis, ita omnes artes, doctrinasq; percurrentem uiderem, ut cum nihil tibi tum aliud propositum esset, nisi ut earum artium sedes, & loca, ubi ad te pus insistendum, atque ad maiora, & ulteriora tendenti commorandum esset, monstrares, sic ea oratione illustras, sic artium singularum uires, & uirtutes explicas, ut prope monstrando in earum iam possessionem immittere adolescentem uidearis, atq; eas recensendo tradere. haec certe cum magna delectatione spectabam, sed quo magis me delectabatur,

eo sane avidius expectabam, quò tandem præclarum istum cursum, quem tantopere instituisti, dirigeres, quem tibi portum proponeres, in qua expectatione statim se mihi in conspectum obtulit philosophiæ portus, quò te uelis, uentisq; properare, atque illuc paulo post alumnum tuum relictum uidebam; præclarus ille quidem, & omnibus alijs portus præferendus, si antiquis illis Aristotelis, & Platonis temporibus, uel etiam si recentioribus M. T. Ciceronis, hic cursus abs te institutus foret, aut si ipsi gubernatores adolescenti tuo dati essent, nec illi profecto alium elegissent, nec facile tum alius tutior, uel commodior reperiri potuit, sed cum ijs felicibus temporibus cursum instituisti tuum, in quibus ut multi terrarum noui tractus, insulæq; & portus, antiquitati incogniti, inuenti sunt, pluribus eorum, qui antiquitus florebant, uel mari obrutis, uel uetustate consumptis, sic etiam animorum portus multo tutior, & tranquillior Deo ipso, & eodem Dei filio duce, & inuentore nobis apertus sit, quem antiqui ignorabant, cumq; Sadoletus ipse, qui in hoc cursu gubernatoris locum obtinet, & si appulsus quidem ad antiquorum portum, tamen præteruectus sit, nec diutius ibi commoratus
quàm

quàm ut necessaria sibi inde sumeret ad reliquum
 cursum perficiendum, in hunc tandem, qui a Dei
 filio monstratus sit, se receperit, ubi nunc summa
 cum animi tranquillitate, & securitate uiuit, quid
 est quod non Paulus tuus merito tecum conquera-
 tur, si in alieno, & infido iam portu eum relin-
 quas cum te ipsum in optimo, & tutissimo collocaris?
 Ego certe illius uerbis tecum expostulare non dubi-
 tabo, si inuenem omnibus uel naturæ dotibus, uel
 doctrinæ præsi- dijs tua opera instructissimum, &
 plane talem, qualem tu parentum uotis expeten-
 dum proponis, fluctuantem iam in philosophiæ
 portu reliqueris, qui ne portus quidem iam nomi-
 ne dignus, sed, ut de Tenedo dixit poeta, Nunc tan-
 tum sinus, & statio male fida carinis. Non certe no-
 bis tantus iste in eo educando apparatus, nec præ-
 clara ista tua institutio, talem nobis promisit, qui
 præcepta tandem uiuendi a philosophis peteret,
 aut qui animi securitatis causa in illorum portum
 confugere necesse haberet, sed qui uel principibus
 ipsis philosophorum, si iam reuiuisceret, nouum, &
 præstantius uiuendi genus ostenderet, quò illi nun-
 quam aspirare potuerunt, sapientiam autem & ani-
 mi tranquillitatem longe aliam, & aliunde quàm
 a philo-

à philosophiæ præceptis petendam, tanto præstantiorem, & diuturniorem ea quàm philosophia promitteret; quanto præstabiliora sunt omnia diuina humanis. Quare age mi sadolete noli promisso tuo in tali iuvene instituendo satisfactum putare, si eū ad philosophiæ limites perduxeris, aut etiam si philosophiam ipsam integram tradideris. soluas inde oportet, neq; unquam defatigari, donec in sacrum illum portum, in quo tu ipse summa cum animi tranquillitate uiuis, perduxeris. nec enim conuenit tam præstanti educationi, & illi quem omniū opinione, hæredem uirtutis, & sapientiæ tuæ es relicturus, in alio quàm quo ipse tabernaculum uitæ posueris, portu conquiescere. Hæc ad te uerbosius scripsi, uel tuo imperio obsecutus, qui me etiā de illo tuo libro, quem satis admirari non poteram, quid sentirem ad te scribere uoluisti, uel meo in sacras illas Musas amoris satisfaciens, quas abs te illaudatas, & tacitas præteriri; cum reliquas omnes artes, & disciplinas dignis præconijs ornaris, uix æquo animo spectabam, uel etiam quod Lægeo nostro, cuius liberis instituendis iste abs te labor præcipue sumptus sit, hoc imprimis gratum fore non dubitabam, si quod in philosophia, & reliquis

artibus

artibus facis, ut singularum laudes attingendo ad earum studium adolescentum animos erigas, idem in theologia facere non neglexeris, in qua reliquæ omnes, ut in oceano flumina, se immergere solent, & debent, & certe conuenit, ut quæ te ipsum maxime ornet, & in dies magis magisque ornatura sit, cum de ijs, quæ hominis animum cognitione colunt, & perficiunt, sermo sit: eius laudem haudquaquâ silentio inuoluas, præsertim etiam cum ad Lægeum scribas, quem scio, quoties negotiorum fluctibus, quibus in aula uersantem iactari necesse est, emergere datur, in nullo libentius, quàm in theologiae portu conquiescere: sed tu meæ loquacitati ignoscas, qui cum sancte adiutare possim, me a quatuor iam annis ne tantum quidem latine legisse, quantum nunc ad te scripsi Theologorum libris auocatus, quos tamen in hoc genere latinorum scriptorū non pono, in hanc insolitam latine scribendi loquacitatem erupi; sed ut loquendi tecum, sic etiam scribēdi ad te, quo cum absente quasi loqui uideor, dulcedo quædam me longius ultra epistolæ fines prouexit, cui tu pro tua humanitate ignoscas oportet. Nunc ad tua mandata uenio, in quibus co. breuior ero, quo pauciora mihi scribenda reliquerunt co-
rum

rum literæ ad quos mihi mandata, & literas dedi-
sti, quas iam spero ad tuas rescriptas te habere. om-
nes enim receperunt post paucos dies, quibus tuæ
uoluntati satisfacere possent, se id facturos. Bembi
uero literas cum his ad te mitto. quem cum Vene-
tijs salutarem, & tuas literas una cum libro da-
rem, quantum delectabatur de te, & de tuis studijs
audire, pro uestra coniunctissima necessitudine fa-
cilius est tibi existimare, quam mihi scribere. Vero-
nensi uero Episcopo, quem Veronæ salutavi, etiam
tuas literas tradidi, qui me unum diem apud se de-
tinuit, cum nullus pene nobis sermo esset, nisi de
te, & studijs tuis, cum sæpe se ualde dolere ostende-
ret suauissima consuetudine tua, quam semper ex-
petiuit, propter locorum interuallum, quo disiuncti
estis, se priuari. Lazarum tuum Patavij offendi, cui
etiam tuas literas tradidi, cum ad me salutatum hu-
manissime ueniret. omnes uero de ista animi tui
tranquillitate, & ocio gratulantur, ex quibus tam
præclaros fructus oriri, & prodire uident, quæ ut
tibi perpetua sint optant, ego in primis, qui non mi-
nus præclaros sciam te iam parturire, quam sunt
hi, qui a te in lucem sunt editi, hoc idem optare nõ
desinam, partumq; felicissimum precari. Vale.
Venetijs, cal. Nouemb.

seo, quòd principijs ire obuiam neglexi . sed de his
ridiculum est. fortassis me ad te scribere . Quod de
me bene atque honorifice sentis, & tua sponte, &
Francisco Odrisio de metibi indicante, alterum est
tuæ perpetuæ erga me uoluntatis, alterum illius
amoris, quo inductus, ut arbitror, plus mihi tribuit
quàm ego dignus sim . Amorem tuum in me nun-
quam diminutum esse credidi, neque est fas de tali
uiro hoc suspicari . in desiderio quidem certe tuarũ
fui literarum: quæ quotiescunque mihi redduntur,
toties noua delectatione afficior, ex memoria uete-
ris nostræ suauissimæ, & coniunctissimæ familia-
ritatis, in qua cognoui te cum amantissimum mei,
tum ipsum dignum, quia a nobis summe amarere .
Non enim neque in naturæ simplicitate, ac ingenui-
tate, neque in amicitie fide, neque in omni laude uir-
tutis, ac literarum habeo quẽquam, quem tibi an-
teponã . illud mihi magno dolori est, quòd ita egit
fortuna nobiscum, ut uno in loco esse non possemus,
&, qui est fructus ueræ amicitie potissimus, una
conuiuere. sed hoc Deus aliquis aliquando uiderit .
tu si me amas mi Lazare, cura obsecro, ut ualeas, et
ad nos, cum erit facultas, aliquid semper des lite-
rarum . hoc mihi gratius facere nil potes . Vale .

Et Petro Bembo meo plurimam dic uerbis meis salutem. Carpentoracli. VI Idus Mart.

M. D. XXXII.

Iacobus Sadoletus Lazaro Bonamico S.

AVILA ad me fuit, tuas Et Bembi mihi red-
didit literas, deq; omni uestro statu ipse est suo ser-
mone subsecutus, nihil prætermisit, quod aut illi
commemorare, aut mihi percontari uenerit in men-
tem. prorsus omnia eiusmodi, ut utrique uestrū gra-
tuler, Et pro amicitia gaudeam. studium omne in
literis, animum in quiete, nomen in honore uestrum
apud omnes esse intelligo. neque hoc adeo mirum.
ita instituti ambo, Et meriti estis. utinam ego maio-
ribus uinculis non detinerer, quo possem uobiscum
esse tertius, fruiq; optatissima consuetudine, Et sua-
uitate uestra, sed posteaquam id non licitum est,
unicum mutui desiderij lenamentum sunt literæ, de
quibus cognoui querelam tuam, testem illam qui-
dem tui erga me amoris, sed tamen ego nullas tuas
accepi, quin semper rescripserim, et meas misi com-
plures, ad quas nunquam est rescriptum. ita uitio
fit eorum quibus committuntur, ut ne reddantur li-
teræ,

tera . nia autem dandi , & accipiendi illa est tu-
 tior , ac certior , ut mittantur utrinque Romam . ibi
 Antonius Cornazanus familiaris meus , qui apud
 Card . Rauennatem nunc habitat , curam capiet ,
 fideliter eas transmittendi , quando & facultas il-
 lic paratior , & com meatus literarum frequentior
 sane est . ad ipsum quoque Rauennatem suadeo tibi
 ut scribas , quem tu Romæ diu cognosse potuisti ,
 iam tum non sine egregia laude ingenij deditum
 opt . artibus . is post discessum nostrum tantus effe-
 ctus est in omni genere doctrinæ , ac præsertim in
 hac ratione ornandæ , excolendæq ; orationis , ut il-
 lius sermone , ac stilo quicquam uix fieri possit ele-
 gantius . cum eo si te familiaritate coniunxeris , ea
 scilicet , quæ per epistolas contrahi potest , non dubi-
 to , quin te ille omni sua humanitate , & beneuolen-
 tia sit complexurus . Ego cum has dabam , alteras ti-
 bi iam redditas esse arbitrabar , quas his scripseram
 diebus , ad tuas longe ante a me acceptas literas , se-
 ro uidelicet . sed ualetudo in causa fuit , quia eram
 incômoda per menses quinque conflictatus . atque il-
 læ ad urbem missæ prius fuerunt , & inde ad te , ut
 ego suspicor , allatæ . quare si tibi eadem placuerit
 mittendi ratio , crebrius inter nos quamuis absentes

quæ de bellis, & de apparatibus hostium uulgo circunferuntur, quorum est communicatio inter doctos minime liberalis. Cumq; ego in studijs uehementissime essem occupatus, non tam querebam, quam expectabam tempus idoneum scribendi, cuius nunc adest occasio, cum uir clarissimus eximia uirtute, nobilitateq; præcellens Reginaldus Polus. istuc ad uos reuertatur, cui ego non modo literas ad Bembum meum, et ad te, uerum dialogum etiam dedi de liberis recte instituendis, ut is uestro imprimis iudicio expenderetur. non enim ante eum missurus sum ei, cui est inscriptus, quam uobis cognouero auctoribus, posse me id sine ullo periculo facere. in quo te quidem oro mi Lazare, ut operam mihi, & amicam, & fidelem, præbeas, hoc est ut laborem quidem lectionis mea causa libenter suscipias, seueritatem autem in reprehendendo, & corrigendo eam adhibeas, quæ & fidei tuæ lectiss. & meæ famæ conueniat. quid enim ego sum, aut uero esse possum sine uobis? aut sine uestra ope ac consilio? in quorum præstante, eximiaq; uirtute mea spes, in amore erga me fiducia tota collocata est. sed non arbitror ista ibi opus esse, ubi est cōiunctio maxima familiaritatis. illud peto ut me,

primo quoque tempore de omni tuo sensu, quod ad
 lucubratiunculam meam attinet, certiore facias.
 Ego (est enim tibi aliqua quoque studiorum meorū
 reddenda ratio,) opus habeo nūc in manibus ex eo
 genere quod est in sacris literis positum. studeo e-
 nim pro mea parte ferre opem christianæ religioni,
 cum ea fere ubique periclitetur, quemadmodum
 imprimis quidem & debeo, & opto. illud utique
 do operam, uti totum argumentum ita tractem, ut
 vobis quoque doctiss. hominibus, qui nimium eru-
 ditas aures ad audiendum affertis, illa possit com-
 mentatio non displicere. sed hoc res ipsa postea aut
 redarguet, aut probabit. Tu mi Lazare me dilige,
 & valetudinem tuam cura diligenter, virosq; do-
 ctos, quorum istic magna copia est, meis uerbis sal-
 uere omnes iube. Vale. Carpentoracti, III.
 Non. Sept. M. D. XXXII.

Jacobus Sadoletus Lazaro Bonamico S. D.

CVM essem Massiliæ, quò ego per aduentum
 summi Pont. illius salutandi gratia me contule-
 ram, accepi literas tuas, quibus mihi significas, te,
 cum primum ex peregrinatione quadam, quæ ti-
 bi

bi necessario incidisset, domum pedem retulisses, continuo daturum operam, ut cum illo colloquere, qui apud Bayfium est, omniaq; ad me de eo explorata perscriberes. quem ego inuenem mi LAZARE multis de causis, ut antea ad te scripseram, expetui; neque nunc alia sum uoluntate. sed cum ita institutus sim, ut plures existimem partes nostrimet humanitati tribuendas esse, quam nostro ipsorum commodo et utilitati, de ea spe, quam in illo repositam habebam, alteri concedendum duxi: cum praesertim is, cuius ego uoluntatem antepono meae, propter praestantem uirtutem, & nobilitatem dignus sit, cui à bonis omnibus omnia deferantur. is porro princeps est Melphitanus, homo summa grauitate, summaq; apud regem hunc & auctoritate, & gratia, quem ego & amo mediufidius, & non mediocriter colo: in quo mihi ab eo refertur gratia. non enim ipse in nostro mutuo amore uincitur. atque is duos habet liberos, adolescentes indole eximia ad uirtutem, deditos optimis literis. in quibus ille erudiendis, atque ornandis omne studium suum, omnem suam cogitationem fixam habet. neque alia re tam indiget, quam bono doctore, ac magistro, cuius & doctrina, & fidei carissim

ma

Iacobus Sadoletus Reginaldo Polo S. D.

ACCEPI tuas plenas officij, & humanita-
tis literas, omnemq; in illis probi, & præstantis
ingenij tui, & pristini erga me amoris imaginem
penitus recognoui. Quorum utcunque quanti fa-
ciam, nihil attinet nunc me scribere. utroque qui-
dem certe ita delector, ut nihil mihi accidere pos-
sit optatius, quàm me. & abs te, & tali viro dili-
gi. Sed quæ à te de prætermissione officij scripta
sunt, quodq; in eo uideris uereri, ne aliqua abs te
culpa suscepta fuerit, amabo mi Pole sint ea ex mu-
tua nostra beneuolentia penitus sublata. non enim
recipit amicitia nostra suspensiones huiusmodi, nec
tu peccare prætermittendo officio potes, nec ego
animum tuum, aliter, atque est, interpretari. quem
cum officiosissimum, & amantissimum mei esse co-
gnoscam, non ex euentis tua mihi uoluntas, sed
ipsa per se, & sua sponte spectata est. equidem de-
sideraui nonnunquam tuas literas, neque id me-
hercule iniuria: quid enim est, illis quod me dele-
ctet magis? uerum ita desiderauit, ut ego illa uolu-
ptate carerem, non tu ut officio, aut amicitiae dees-
ses,

ses, cui tamen meae aliquando intermissae uoluptati
sentio nunc à te cumulate satisfactum esse: caue
enim putes quicquam mihi accidere potuisse tuis
literis dulcius: quae cum totae undique, tum illa
me ex parte praecipue delectarunt, qua tu, Socrati
ce nimirum, & urbane, excusationem tibi non scri
bendi à stili inopia, & exilitate repetebas. qui to
tus elegantis ironiae locus & uultum mihi, & ani
mum suauissima hilaritate aspersit. Obsecro hos ne
tu riuulos squallentes, & aridos, aut tenui aqua
la interdum fluentes uocas? qui mihi ita currere
uisi sunt abundanter, & largiter, ut appareat non
tenuem, sed uberrimum, & eundem perennem
fontem illa fundere: quanquam hoc quidem de te
mihi iamdudum persuasum habui, te, quae concupi
uisses, omnia effecturum esse. notum mihi erat in
genium tuum, nota uirtus, ardor autem ille, qui ani
mis praestantibus ad appetendas res magnas comes
adesse solet, nihil mihi non de te uel maximum pol
licebatur: sperabam itaque fore, nec sum deceptus, ut
tu, ad istam ipsam, in qua nunc insistis, doctrinae,
& eloquentiae coniunctam laudem peruenires.
Quapropter & gaudeo, pro amicitia, & tibi gra
tulator: illud aliquantum aegre fero, quod uidere quasi
uideor,

uideor, hæc à te ipso ornamenta contemni, quæ
meo quidem iudicio tanta sunt, ut sine his constare
ne illa quidem recte queant, quæ tu omnibus an-
teferenda iure optimo putas: quo de genere quo-
niam bis iam à te sum laceffitus, tempus non alie-
num uidetur meam tibi sententiam breuiter expo-
nendi. Sacrarum rerum studium, & disciplinam
tibi placet rebus cæteris anteponi. quod ego quo-
que tecum una confiteor. cur ergo in artibus reli-
quis, & maxime in philosophia tempus conteri-
mus? quia nequimus ad fastigium sine fundamen-
to, & sine parietibus peruenire. quid? ista quan-
diu curanda nobis sunt, ut non in uno illo ipso,
quod optimum est, omnia nostra studia ponamus?
ad quod dicendum est, esse boni patris familias to-
tius domus tutelam, & procurationem, non unius
duntaxat partis gerere, uerum ita totius, ut potis-
simæ quæque in ea diligentius curentur partes. et
quoniam de domo, & de ædificatione mentionē fa-
cimus, quis non uideat theologiam, quatenus
in scientiæ ratione, & genere reponatur, sine phi-
losophia stare ipsam per se, & se sustinere non pos-
se, utranque uero minus apte munus tueri suum,
si à copia, & facultate dicendi deferatur? At enim
mundana

non modo fidelis, atque frugi, uerum etiam sine sorde, cultu honestiore corporis studeat apparere? At iam ista ad summi boni adeptionem minus necessaria sunt. ne sint, adiuant certe, hocq; sæpe efficiūt, ut multi ad illud expetendum procedant comitatiores. & sane uidendum est, si circuncidamus, amputemusq; cætera, & tantum quod summe est necessarium relinquamus, ne, dum diuini uolumus plane fieri, humanitatis partem nullam teneamus. sit modo nobis hoc fixū, quod utique esse debet, ut omnia in nobis, si qua meliora sunt, accepta Deo referamus, eaq; ad eiusdem unius gloriam cōferamus. Hoc animo qui fuerint, cum in ijs, quas suscipient, actionibus, rebusq; quas gerent, summam sibi dignitatem operis proponent, summamq; pulchritudinem, inq; eam amore, & studio incitati ferentur, tum non erit in his talibus pertimescendum, ne inani laudis cupiditate deducti a summo bono deficiant. itaque ego, & liberalibus artibus, quoad in illis nos quantum proficiamus non pœnitet, & in primis philosophiæ operam dandam puto, sine qua, ut dixi, nec theologia quidē constat. in qua quod scribis te ita tempus omne consumere, ut ad cæteras artes, atque scientias nihil spatij tibi

ne respiciendas quidem relinquatur, non satis plane intelligo, quid dicas. Patieris autem me pro nostra familiaritate, & meæ & tuæ naturæ ingenuitate, libere agere tecum. Non intelligo inquam quid hoc tantum tuum sibi uelit studium. Nam si ea tantum nobis percipienda sunt, quæ ad credulitatem nostram & fidem faciendam de Dei clementia, & benignitate erga nos pertinent, ea sunt nobis, non multis, nec obscuris, sed clavis, & illustribus literis sat compendiose tradita, liber enim euangeliorum omnem uiam, & rationem nostræ salutis continet. si uero explicanda illa uberius sunt, & enucleatius tractanda, an tu plus in eo tibi ab infinitis uoluminibus istorum, qui ætati nostræ propinquiores omnia referserunt inconditis libris, & litigiose scriptis, quàm a Paulo, & lege ueteri, & a prophetis opis latum iri existimas? Pauci libri sunt, nisi forte me fallit, in hoc a nobis genere perdiscendi, sed quos magna cum cura, & attentione animi legere debeamus, si ad diuinarum rerum cognitionem cupimus aspirare, qui non modo spatiū, locumq; dant lectitandis aliarum artium ingenuarum auctoribus, sed ab ijs ipsi liberalibus studijs, non exigua accipiunt suæ utilitatis, & dignitatis
adiu

adiumenta. nisi forte existimamus, summos illos viros, qui primi hæc christiana literis illustrarunt, sine comitatu optimarum artium tantos progressus in diuinis facere potuisse. quo in numero Basilium, Chrysostomum, Augustinum, Hieronymum fuisse cognouimus. sed de his satis uel fortasse nimis multa. Lazarum meum, tuum contubernalem factum esse, moriar, nisi mihi pergratum est. quamquam enim corpore a uobis absum, animo tamen uobis cum excubo, ut uidear mihi interdum quæstiunculas uobiscum una, & familiares sermones texere. cum porro ego ad philosophiæ studia animandum nunquam censui, quippe quorum ipse studio, & amore in primis teneatur. De theologia quidem tibi assentior nunquam illum ad summum peruenturum, nisi ad reliquas facultates, & disciplinas, quas multas magnasq; possidet, hanc quoque primariæ artis, nobilissimæq; scientiæ cognitionem adiunxerit. cuius ego tibi in Hortensio attexâ laudationem, utique quoad patietur ratio operis. in quo ego nunc me assidue, uehementerq; exerceo, speroq; propediem copiam me uobis facturum, quo meas ineptias irridere possitis. Theatini doctrinâ, sanctitatem, uirtutem notam habeo iandiu, eamq;

E P I S T O L A E

in oculis gero. Cōtarenū amo, colōq; nec de facie mihi cognitum, sed de animi uirtute, & de eximie cōditionis fama. tu mihi gratiss. feceris, si utrique salutē meis uerbis plurimā dixeris, Cōtarenō hoc amplius, dictū mihi fuisse superiore anno, cum essem Massiliae, librum confectum ab eo, in quo de opt. ciuitatis statu grauiter et docte differatur. eum librū cupere uehementer me uidere, quod Sorātius Vene- tus prae- stans ingenio, & nobilitate, cum discedere- mus Massilia, pollicitus mihi fuit, se curaturum ut exemplum ad me primo quoq; tempore mitteretur. eum ego oblitum arbitror. tu qui auctoritate, & gratia plurimum polles, si effeceris hoc mihi, ut, quod sine onere aliquo tuo, & sine incommodo fiat, cupiditati in hac re mos geratur meae, magna me iucunditate medius fidius affeceris, quod ut con- tendas, & enitare, magnopere a te etiam atque etiā peto. Vale mi humaniss. Pole. Carpentoraēti. IX. Cal. Decembris. M. D. XXXIIII.

Iacobus Sadoletus LAZ. Bonamico S. P. D.

P V P V G E R V N T me nonnihil literae tuae
sept. cal. sept. Patavij datae, meq; in eam suspicio-
nem

nem adduxerunt, ut uererer ne quid a me antea imprudentius fuisset scriptum, quasi tu mihi in opinionem inertiae uenisses. Quod ego non modo eo animo scripsi nunquam, sed ne cogitare quidem potui: Quid enim minus, quam quod nusquam quicquam est, idque ego scio nihil esse? An te ego non noui, tuaque mihi uirtus, industria, nauitas parum perspetta est? aut quisquam omnium mortalium est, qui audeat affirmare tuos sibi sensus melius quam mihi perceptos esse & cognitos? crede mihi mi Lazare, memet ipsum turpissimae inscitiae accusarem si tibi ignauiae notam ullam attribuerem. sed quod tunc scripsi me existimare, laborem illum docendi & tibi honestum esse, & alijs permultis fructuosum, ac utilem, neque uideri mihi causam cur defugiendus esset, non scripsi iudicans te laborem omnem uelle fugere: sed cum te in illo munere contineri cuperem, iccirco illa a me tunc scripta cohortatio est: sic enim sentiebam, maximam laudem uirtutis esse prodesse quamplurimis. quod tu latius in posteritate patere putas, quam si tantum praesenti saeculo seruiatur, propterque eam causam secreta, & libera studia requiris, ociumque in illis maiorem etiam laborem, et maius negocium appellas, neque arbitraris utrumque

abs te præstari posse, ut & priuatim tibi satisfacias, & cæteris publice, concedo: teq; ad illa alta, & magnifica philosophiæ studia aspirare plane uideo. Quid ergo non ne commodissime poteras istam ipsam artem omnium nobilissimam publice profiteri? in eaq; instituere adolescentes, uel separatim, si tibi ita fuisset uisum, uel etiam cum Cicerone, & cum eloquentiæ studijs coniuncte. Quam ego uiam rationemq; studendi potissimam semper sum arbitratus. hoc enim certe abs te si factum fuisset, uel etiam si nunc fiat, Diij immortales qui concursus præstantium ingeniorum, quantus amor sapientiæ in animis hominum existeret? tu quoq; qui nunc te quereris distrahi, coniungeres domestica tua studia cum forensibus, & laborẽ utcunque in easdem operas, lucubrationesq; conferres. sed ego tibi non præscribo, satisq; in te ipso statuo esse consilij, hoc dico, quod habeo exploratum, te, utro uerteris, præclare illud, quod susceperis, esse effecturum. quæ mea de tuo ingenio, & eccellente doctrina opinio, non noua, neque recens, sed iam diu ante mihi suscepta est. legi carmen tuum, idq; admodum probauimus, ualde enim mihi graue, & elegans uisum est. utinam fructum eiusmodi afferat, ut quod de Pericle

cle scriptum est, aculeos relinquat in eorum animis, ad quos maxime ista pertinent. Tuas a Melphitano Principe literas, de quibus in quadam epistola fueras conquestus, iam pridem accepi. ille uero Bunellus, doctus, ut ego cōjicio, adolescens, scripsit ad me, se Vaurenſi Episc. Regio istic Legato, contubernalem factum esse: quem hominem mi Lazare rogo te ut nosse uelis. talem enim offendes, ingenio, humanitate, probitate, doctrina, ut pluris tibi propter eum Gallia futura sit. Polus ad me scribit uberrimis, elegantissimisq; literis, multa ille quidem digna illo ingenio, & sanctiss. ipsius moribus: sed plurimum tamen, & præcipue de te, quem ipse admodum cuperet ad theologiæ studia iam aliquando animum adijcere, quam ego cupiditatem eius uehementer probo, tibiq; suadeo ut hanc diuinam imprimis facultatem, & ad salutem nostram necessariam diutius a tui ingenij thesauris ne habeas segregatam: sed de his alias, nunc tempus interpellat, luxq; & negocia instant: nam hæc manu mea scripsi ante lucem. Valebis igitur, & communibus amicis, imprimisq; Bembo meo plurimam à me salutem dices. Vale. Carpentoracti, IX. Cal. Decemb. M. D. XXXIII.

Iacobus Sadoletus Reginaldo Polo S. D.

ILLVM primum cepi ex literis tuis fructum,
 quod cognoui ex his manu tua scriptis, te uale-
 dine bona iam uti, de qua fueram me hercule ali-
 quot ante diebus nō parum sollicitus, cum Thomas
 tuus ad me Auenione scripsisset, te in eum morbum,
 quo hic laboraras, Venetijs denuo incidisse. nunc
 mihi tuæ peroptatæ literæ omnem mihi huiusmodi
 de te metum, & sollicitudinem meam penitus ab-
 sterferunt: confido enim quæ tua temperantia est,
 hūc nunciū salutis tuæ, & lætitiā, quā nos ex ea
 capimus, diuturnam nobis fore. alter autem fructus
 ex tuis literis non tam fortasse necessarius, quā
 hic de quo dixi, sed certe ad uoluptatem animi ali-
 quanto uberior, quod quantum tu me ames, &
 quā de me honorifice sentias, in eisdem plane li-
 teris perspexi, etiam mehercule cuiusmodi tu sis,
 quā doctus, quā humanus, quā elegans, quā
 omni ratione dignus, qui ab omnibus his amaris,
 atque colaris, qui uirtutem, & comitatem, & opti-
 mum sibi morem esse colendum putent. sed quæ tu
 ad me de me ipso scribis, in quibus iudicium tuum
 est

est de me cum singulari benevolentia coniunctum, omnia sunt eiusmodi, ut cuius intuenti facile appareat, amantis illa esse hominis magis, quàm indicantis: et si enim tu hac ingenij quoque, & sapientiae dote mirifice ornatus es, ut possis commodè iudicare de altero, tamen id quoque tibi esse impedimento, quod plurimis officit, ut amore inductus, amici bona carius aestimes, quàm quanti illa sunt, minime mirandum est, cum habeas humanitatem naturæ præsertim ingenio, & prudentia non inferiore. mihi quidem cum ea, quæ mihi tribuis, non continuo agnoscenda esse uideantur, libenter illa refero, & conuerto ad amorem, quo sane, dum carus tibi, iucundusq; sim, satis tuo iudicio me ornatum esse puto: non enim mediocris est operæ, neque uirtutis, tali uiro, qualis es tu, tanto opere placere. De te uero mi doctiss. atque humaniss. Pole, si ea dixero, quæ sentio, nunquid tu illa certo iudicio, an beniuolentiæ in te meæ es ascripturus? utinam quidem possem uerbis omnia complecti, quæ mihi de te in animo insita, penitusq; affixa sunt. non uereor nimium amantis suspicionem. sed si hoc non queo, quòd meos eloquendi, exprimendiq; conatus tuorum ornamentorum copia obruit, illud quidem

F 4 dicam,

dicam, quod in promptu est, usque eò me aspectu, sermone, sanctissimis tuis illis, & modestiss. moribus fuisse captum, ut nunquam postea mihi ex animo nostri illius congressus memoria exciderit. quanquam enim perspiciendi tui penitus, ac fruendi exigua mihi potestas fuit facta propter subitum à nobis discessum tuum, qui mihi mœroris non minus reliquit, quàm tuus lætitiæ aduentus tulerat, tamen vitæ cursum tuæ mecum ipse considerans, & summorum hominum testimonia, quæ tibi sæpe egregia apud me ab illis data sunt, cogitatione mea repetens, quibus præsertim testimonijs brevis illa mecum congressio tua apprime fidem fecisset, talem te in animo gerere cœpi, qualis profecto tu es. neque aliter statuere poterā, quàm eum, qui & nobilitate domi, & fortuna amplissimus, cognatos, familiares, patriamq; reliquisset, & cum flagraret studio, atque amore artium optimarum, ex ultimis oris, regionibusq; terrarum, illarum adipiscendarum causa in Italiam se contulisset, ibiq; annos cōplures commoratus, ita se dedisset familiaritatibus, amicitijsq; doctissimorum, & præstantissimorum hominum, ut illorum omnium iudicio imprimis dignus ipse haberetur, quem & propter fidem, at-

que

que integritatem uitæ uenerarentur omnes, & propter ingenium, doctrinamq; colerent: hūc ego inquam existimare alium non poteram quàm summum, & singularem uirum, hominemq; eiusmodi, cui nos, qui ista pendimus, et iudicare aliquid possumus, non beneuolentiā modo, aut honorem tacitum, sed omnia cultus, atque officiij aperta, & perspicua studia deberemus. Accesserunt literæ tuæ, præclaræ testes ornamentorum tuorum, atque amoris summi erga me tui, quæ me totum tibi addixerunt. quàm illæ humaniter scriptæ, quàm eleganter, quàm argute? nihil ut ingenij luminibus ijs, quæ in eis plurima elucet, nihil ut præclara effigie pietatis tuæ, ac religionis erga summum Deum, quæ in illis expressa est, fieri possit illustrius. & tamen tu is cum sis, qui alicuius domū ingressus, intro tecum feras lætitiā hospiti tuo, atque honorem, agis mihi per literas gratias, quòd te domi meæ libenter acceperim. quasi non mihi maximo ornamento fuerit aduentus tuus; & uoluptati sermo, atque congressus: aut tu plus ex me quàm ego ex te, & ex sermonibus tuis, adeptus fueris & suauitatis, & commodi. Ast ego tuum illud consilium fidele, & sapiens nunquam ē memo-

ria depono, cum tu mihi hæsitanti, atque cunctan-
 ti quod nam genus potissimum sequi studiorum de-
 berem, & quorum auctoritati, atque opinionibus
 assentiri, quòd erant qui alia mihi studia quædam,
 & diuersas scribendi rationes proponerent, fiden-
 ter, & prompte consulisti, ut ea præcipue secta-
 rer studia, quorum fructus in hac uita non solum,
 sed in omni æternitate integri manere possint. Quo
 ego responso maxime adductus sum, ut me literis sa-
 cris totum dedendum putarem, ad quas eram iam
 quidem sponte mea propensus, simulq; integritatē.
 & uirtutem, & religionem tuam admiratus sum,
 qui cum inter eos homines diu uersatus esses, qui-
 bus studia ista minus probantur, atque eis artibus
 ipse instructus, quorum uidetur lepos, eruditio, ele-
 gantia ab his rudioribus, ut existimatur, studijs ab-
 horrere, bonitate tamen naturæ, & ingenij tui, ea
 cæteris anteponenda studia duceres, quæ nō præsen-
 tem modo suauitatem, sed multo magis rationem
 perpetuæ utilitatis habeant. sed quid ago? maioris
 ista sunt operæ & temporis longioris quàm ut una
 epistola comprehendere possint: ueniamus ad literas,
 in quibus quòd scribis librum meum in uia tibi pro-
 uehiculo fuisse, ualde medius fidius id lætor, quod
 que

que cum probas, ac laudas, mihi uehementer gratum. quid enim dissimulare est opus? sed illud gratius tamen est, quod ex illo te intelligo memoriam, & cogitationem mei crebrius aliquanto, et diligentius usurpasse. quo nihil mihi quidem accidere potest optatius. Mandata mea, quæ abeunti tibi dederā, diligenter te confecisse, neq; miror, noui enim fidem, & integritatem tuam, & te de ea re plurimum deamo. Accepi iam quidem a Bembo meo literas cum uberes ad ea, quæ ab eo requirebam, imprimisq; & elegantes, & eruditas, tum omnibus refertas officij, ac beneuolentiæ signis. ex postulationem tuam, qua uteris mecum, quod locum theologiæ in enumeratione earum artium, quibus recta institutio adolescentiæ continetur, nullum dederim, sed in philosophia totum hominem constituerim, sic accipio mi Pole, ut omnibus tuis dictis, atque factis tua animi uirtus, & Deo dedita uoluntas uehementer mihi probetur. sed ego primum nominatim de theologia nihil dixi, quod ea in philosophiæ nomine continetur. est enim theologia, ut ipse nosti, apex quodammodo philosophiæ, & fastigium, cuius tanquam magni cuiusdam corporis cum plura membra sint, ut ab Aristotele est perspicue demonstratum,

tam, illa quæ de Deo pars, & de Principe causa
 pertractat, sola prope digna est, quæ philosophiæ
 nomime censeatur: quæ etsi aliter ferè tractata a
 nostris est, ac ueteribus fuit, eam tamen etiam nunc
 philosophiam appellari uideo a doctissimis, & san-
 ctiss. uiris Chrysostomo, Basilio, cæterisq;. Deinde
 cum adolescentem sic instituam, ut eum duntaxat
 deducam ad annum ætatis quintum supra uiges-
 mum, post id autem suo eum arbitrio permittam,
 non uisum fuit mihi conuenire accuratius ad æta-
 tem illam de theologia uerba facere, cum hæc ars
 una atque scientia senectuti maxime, & sedatori
 bus annis apta sit. et, si præcepta suscipienda reli-
 gionis necessaria etiam iuuentuti sunt, quemadmo-
 dum utique sunt, satis illa a me in eo libro, quate-
 nus quidem ad adolescentiam pertinet, sint tradi-
 ta. Postremo cum in Hortensio distinctius de philo-
 sophia acturus sim, eamq; in suas partes omnes di-
 stributurus, ueluti de quâ peculiaris ibi sermo ha-
 bendus est, non duxi eius dialogi ornamentum,
 quod in commendatione theologiæ uel præcipuum
 futurum est, in hoc prius libro delibari conuenire,
 cum id incunctius tum futurum sit, si ad hominum
 aures nouum, atque integrum accedat. habes ratio-
 nem

nem prætermissionis meæ, quam tibi cupio probatam esse. certe enim ego quod iudicari esse congruentius, id secutus sum. et nunc quidem perdifficilis foret commutatio. plura enim mihi inuertenda in eo libro, uel totus potius liber alio ordine pertextendus esset. uerum de his satis. te amari a me mirifice, et coli, ualde tibi persuasum esse uolo, neque me magis appetere quicquam quam ut meæ erga te uoluntati tua mutuo uoluntas in me amando respondeat. Vale. Carpentoracti, III. Non. Decemb.

Iacobus Sadoletus Card. Petro Bembo S. P. D.

NIHIL hilariter possum, neque tristibus etiam uerbis ad te scribere: quod in altero mea uoluntas mihi repugnat, in altero hominum opinio, atque iudicium. quicquid sit quidem, factus sum Cardinalis. quod si letandum sit, ego adhuc ignoro. certe neque ex mea uoluntate, & præter expectationem factum est. Ac summa quidem Pōtificis Max. benignitas extitit aduersum me, qui me iudicauit eo honore dignum, quo forsitan non sum dignus; uel potius plane non sum. onera autem, quæ honorem cum consequuntur, mihi ita graua sunt, ut nō uideam

uideam quo pacto possim sustinere, ac ferre. te quidem rogo mi optatissime B embe, ut me amare non desinas. minor apud te sum factus, quàm essem antea, hoc enim & suspicor, & re ipsa ita est. sed noli ascribere hoc mihi: potius fortunam accusa, quæ me in ea uada compulit, ut aut fama, aut libertas mihi fuerit cōfringenda. ego uero pudore, et timiditate quadam malui constringi, quàm stultus iudicari. si iudicio lapsus sum, ignoranter feci: si uero mea ratio habet aliquam rationem, tu si eam defendendam susceperis, potero sperare me purgatum omnibus, probatumq; futurum: te quidem ego in dies magis magisq; diligo, plurimiq; facio. Iazarum meum uerbis meis saluere iube, itemq; cæteros, quos amicos ferè habemus communeis. me, quominus plura scribam, meæ molestæ grauesq; sollicitudines, & cura rerum necessariarum auocat. V. cal. Ian. Roma.

Petrus Bembus Io. Bapt. Fideli S. D.

QVOD ad me bellam epistolam, & pereruditam dedisti, gaudeo, eoq; magis, quòd horum temporum iureconsulti bonas, hoc est latinas literas ne attingunt

attingunt quidem. Itaque tu, qui sermonis elegan-
 tiam cum sapientia coniunxisti, pluris unus facien-
 dus es, quàm alij sexcenti. Quod uero etiam ostrea
 mihi misisti: de eo tibi multis nominibus gratias
 ago: primum, quòd suburbana: neque enim sunt
 cum nostri maris ostreis, cibi, saporisq; præstantia,
 ullius maris ostrea conferenda: deinde, quòd tanto
 numero, ut non meas modo cœnas, sed amicorum
 etiam meorum conuiuia locupletarint, fecerintq;
 lætiora: Deinde quod succo tam recenti, ut nihil po-
 tuerit esse suauius: Postremo autem, quod quidem
 omnium maximum, atque opportunissimum fuit:
 ea ipsa ante alios deuorata cibos, tanto mihi usui,
 tamq; præsentifuerunt, ut pituita, qua magnopere
 uexabar, me reliquerit, ac somno, quem penitus
 amiseram, restituerit. o te medicum mihi quidem
 præclarum, atque mirificum. non enim uereor, ne
 te pigeat medicinæ artem ad pristinam tuam le-
 gum peritiam addidisse, cum Valerius Superchius
 medendi disciplinæ, in qua excellit, iuris ciuilibus
 scientiam adiunxerit, collegio Medicorum a tributi
 collatione in senatu defenso, ipso fratre tuo, Mat-
 theo fideli, uiro ornatissimo, reliquisq; fisci, & rei
 publicæ aduocatis reclamantibus. unum mallet,
 socium

socium me tuum in illa piscatione, de qua commemoras, habuisses: ea uoluptate, quæ tua tantum fuit, non caruissem. quanquam quidem eius etiam me uoluptatis participem eadem illæ literæ tuæ fecerunt: ita ipsam ante oculos rem mihi stili tui coloribus depinxisti: sed de his hæcenus. Altera fuit tuarum literarum pars, et quidem prior, qua me in cælum fers miris laudibus, cum te maxime delectatum fuisse meo aduentu significes ad Prioli nostri uillam, qua in uilla biduum una iocundissime fuimus: istud tu quidem more uestro, qui magni causarum patroni, paruulas sæpe res oratione facere maximas consueuistis. ego uero, qui nullam omnino rem exornare, atque comere, quicquid ad ueritatem uerbis addere nihil didici, si me dicam tuo lepidissimo sermone, iocis, serijs, omni denique consuetudine maximopere tunc delectatum, nihil unquam te uno comius, nihil amabilius uidisse, planè non mentiar: quod mehercule toties dico, quoties in eum sermonem ingredior, ut illo de nostro eius bidui conuictu, aut certe de te ipso sit dicendum. sed hæc malo te ex alijs cognoscere, quàm ex me. Priolum, Naugerium si saluere iusseris, erit mihi pergratum. Vale. Patauio XI. cal. Feb. M. D. XXXII.

Iacobus

Petrus Bembus Cosmo Gherio Episc. Fanen.

EX tuis literis, quæ me de tua apud Fanum mensionē, reliquisq; tuis rebus erudierunt, magnā cepi uoluptatē: propterea quod & elegantes ipsæ sunt; neque tantum latine, sed etiam polite, atque subtiliter scriptæ, & tuam erga me beneuolentiam, quam ego semper feci plurimi, magnopere præseferunt. itaque nihil mihi potuit optatius accidere, quàm tuum & in bonarum artium studia, literasq; nostras progressum, & in me amorem te scribente agnouisse. delectatus enim sum, quod addis, academici tuæ desiderio, sic enim appellas, quam hic prope unus constitueras, incredibiliter teneri. confido enim, si id ita sit, te ad nos aliquando reuersurum: quanquam quod postea Bononiam profectus es; uereor, ne te Romanæ reip. tibi propositæ magna cum spe actiones, & munera intercipient. sed hæc Deus aliquis gubernabit. recordor enim quæ mecum discedens amantissime his ipsis de rebus es collocutus: neque tibi ea puto excidisse: de quibus ego tunc tua captus amabilitate, humanitate, tuisq; uirtutibus incensus te de me, quid sentirem, sedulo

G quærentem

quærentem amice, atque fideliter monui. Reliquum est, ut, cum tibi persuaseris, me amantissimum tui esse, hoc etiam mihi des, ut in te expetendo, & tibi prospera omnia, feliciaq; optando concedam nemini. Cola meus plurimam salutem impertit Ludovico tuo: item ego, tu salve, & Vale.

Petrus Bembus Hieronymo Nigro S.

QVAS scribis alteras te ad me dedisse literas, ea mihi non sunt redditæ, quemadmodum te cognosse uideo, id enim ascribis. itaque carni delectatione eius partis, quam te dicis eas in literas coniecisse, qua in parte tui ad urbem aduentus, urbanarumq; rerum significatio continebatur. Non enim uereor, ne quid essem eius generis desideraturus, si tuas literas accepißem. Altera erat pars earum literarum gratulationis tuæ, de imposito mihi onere ab senatu, sic enim malo dicere, quàm munere, urbis nostræ res gestas conscribendi. Eam tu partem alteris tuis recentibus in literis non tam reponis, quàm etiã auges, ut conijcio, exornasq; honorificentissimo de me ipso testimonio iudicij tui, accendisq; me ad eam scriptionem grauissimis amantissimisq; uerbis

uerbis. Ego uero Niger, quod tu de me optime sentias, plurimum lætor. quem enim ualde amo, quæque & doctrina, & prudentia excellere existimo, eundem mihi multum tribuere uehementer gaudeo. Quod cæteri: si ita est, facile angor, duramq; mihi conditionem esse propositam uideo, non solum amicis hominibus, ut tu es, sed etiam alienis, atque inuidis satisfaciendi. quod quidem quàm difficile sit, præsertim in magna expectatione hominum, te latere minime puto. Quid, quod ex summo otio in laborem plurimum, atque max. incidimus ea ætate, qua qui sapiunt, portum potius, & requiem petunt? sed dabimus certe operam, ne uel nobis ipsis, si erit in eo aliqua laus, uel omnino patriæ defuisse uideamur. Nam quod Naugerium extollis maximis, uerissimisq; laudibus, facis cum ex tuo iudicio tum ex tuis etiam moribus. quanquam quis est, qui non idem sentiat. quis, qui non eius mortem eluxerit? qui non in eo clarissimum horum temporum lumen extinctum esse, atque sublatum putet? sed hæc alias: tu, quod facis, nos ama, & te a nobis amari, maximiq; fieri existima. breuitas mearum literarum indicio tibi esse poterit me in maximis occupationibus uersari. Te baldeo, & Colotio multā salutem

E P I S T O L A E

salutem: Vale. tert. Id. Ianuar. M. D. XXXI.
Venetijs.

Petrus Bembus Paulo III. Pont. Max. S. P. D.

N V N T I V S Idibus Octobrib. allatus in-
credibili Cardinalium omnium consensu te Ponti-
ficem Max. esse factum, magna me lætitia perfu-
dit, cum tibi, quem quidem ego propter singularem
optimarum artium doctrinam, maximas, innume-
rabilesq; uirtutes cū amplissima familiæ dignitate
coniunctas uiginti totos annos summo studio colu-
issem, liberalemq; in me, atque beneficum sæpenu-
mero essem expertus, tam latam, atque in omnes
terras patentem ditionem, tam amplum imperium
delatum intelligerem: egiq; Deo opt. Max. gra-
tias, quod & mihi, cæterisq;, qui easdem bonas li-
teras, & præclara colunt studia, eum Principem,
ac rerum dominum dederit, a quo sit magna nobi-
lissimarum disciplinarum seges, & prouentus ex-
pectandus, & christianæ reip. procellis temporum
turbulentissimorum iactatæ gubernaculo eiusmodi
magistrum adhibuerit, quo regente nemo non mo-
do naufragium expauescat, sed ne ullam quidem a
recto

recto cursu declinationem timeat. Quæ cum ita sint, de regno ac maiestate ista, quæ nulla unquam maior inter homines extitit, cum mihi ex animo, atque uerissime gratulor, eoq; magis, quod ad te ornandum multo max. diuersarum partium hominum inter seq; dissidentium partum & propensio, & alacritas, atque idem plane studium accessit, ut ista declaratio Deorum immortalium uoluntate potius, quam humanis consilijs suscepta fuisse uideatur: tum eiusdem reip. causa uehementer gaudeo, atque imprimis Romæ ipsius patriæ, atque altricis tuæ, in cuius urbis ciuitatem Pontificatum Max. quo quidem illa iam annos plus cētum caruerat, tui fama nominis, & uirtutum claritate reuocasti, & Romanos ciues tuos, fortunæ contumelia diu grauiusq; conflictatos, prima regni die portorij acerbioribus sublati tua liberalitate recreasti; ut sperandum plane sit, urbis uulneca his accepta temporibus, quæ quidem ualde multa sunt, atque adaucta penitus, te unū breui sanaturum, damnaq; omnia, & detrimenta sarciturum. quanquā quidem multo plus est totum illud, quod de te sperant homines, quodque iam sibi ipsi pollicentur. Nam, quæ tua est prudentia, constantia, grauitas,

animi magnitudo, celeriter te intestina christianæ
 societatis bella compositurum, atque incendia re-
 stincturum putant; cuius rei plura iam signa, atque
 indicia tuis in actionibus publice habitis conspe-
 xerunt: atque est hoc ipsum medius fidijs tam am-
 plum, tam eximium, tam laudabile, ut in hoc uno
 cuncta inesse diuini Pontificis munera sit existiman-
 dum. sed mihi tamen, & antiquorum Regum, &
 clarorum imperatorum res pace gestas considerati,
 illa pulcherrima, atque humano generi, & naturæ
 propria, maximeq; salutaris semper est uisa, qua il-
 li suum studium ad bonas artes fouendas, atque or-
 nandas transulerunt: quo ex fonte quantæ, quãq;
 illustres in hominum conuentus utilitates, ac iocun-
 ditates permanarint, nemo te melius intelligit,
 cuius præstans, & excellens in Latinorum, & Græ-
 corum literis eruditio omnes, qui ei rei se dedide-
 runt, in eam spem adduxit, ut per te celeriter ma-
 gnum incrementum sumptura bona studia existi-
 ment. ea spes ne quenquam destituat, non postrema
 tibi cura est adhibenda: atque, ut facile coniector,
 præclara adhibebitur. noui enim animi tui sen-
 sum ad omnem optimarum actionum laudem, &
 ueræ gloriæ cumulum undique colligendum. sed nō
 committam

committam, ut qui ad hanc scribendam epistolam
ut tibi gratularer initio me contuli, nunc te homi-
nem omnium sapientiss. ad ea horrer, ad quæ &
uitæ summa cum dignitate actæ institutio, & na-
tura, & mores omni elegantia, & suauitate prædi-
ti, ac perpoliti tui, & humanitas ipsa te incendūt.
unum addam: si per valetudinem mihi licuerit, da-
bo operam, ut communi hac gentium, & sæculi
nostri lætitia præsens fruatur, pedesq; tuos deosculer.
Vale. Patavij. XIII. cal. Nouemb.
M. D. XXXIII.

Petrus Bembus Iacobo Sad. Card. S. P. D.

EGO uero amo probitatem tuam, uel potius
uerecundiam: qua te perturbari uideo uerentem,
ne non recte feceris, qui amplissimum à Paulo Pöt.
Max. delatum tibi munus non respueris. ostendis
enim in eo te ijs honoris, & dignitatis insignibus
nō magnopere commoueri; à quibus plerique cla-
ri, & præstantes uiri ita ducuntur, ut etiam insa-
niant. tum autem magni antea, & erecti animi
nova ista contractio, ac debilitas, ut uere dicam
quod sentio, mihi non probatur. An qui omni tem

pore nullum laborem recusaueris, ut prodesse hominibus posses, cum exemplo, & institutione eorū, quos te regere oportuit, populorum; tum lucubrationibus, & scriptis, quæ plurima, longeq; præstantissima confecisti: nunc cum te Deus opt. Max. ad rem suam una cum reliquis Principibus procurandam euocarit; quid te deceat facere ignorabis, aut ambiges? neque lætus, atque alacer in commune bonum hoc, quod tibi oneris imponitur, sustinebis, ac perferes? omnino tanquam fabulæ, sic uitæ posteriorem quæque actum esse optimum, atque luculentissimum oportet. Itaque qui adolescens, qui uir semper te laudabiliter gessisti, nunc, cum ætas ingrauescat iam tua, profecto omnes ueræ gloriæ partes tibi sunt, cumuliq; colligendi: ut non hominum modo expectationi, quam de te recte agendo, recteq; sentiendo excitasti, sed tibi ipsi quoque ampliter, atque magnifice respondeas. etiam times, ne quid de mea pristina æstimatione tui, opinioneq; amiseris: amisisses, si oblatam dignitatem reiecisses. suscepta multo te prudentissimum fuisse, & rectissimum me iudico, & agnosco libentissime. illud quidem quod ais, ipse si te defendendum suscepero, purgatum te omnibus hominibus fore confidere: nihil fuit

fuit necesse te adscribere. tua te antea acta uita, mo-
res, probitas, doctrina, munus ipsum Episcopale,
quo multos iam annos fungeris, te tuentur, atque
ita quidem tuentur, ut aliter statuisse salua constan-
tia non potueris. Me abs te in dies magis magisq;
diligi, ualde medius fidius gaudeo: teq; uidere, at-
que amplecti incredibiliter cupio: ut etiam hac
ætate qua sum Romam cogitem. Cardinali Capua-
no si plurimam salutem dixeris meis uerbis, erit mi-
hi gratū. Vale. Pridie Non. Ian. M. D. XXXVII.
Patahio.

Benedictus Accoltus Cardinalis Rauennæ

Paulo III. Pont. Maximo S. P.

QVOD Sanctitas uestra tanta me benignita-
te, atque humanitate complexa sit, quantam uix
ausus fuisssem sperare; meq; suis literis, honorificen-
tissime scriptis, una cum cæteris collegis meis ab-
sentibus ad suum sanctissimum gremium, hoc est, a
desperatione omnium rerum ad optimam spem sum-
mo beneficio reuocarit; ago illi de eo nunc gratias
quas possum, relaturus in tempus sempiternum in-
gentes non solum illi, uerum etiam toti illius gene-
ri;

ri; si quando mihi, bono aliquo fato, per iacentes fortunas meas licuerit, præclarum aliquod erga illam, suosq; omnes gratissimi animi statuere documentum. sed, ut mihi nihil sit, neque esse debeat optatius, quam aduolare quamprimum ad s. uostram: cum tamen hæc illius permissio nec opinanti, atque à rebus omnibus imparato inciderit; multa impediunt; mihiq; magnis adhuc, & importunis æris alieni molestijs implicato, quemadmodum s. uestrae facile poterit constare, plane uim afferunt: quæ sunt eiusmodi, ut animo meo, sine præcipiti fortunarum mearum ruina, morem continuo gerere non possim. Quam obrem summis precibus peto à s. uestra, ut mihi ab illius clementia, & benignitate, quæ ego mirificam sum sæpe expertus, quæq; nunquam exhauritur, hoc impetrare liceat, ut ne discessionem prius apparare necesse sit, quam id, facultatibus meis explicatis, aliquo meo commodo facere possim. in quo si apud eandem benignitatem atque clementiam meæ ualebunt preces; hoc beneficium, quod a sanctitate uestra uocatus accipio; quodq; maximum esse existimo, nouo atque incredibili beneficio cumulabitur: colligam interea dissipatas rationes meas, & possessionibus meis pessime
sime

sime affectis medicinam, si non optimam, at saltem aliquam adhibebo: ut inde ea, quæ possint, ad hanc usum exprimantur. Ac mihi uehementer dolendum est, cum mea, & amplissimorum collegarum meorum uoluntas, ut arbitror, eadem sit, non eandem item esse rationem. qua de re uniuersa plenius scripsi ad Illustrissimum, & honoratissimum Cardinalem Farnesium, ut is, quæ summa est illius humanitas, et in me beneuolentia, hoc, quod a S. uestra suppliciter peto, quodq; ad unicum rerum mearum remedium, uel salutem potius, maxime pertinet, pro me ab ea deprecetur. cui, pedes sanctissimos osculatus, me humillime commendo. Pridie Id. Ian. M. D. XLII, Venetijs.

Car. Sadoletus Car. Rauennæ.

NIMIVM iam diu est ex quo ego ad te nihil literarum dedi, eum neque libentius faciam quicquam, quam loqui tecum per literas, ubi coram non datur, & tu mihi in intimis sensibus assidue sis infixus: sed indicabo tibi quæ me ratio deterruerit. Venerant superioribus diebus ab urbe Roma nuncij, mihi pergrauēs, omnibus meis molesti, qui te aduersa

aduersa uoletudine uehementer laborare, nec longe abesse à periculo uitæ nunciarent; scribere ego non poteram, quàm tum mihi ea res molestiæ & doloris attulisset, quantoq; in metu, & quàm sollicitus per eos dies fuisssem, nullum ut tempus uitæ uiderer mihi unquam expertus esse acerbius. eum iacerem totus & animo, & corpore, & ut timidus est amor, multa mihi intolerabilia proponerem, ecce tibi fortunatiores nunciij, melius iam tibi factum esse, teq; periculo uacuum à morbo pene iam conualluisse, huc ad nos perferunt. sustuli manus uidelicet, & Deo omnipotenti gratias maximas egi, quòd is sua bonitate & clementia, cum tua, & omnium, qui te diligunt, uota, tum meas quoque preces exaudisset, quas ego illi obtuleram pro tua salute plurimas. Quid quæris? non minus ego, quàm tu, à morbo illo atque periculo uidebar esse releuatus, solq; mihi, quàm unquam ante, multo splendidiore illuxerat. sed cum ad te tum re recenti scribere cogitarem, ut scires quanto cum gaudio hunc posteriorem accepissem nuncium, iccirco non feci, quia ueritus sum ne rem minorem, quàm erat, facerem, cum nequirem plane tibi exponere magnitudinem lætitiæ, & sensum animi mei. in quo ipso

animo

animo meo non ego met sum, quàm tu, magis locatus & insitus: tantum potest apud me tuorum erga me meritorum, maximorum quidem illorum & creberrimorum, memoria, fidesq; ea, quam de tua in me beneuolentia multis mihi iam signis certissimâ fecisti. ut non pluris ego partes in me ipso habeam, quàm habeat meus mihi optatissimus & carissimus Rauennas. sed hæc forsitan memoratu superuacaneæ nunc sunt: amoris enim potius sunt, quàm opportunitatis: cui me tamen parere amori & cedere, interdumq; me ab illo sinere arripi, quo tua maior & magis excellens est humanitas, hoc minus mihi uitio & imprudentiæ assignabis. illud, quod mihi uidetur non opportunum modo, sed etiam necessarium, nequaquam prætermittam, primum ut gratuler, neque id adeo tibi potius, quàm mihi, quòd incolumis nobis seruatus sis; quo munere nulum ab Deo immortalis de his, quæ infra cælum tribui nobis solent, uideor maius sperare aut expetere posse: deinde ut te rogem ac deprecèr, si te ipsum & nos diligis, qui sumus profecto tui, et si rem non modo gratam, uerum etiam salutarem nobis facere cogitas, quod tamen semper fuit proprium & naturæ & beneficentiæ tuæ, cures, agas, enitare, efficias

E P I S T O L A E

ficias denique optime mi Accolte, & suauissime,
 recte uti ualeas. Cælum istud uereor, in quo tu uer-
 saris, ut tibi minus salubre sit: nam ego quoque il-
 lud, eum degebam isthic, infensus mihi sentiebã.
 si habes facultatem commodioris loci, migrandum
 censerem: sin minus, potest tamen haberi ratio eius
 modi uictus, ut aduersus malitiam extranei aeris
 salus tua tuta & munita esse possit. sed nimis incon-
 siderate prouehor, qui audeam monere hominem
 summi ingenij summæq; prudentiæ. Ignosce obse-
 cro amoris meo: cui dum obsequor, non tam quis ego
 sim, aut tu qui sis, quàm quid maxime optem, &
 cupiam, cogitauì. saluiatum collegam nostrum,
 summæ uirtutis, summæq; amplitudinis, si isthic
 est, meis uerbis saluere iubeas uelim quampluri-
 mum, simulq; ei nuncies, me secundum operis mei
 de ædificatione ecclesiæ librum confecisse, eumq;
 Romam misisse, ut illic doctorum & bonorum uiro-
 rum iudicijs expendatur: nunc me uersari in elucu-
 brando tertio. Quibus in meis uigilijs omnibus,
 non nomen solum & imago, sed memoria quoque
 ipsius erga me beneuolentiæ mihi assidue ob ani-
 mum præsens & proposita est. Vale mi dulcissime
 & desideratissime Raennas, iterumq; & sæpius
 uale

uale atque salue etiam atque etiam. ex S. Felici
dioc. nostræ cal. Augusti. M. D. XLI.

Car. Rauennæ Cardinali Sadoletto .

QUANTAM mihi doloris tui ex periculo
meo significationem proximæ tuæ literæ attulerint,
uel ex eo potes cognoscere, quòd ego, qui unice il-
lis soleo delectari, perlectis tamen uarie sum affe-
ctus. nam etsi nihil potest mihi tam iucundum acci-
dere, quàm constantis, summiq; tui erga me amoris
d eclaratio: quadam tamen quasi * est effectum, ut
tua illa de mea inualetudine molestia nō parum in
me redundaret, rursusq; singularis de me cura, ac
studium incredibiliter recrearet. itaque tibi primū,
quas hoc tempore possum, de eo gratias ago, relatu-
rus ingentes, si quando ū fructus, qui à me tibi
tuisq; omnibus maximi atque uberrimi debentur,
ad suam, ut spero, maturitatem peruenient: dein-
de, quod tu ualde expetis, ego item tibi ualde polli-
ceor, istam tuam tam egregiam, uereq; paternam
beneuolentiæ charitatem mihi posthac acris moni-
toris loco futuram esse, ut ualetudinem, qua satis
iam firma uideor uti, omni ratione, & diligentia
tuear.

tuear. ac cum mihi singulari aduersus morbum superioribus mensibus fuerit adiumento cœli mutatio, quo etiam nunc utor præsidio; cumq; iam antea decreuissem per æstatem saltem & autumnum in locum commodiorem mihi esse migrandum: tamen multo id exequar constantius, tuis prudentissimis monitis in ea sententia confirmatus. Saluiatum collegam nostrum, qui te summe diligit, summamq; tuam uirtutem plurimi facit, per literas saluere tuo nomine iubebo: quodq; & illi, & bonis omnibus magno futurum est gaudio, nunciabo, tertium librum de ædificatione ecclesiæ te esse aggressum scribere, secundo iam absoluto. Vale. XV. cal. Octob. 1541. Venetijs.

Paulo III. Pont. Max. Benedictus Accoltus
Cardinalis Rauennæ S. P.

SANCTITATIS uestræ gratissimæ literæ ad III nonas Nouembris datæ, mihi pridie idus redditæ sunt, cum acerbissimo cruciatu difficilis morbi, qui renibus atque intestinis pertinaciter inhæserat, febrîq; item uehementissima non multo ante conflictatus essem. et ut uoluptatem ijs legendis

dis cepi maximam, quia me ad urbem, redeundi cupidum, uerbis honorificentissimis euocarent: sic dolorem hausi prorsus incredibilem, quòd ita contigisset, ut eam uoluntatem, qua ego incitatus, ad beatissimum sanctitatis uestræ gremium, tanquam ad exoptatum nidum, reuolare statim cupissem, aduersæ ualeitudinis molesta difficultas impediret: Non est ignotum sanctitati uestræ, quæ etiam meâ uicem aliquando miserata, pro paterna quadam pietate indoluit, quàm crebro, & quàm grauiter, modo ex renibus, modo ex intestinis, anno superiore laborarim, cum fere quotidie, genere dolorû acutissimo confixus, quos semper febris consecuta est, dubia spe uitæ spiritum misere ducerem. illius periculi memoria, & impendentis timore adductus, putavi diligenter mihi esse operam dandam, ut meam ualeitudinem, uehementer ex ægrotatione quatesactam, aduersus importunam atque adeo horribilem morbi tam infesti uim, aliquo remedio munirem: præsertim cū ex iisdem doloribus quotannis solitus essem periculose ægrotare. itaque cū medicos consuluissem, iſq; mihi respondissent, plane sibi uideri, necessarium esse, ut aquis uterer Regiensibus primum, deinde Lucensibus; feci, &

utrisque sum usus. sed, ut est incertus nostrorum consiliorum euentus, accidit infelicitur. nam aquarum magna uis epota, & omnibus rebus ad præscriptum medicorum prope cum religione seruatis, tamen quod maxime factum oportuit, id quidem non euenit, ut renibus necessaria refrigeratione roboratis, diuturnus, ac multiplex morbus depelleretur; quod autem minus oportuit, id est effectum, ut & in febrem assiduam, doloresque acriores inciderim; & in stomacho glacies quasi quædam conserderit. Habet sanctitas uestra, quæ me causa, diutius quam uoluntas fuit, in his locis morata est. accessit etiam altera, de qua, morbo periculossimo afflictus, hætenus ad illam non scripsi; qua quidem maiorem in modum, his tantis omnium rerum perturbationibus, hoc præsertim præstantissimo Duce non leuiter ægrotante dislineor, magnæ scilicet cura munus mihi nuper à Cæsare, singulari quadam summæ uoluntatis significatione assignatum, neque solum ad priuatas illius, easque maximi ponderis rationes, uerum etiam ad summam Christianæ reip. magnopere pertinens, quod omne sanctitas uestra à clarissimo uiro Cæsaris legato plenius poterit cognoscere. Nunc sanctitatem uestram suppliciter

pliciter rogo, ut pro ea bonitate atque clementia,
 qua & omnes, & me quidem semper imprimis est
 complexa, spatium, dum à morbo confirmor, dumq;
 Cæsari, de me optime merito, aliquam, ad ipsius uo-
 luntatem, gratiam refero, cum profligatæ & pe-
 ne perditæ ualitudini, tum grati hominis officio
 concedat. cuius pedes sanctissimos cum uenera-
 tione humiliter osculans, ac illi perpetuam in ui-
 ta felicitatem exoptans, me ex omnibus intimis
 animi mei sensibus commendo. Florentiæ. XVII.
 cal. Decemb. M.D. XLIII.

Benedictus Rhambertus Philippo Gherio
 fratribusq; S. D.

QVANTVM mihi mœroris attulerint Lu-
 douici Beccatelli literæ, quas de Cosmi Gherij Epi-
 scopi, diuini plane iuuenis, fratris uestri, optimi
 atque sanctissimi, morte ad Bembum scripserat, nō
 commemorabo nunc pluribus uerbis. cui enim ue-
 strum ignotum est, quàm arcte inter nos singula-
 riterq; amaremus? cuius cum mihi amicitia rebus
 omnibus carior atque incundior esset, eò studia mea
 cogitationesq; dirigebam, ut, quos ille maxime
 H 2 amaret,

amaret, ego quoque diligerem: factumq; ex eo est,
 ut uos proxime, atque ille, semper caros habuerim,
 magnosq; atque honestos esse concupierim. quibus
 nunc illius morte in lacrymis ac solitudine relictis,
 utinam Deus opt. max. tantam mihi facultatem da-
 ret, ut & uobis dolorem istum, squalloremq; eripe-
 re, & in eum, quo deiecli estis, locum restituere
 uos dignissimos possem. libenter enim utrumque
 efficerem: quoniam me in utroque sanctissimis
 illis manibus gratissimum facturum certo scirem.
 sed cum alterum fortuna in aliorum manu posue-
 rit; à quibus hoc uobis expectandum est; alterum
 uero, ne uos consolatione aliqua iuuare possim,
 ægritudine ipsa mœnoreq; mihi ademptum sit: ue-
 lim uos, optimi & concordissimi fratres, domesti-
 cum dolorem fraternumq; domesticis exemplis fra-
 ternisq; toleretis. quòd si eam ingenij indolem,
 quæ uestra est, ad illius imitationem contuleritis;
 præclaramq; morum, uirtutis, probitatis, animiq;
 cœlestis plane iuuenis illius effigiem, quantum in
 uobis erit, expresseritis: tum sane non exiguam do-
 lori uestro leuationem inueneritis; tum eundem
 ipsum, qui antea fratrem uestrum omnibus uirtu-
 tibus atque doctrinis præditum suo beneficio au-
 xerit,

ixerit, ad uos eodem modo cohonestandos facile al-
licietis. Quæ nisi uos uestra sponte facturos esse,
planeq; iam facere, cognoscerem; darem hoc Cos-
mi mei cineri atque ossibus, eiq; amor, qui etiam
nunc uiget in me, uigebitq; tandiu, quoad uiuere
desinam, ut uos in illius gratiam cohortarer ad
ingenia excolenda, uirtutesq; eas toto animo ca-
pessendas, quæ tum, tranquillam ut uitam uiua-
mus, facile præstant, tum memoriam nostri in om-
ne tempus omnesq; gentes disseminant. uerum, ut
dixi, nihil necesse est. illud autem potius agendum;
ut plane intelligatis, me amorem illum eundem
meum, animum, memoriam tum erga fratrem ue-
strum, qui mihi mortuus non est, conseruare inco-
lumem; tum, quoniam ille frui amplius ijs, quod
unum mihi acerbissimum in uita contigit, minime
potest, ad uos familiamq; uestram libenter trans-
ferre. qui si à mea fide ac diligentia omnia expe-
ctabitis, quæ uel ad pietatis in illum meæ testimo-
nium, uel ad commodum utilitatemq; uestram per-
tinere poterunt: efficiam profecto, ut, neque me te-
mere pollicitum, nec uos à me quicquam frustra
sperasse, intelligatis. Valete unanimi ac suauissimi
fratres, meisq; uerbis Beccatello uestro, Colonioq;

42 E P I S T O L A E
meo, si apud uos est, S. P. D. Venetijs, nonis
Octobris, M. D. XXXVII.

Benedictus Rhambertus Paulo Manutio S.

EGO uero ex eo à uobis animo discessi, ut hic
non aliter uinerem, quàm in urbe consueueram:
et, quoniam idem à te probari intelliga, sequar con-
siliū tuū: quod non ab amore modo profectum
est, quo me mirifice prosequeris; sed etiā ab eo usu,
qui te quondam istiusmodi pene morbo laborantem
à corporis imbecillitate ad integram ualeitudinem
perduxit. itaque inuitatu etiam tuo, consuetudi-
nem parce moderateq; uiuendi meam tenebo: quo-
tidieq; ut præcipis, exercitatione modica utar: at-
que in eo mihi satis, ut in malis est, lucri fecisse ui-
debor, quòd ex ista medicorum quasi lanionū turba,
uiuus effugerim. at, inquis, nihil agis, nisi iucunde
uiuas. omi Manuti, quàm tu mihi omnium homi-
num cantilenam recinis. et quis est, oro te, qui non
idem præcipiat? facile, cum ualemus, omnes recta
consilia ægrotis damus. equidem cum ex longa ca-
pitis imbecillitate perpetuo laborem; cumq; sem-
per aliquis in stomachum, quia languens ac puti-
dus

duſ eſt, incurſet dolor, qui poſſum eſſe non triſtis ē
uel quia eſt quod doleat, uel quia earum rerum ca-
reo delectatione, quibus abundant alij. ocio fruor
inertiffimo, ſine libris, ab omnibus negocijs non uo-
luntate liber, ſed odioſa neceſſitate coactus. quin
etiam, quo homini grauius accidere nihil poteſt, a
mente ita deſeror interdum, ut nec audire diutius
loquentem quempiam, nec ego alloqui alios pro uo-
luntate, nec plane ad ullas meas cogitationes aciem
ingenij poſſim intendere. quod uerum eſſe, ſi, quan-
tum hæc literæ hallucinētur, aduerſes, facile cogno-
ſces: hic tamen tu me ad animi tranquillitatem, at-
que etiam hilaritatem uocas. At uide qui ſim. Ego,
ſi perpetuam corporis inualetudinem moderate fer-
re, quin etiam mortem ipſam, ueluti Tantalosaxū,
capiti meo ſemper impendentem ſine ulla trepida-
tione conſpicere, non modo tranquilli, ſed etiam for-
tis animi eſt; tranquilliffime uiuo. ſed iſtam hilari-
tatem, quæ uerbo magis, quàm re, percipi poteſt;
nunquam deguſtaui, neque ulla mihi ſpes oſtendi-
tur fore, ut ad eam aliquando perueniam: non enim
ego, ut multum, uoluptatem aliquam poſſum à ludis,
et a laſciuia petere, quam ſtatim poenitentia dolor
conſequitur: nec in ambitione, aut copijs incundi-

tatem animi reponere: quas quidam ut consequantur insaniunt; & affectas ne amittant, semper re formidant. uellem ut Deus, cui uisum est in tam uiridi, planeq; florenti ætate mihi corporis uires adinere, unum hoc mihi largiretur, ut animus meus ab omni alia cura solutus ac liber, in illius unius amore conquiesceret. tunc ego quidem non modo incunde, sed plane etiam feliciter in perdita mea, propeq; desperata ualitudine uiuerem, omniumq; fortunas facile superarem. quod mihi ut aliquando contingat, non despero. interim uiam meditor, quæ munitissima sit, & maxime certa. ad quam tu inueniendam si quod artificium tenes, doce me. dedi satis reipublicæ, dedi priuatis occupationibus, & amicorum temporibus satis. corporis quoque curationibus tantum dedi, quantum humana ratione prouideri atque consilio potuit; neque, quo minus conualuerim, ulla mea culpa contractum est. omnia sensi esse falsa in spe, atque fallaci posita. igitur à Deo petenda salus et quies est. ad quem, o mi Manuti, quid est, cur nos non omni festinatione properemus? Vale. III. cal. Octob. M. D. XLIII. ex Rosario meo.

vbaldinus

Vbalдинus Bandinellus Petro Bembo S. P. D.

IACOBUS Sadoletus Cardinalis cum mihi caput quoddam literarum tuarum legisset, quo capite ad ea rescriptum erat, quæ is tecum meo rogatu, de meo non modo uirtutum tuarum honorificentiss. iudicio, uerum etiã perpetuo erga te studio egerat, etsi iisdem literis satisfactionem nostram accipere, teq; mihi placatum esse affirmabas, tamen, quod à principio altius hæsisse tibi obrectatorum meorum criminationes declarabas, quodq; eas magis amici gratiæ condonatas, quàm tibi satis purgatas significabas, faciendum mihi uisum est pro animi mei conscientia, proq; eo quanti te facio, ut aliquid iisdem de rebus ad te literarum darem, quibus aut uoluntatem meam tibi uere, planeq; probarem, aut illam apud cæteros certe testatam relinquerem. et quoniam omnis offensio orta est ex epistola quadam Nigri, quâ ille cum ad te de iudicijs hominum urbanorum de tuis epistolis pontificijs perscriberet, me illas uehementer uituperare criminatus est, quomodo omnis hæc res acta sit, breuiter simpliciterq; narrabo. Ego cum in tabernali
braria

braria forte adessem, adessetq; Molsa noster, aliq;
nonnulli; Niger autē, ut opinor, et certe non adesset,
ortus est de his ipsis epistolis tuis sermo, quidamq;
ex ijs, quid de illis sentirem, ex me quaesivit. cui ego
sine ulla cunctatione respondi, satis eas sua prae-
scriptione laudatas uideri debere, quid enim inquam
à Bembo proficisci nisi doctum atque elegans po-
test? tū hoc addidi, me illos libros tamen uendibilio-
res putare fuisse futuros, nisi à certis uerbis obsole-
tis illis quidem, sed tamen huic descriptioni pene ne-
cessarijs, tantopere refugisses. cum enim tantum tuū
nomen esset, nemo non solum harum liberaliorum,
humanarumq; artium studijs deditus, sed ne scriba
quidem ullus, aut librarius eos habere noluiisset,
praesertim cum eius generis epistolae sint, quae in
maxima parte in caeterar. formular. libris non ex-
tent. itaque me illas arbitrari pro dictatis, atque
exemplis esse potuisse: sic uero cum tantum abhor-
reant ab forensi uerborum consuetudine, horum di-
co nostratum, neminem illos nisi doctum in manus
sumpturum, eosq; ipsos magis ut, quomodo ueteres
illi coss. aut praet. locuti sunt, agnoscant, quā
quomodo nostri Pont. loquantur, addiscant. Atque
haec summa sententiae meae, siue, ut uerius dicam,
sermonis

sermonis fuit. nam non tam ut de illis statuerem, quod mea nihil referebat, quam ne nihil subito interroganti responderem, ea à me instituta est oratio. quæ si uere ad te perlata esset, quæ tua est non solum humanitas, uerum etiam prudentia, certo scio, æqui boniq; fecisses. nam prior pars, ut mihi quidem uidetur, perhonorifica fuit, quæ tatum tibi tribuerit, posterior non contumeliosa, quæ nihil tibi nisi quod tu tantopere uitaras detraxerit. neque tamen te eum puto, qui, si quis in tuis scriptis aliquid reprehenderit, ei continuo inimicitias denunciandas censeas, cuius enim id intemperantiæ est? aut qui obtineri potest, ut homines etiam quæ non probent, laudent? quandoque hoc non licuit? nihil faciam insolenter, ne tibi, homini historiæ peritissimo, cui hæc domi nascuntur, commemorabo, quæ uiri amicitia, cæterorumq; officiorum obseruantissimi, necessariorum, atque familiariss. scripta reprehenderint, neque solum sine offensione, uerum etiam plerumque cum gratia. Et profecto ita se res habet. ut qui alterius librum corrigere conatur, si quid affert, quod in rem sit, gratia sit habenda: sin autem, ut sedulitatem non ames, nihil tamen ultra sit, quam ut stultitia rideatur, odio certe, aut simul

etiam ne impudenter, palam, aperte mentiatur. si quidem illi fingere iam id integrum non est, qui cōmunibus amicis, hominibus grauiss. atque ornatiss. quos ad eum allegaui, ita respondit, se ea coniectura duci, ut id à me crederet esse ortum, quòd quendam, quo ego plurimum utor, sit nactus, qui libros illos improbareret. quod ut uerum sit, iam me non sadoleti, sed accusatoris mei oratio, & testimonium omni culpa liberat. nisi solus ego ea conditione sum, ut, cum cæteri uix, aut ne uix quidem se præstent, ipse tum me, tum amicos etiam meos præstare debeam, addo in ea re, qua ne seruos quidem coercere possumus. quis enim unquam seruum constrinxit, quòd ei non placeret is scriptor, quem non probaret? & scilicet is uir est, quem Niger insimulat, qui, dum ego ei præscribam quid de quoque sensurus sit, expectet, ac non potius propter ingenium, doctrinam, nobilitatem, dignitatem, opes, quibus omnibus rebus ille abundat, me arroganter facere arbitretur, si quando meum iudiciū à suo discrepare intellexerit. quo homine ego ita elementi, commi, benigno utor, ut tamen his illius uirtutibus mihi non abutendum perspiciam. Quare ut aliquando tam longam epistolam concludam, Nigrum tuum
parum

parum amice; parumq; prudenter fecisse dico, qui ad te rem parum compertam, planeq; falsam pro certa detulerit, ex qua praesertim tantum odij excitatum iri videret. te autem ipsum, quod tam cito credideris, quodq; ut tuis uerbis utar, eam opinionem penitus indueris, non tam miror, quam quod, cum te iam placatum ostenderes, tibi tamen temperare non potueris quin me asperrime admoneres, operam darem, ut quæ opinio de ingenio meo, doctrinaq; est, eadem de innocentia esset. ad quæ ego ita tibi rescribo, atque respondeo, uitam meam actâ monitis præceptisq; istis, quæ per se fortasse non in scita sint, apud me nullum locum reliquisse, sed à prima adolescentia semper me talem præbuisse, ut nemo tam mihi fuerit inimicus, qui me nocentem unquam appellarit. neque solum me industriæ, morumq; meorum, uerum etiam uitæ ualde pœniteret, si plus in me ingenij, aut doctrinæ, quam innocentiae esse sentirem. quippe, cum ingenium à natura tributum sit, doctrina autem non sine magnis facultatibus, quæ in fortunæ manu pleræque sunt, cōparetur, sola innocentia in nostra potestate relinquitur. itaque illis impune, ac sine uituperatione caremus, hac sine scelere, ac sine supplicio carere

non

tuear. ac cum mihi singulari aduersus morbum superioribus mensibus fuerit adiumento cœli mutatio, quo etiam nunc utor præsidio; cumq; iam antea decreuisssem per æstatem saltem & autumnum in locum commodiorem mihi esse migrandum: tamen multo id exequar constantius, tuis prudentissimis monitis in ea sententia confirmatus. Saluiatum collegam nostrum, qui te summe diligit, summamq; tuam uirtutem plurimi facit, per literas saluere tuo nomine iubebo: quodq; & illi, & bonis omnibus magno futurum est gaudio, nunciabo, tertium librum de ædificatione ecclesiæ te esse aggressum scribere, secundo iam absoluto. Vale. XV. cal. Octob. 1541. Venetijs.

Paulo III. Pont. Max. Benedictus Accoltus
Cardinalis Rauennæ S. P.

SANCTITATIS uestræ gratissimæ literæ ad III nonas Nouembris datæ, mihi pridie idus redditæ sunt, cum acerbissimo cruciatu difficilis morbi, qui renibus atque intestinis pertinaciter inhæserat, febriq; item uehementissima non multo ante conflictatus essem. et ut uoluptatem ijs legen-
dis

dis cepi maximam, quia me ad urbem, redeundi cupidum, uerbis honorificentissimis euocarent: sic dolorum hausi prorsus incredibilem, quòd ita contigisset, ut eam uoluntatem, qua ego incitatus, ad beatissimum sanctitatis uestrae gremium, tanquam ad exoptatum nidum, reuolare statim cupissem, aduersae ualeitudinis molesta difficultas impediret. Non est ignotum sanctitati uestrae, quae etiam meam uicem aliquando miserata, pro paterna quadam pietate indoluit, quam crebro, & quam grauiter, modo ex renibus, modo ex intestinis, anno superiore laborarim, cum fere quotidie, genere dolorum acutissimo confixus, quos semper febris consecuta est, dubia spe uitae spiritum misere ducerem. illius periculi memoria, & impendentis timore adductus, putavi diligenter mihi esse operam dandam, ut meam ualeitudinem, uehementer ex aegrotatione quatesactam, aduersus importunam atque adeo horribilem morbi tam infesti uim, aliquo remedio munirem: praesertim cum ex iisdem doloribus quotannis solitus essem periculose aegrotare. itaque cum medicos consulissem, usque mihi respondissent, plane sibi uideri, necessarium esse, ut aquis uterer Regiensibus primum, deinde Lucensibus; feci, &

H utrisque

utrisque sum usus. sed, ut est incertus nostrorum
 consiliorum euentus, accidit infelicitur. nam aqua-
 rum magna uis epota, & omnibus rebus ad præscri-
 ptum medicorum prope cum religione seruatis, ta-
 men quod maxime factum oportuit, id quidem nõ
 euenit, ut renibus necessaria refrigeratione robo-
 ratis, diuturnus, ac multiplex morbus depelleretur;
 quod autem minus oportuit, id est effectum,
 ut & in febrem assiduam, doloresq; acriores inci-
 derim; & in stomacho glacies quasi quædam conse-
 derit. Habet sanctitas uestra, quæ me causa, diutius
 quam uoluntas fuit, in his locis morata est. acces-
 sit etiam altera, de qua, morbo periculosissimo affli-
 ctus, hætenus ad illam non scripsi; qua quidem
 maiorem in modum, his tantis omnium rerum per-
 turbationibus, hoc præsertim præstantissimo Duce
 non leuiter ægotante distineor, magnæ scilicet cu-
 ræ munus mihi nuper à Cæsare, singulari quadam
 summæ uoluntatis significatione assignatum, ne-
 que solum ad priuatas illius, easq; maximi pon-
 deris rationes, uerum etiam ad summam Christia-
 næ reip. magnopere pertinens, quod omne sancti-
 tas uestra à clarissimo uiro Cæsaris legato plenius
 poterit cognoscere. Nunc sanctitatem uestram sup-
 pliciter

pliciter rogo, ut pro ea bonitate atque clementia, qua & omnes, & me quidem semper imprimis est complexa, spatium, dum à morbo confirmor, dumq; Cæsari, de me optime merito, aliquam, ad ipsius uoluntatem, gratiam refero, cum profligatæ & pene perditæ uoletudini, tum grati hominis officio concedat. cuius pedes sanctissimos cum ueneratione humiliter osculans, ac illi perpetuam in uita felicitatem exoptans, me ex omnibus intimis animi mei sensibus commendo. Florentiæ. XVII. cal. Decemb. M. D. XLIII.

Benedictus Rhambertus Philippo Gherio
fratribusq; S. D.

QVANTVM mihi mœroris attulerint Ludouici Beccatelli literæ, quas de Cosmi Gherij Episcopi, diuini plane iuuenis, fratris uestri, optimi atque sanctissimi, morte ad Bembum scripserat, nō commemorabo nunc pluribus uerbis. cui enim uestrum ignotum est, quàm arcte inter nos singuliterq; amaremus? cuius cum mihi amicitia rebus omnibus carior atque incundior esset, eò studia mea cogitationesq; dirigebam, ut, quos ille maxime

H 2 amaret,

amaret, ego quoque diligerem: factumq; ex eo est, ut uos proxime, atque ille, semper caros habuerim, magnosq; atque honestos esse concupierim. quibus nunc illius morte in lacrymis ac solitudine relictis, utinam Deus opt. max. tantam mihi facultatem daret, ut & uobis dolorem istum, squalloremq; eripere, & in eum, quo deiecli estis, locum restituere uos dignissimos possem. libenter enim utrumque efficerem: quoniam me in utroque sanctissimis illis manibus gratissimum facturum certo scirem. sed cum alterum fortuna in aliorum manu posuerit; à quibus hoc uobis expectandum est; alterum uero, ne uos consolatione aliqua iuuare possim, ægritudine ipsa mœroreque mihi ademptum sit: uelim uos, optimi & concórdissimi fratres, domesticum dolorem fraternumq; domesticis exemplis fraternisq; toleretis. quòd si eam ingenij. indolem, quæ uestra est, ad illius imitationem contuleritis; præclaramq; morum, uirtutis, probitatis, animiq; cœlestis plane iuuenis illius effigiem, quantum in uobis erit, expresseritis: tum sane non exiguam dolori uestro leuationem inueneritis; tum eundem ipsum, qui antea fratrem uestrum omnibus uirtutibus atque doctrinis præditum suo beneficio auxerit,

xerit, ad uos eodem modo cohonestandos facile al-
licietis. Quæ nisi uos uestra sponte facturos esse,
planeq; iam facere, cognoscerem; darem hoc Cos-
mi mei cineri atque ossibus, eiq; amor, qui etiam
nunc uiget in me, uigebitq; tandiu, quoad uiuere
desinam, ut uos in illius gratiam cohortarer ad
ingenia excolenda, uirtutesq; eas toto animo ca-
pessendas, quæ tum, tranquillam ut uitam uiua-
mus, facile præstant, tum memoriam nostri in om-
ne tempus omnesq; gentes disseminant. uerum, ut
dixi, nihil necesse est. illud autem potius agendum,
ut plane intelligatis, me amorem illum eundem
meum, animum, memoriam tum erga fratrem ue-
strum, qui mihi mortuus non est, conseruare inco-
lumem; tum, quoniam ille frui amplius ips, quod
unum mihi acerbissimum in uita contigit, minime
potest, ad uos familiamq; uestram libenter trans-
ferre. qui si à mea fide ac diligentia omnia expe-
ctabitis, quæ uel ad pietatis in illum meæ testimo-
nium, uel ad commodum utilitatemq; uestram per-
tinere poterunt: efficiam profecto, ut, neque me te-
mere pollicitum, nec uos à me quicquam frustra
sperasse, intelligatis. Valete unanimi ac suauissimi
fratres, meisq; uerbis Beccatello uestro, Colonioq;

102 E P I S T O L A E
meo, si apud uos est, S. P. D. Venetijs, nonis
Octobris, M. D. XXXVII.

Benedictus Rhambertus Paulo Manutio S.

EGO uero ex eo à uobis animo discessi, ut hic
non aliter uinerem, quam in urbe consueueram:
et, quoniam idem à te probari intelligo, sequar con-
siliū tuū: quod non ab amore modo profectum
est, quo me mirifice prosequeris; sed etiā ab eo usu,
qui te quondam istiusmodi pene morbo laborantem
à corporis imbecillitate ad integram ualitudinem
perduxit. itaque inuitatu etiam tuo, consuetudi-
nem parce moderateq; uiuendi meam tenebo: quo-
tidieq; ut præcipis, exercitatione modica utar: at-
que in eo mihi satis, ut in malis est, lucri fecisse ui-
debor, quòd ex ista medicorum quasi lanionū turba,
uiuus effugerim. at, inquis, nihil agis, nisi iucunde
uiuas. omi Manuti, quā tu mihi omnium homi-
num cantilenam recinis. et quis est, oro te, qui non
idem præcipiat? facile, cum ualemus, omnes recta
consilia ægrotis damus. equidem cum ex longa ca-
pitis imbecillitate perpetuo laborem; cumq; sem-
per aliquis in stomachum, quia languens ac puti-
dus

duſ eſt, incurſet dolor, qui poſſum eſſe non triſtis ē
uel quia eſt quod doleat, uel quia earum rerum ca-
reo delectatione, quibus abundant alij. ocio ſuor
inertiffimo, ſine libris, ab omnibus negotijs non uo-
luntate liber, ſed odioſa neceſſitate coaſtus. quin
etiam, quo homini grauius accidere nihil poteſt, a
mente ita deſeror interdum, ut nec audire diutius
loquentem quempiam, nec ego alloqui alios pro uo-
luntate, nec plane ad ullaſ meas cogitationes aciem
ingenij poſſim intendere. quod uerum eſſe, ſi, quan-
tum hæ literæ hallucinētur, aduerſes, facile cogno-
ſces. hic tamen tu me ad animi tranquillitatem, at-
que etiam hilaritatem uocas. At uide qui ſim. Ego,
ſi perpetuam corporis inualetudinem moderate fer-
re, quin etiam mortem ipſam, ueluti Tantalosaxū,
capiti meo ſemper impendentem ſine ulla trepida-
tione conſpicere, non modo tranquilli, ſed etiam for-
tis animi eſt; tranquilliffime uiuo. ſed iſtam hilari-
tatem, quæ uerbo magis, quàm re, percipi poteſt;
nunquam deguſtaui, neque ulla mihi ſpes oſtendi-
tur fore, ut ad eam aliquando perueniam: non enim
ego, ut multi, uoluptatem aliquam poſſum à ludis,
et a laſciuiâ petere, quam ſtatim poenitentia dolor
conſequitur: nec in ambitione, aut copijs incundi-

tatem animi reponere: quas quidam ut consequantur insaniunt; & affecutas ne amittant, semper re formidant. uellem ut Deus, cui uisum est in tam uiridi, planeq; florenti ætate mihi corporis uires adimere, unum hoc mihi largiretur, ut animus meus ab omni alia cura solutus ac liber, in illius unius amore conquiesceret. tunc ego quidem non modo iucunde, sed plane etiam feliciter in perdita mea, propeq; desperata ualitudine uiuerem, omniumq; fortunas facile superarem. quod mihi ut aliquando contingat, non despero. interim uiam meditor, quæ munitissima sit, & maxime certa. ad quam tu inueniendam si quod artificium tenes, doce me. dedi satis reipublicæ, dedi priuatis occupationibus, & amicorum temporibus satis. corporis quoque curationibus tantum dedi, quantum humana ratione prouideri atque consilio potuit; neque, quo minus conualuerim, ulla mea culpa contractum est. omnia sensi esse falsa in spe, atque fallaci posita. igitur à Deo petenda salus et quies est. ad quem, o mi Manuti, quid est, cur nos non omni festinatione properemus? Vale. III. cal. Octob. M. D. XLIII. ex Rosario meo.

vbaldinus

Vbalдинus Bandinellus Petro Bembo S. P. D.

IACOBUS Sadoletus Cardinalis cum mihi caput quoddam literarum tuarum legisset, quo capite ad ea rescriptum erat, quæ is tecum meo rogatu, de meo non modo uirtutum tuarum honorificentiss. iudicio, uerum etiã perpetuo erga te studio egerat, etsi iisdem literis satisfactionem nostram accipere, teq; mihi placatum esse affirmabas, tamen, quod à principio aliis hæsisse tibi obrectatorum meorum criminationes declarabas, quodq; eas magis amici gratiæ condonatas, quàm tibi satis purgatas significabas, faciendum mihi uisum est pro animi mei conscientia, proq; eo quanti te facio, ut aliquid iisdem de rebus ad te literarum darem, quibus aut uoluntatem meam tibi uere, planèq; probarem, aut illam apud cæteros certe testatam relinquerem. et quoniam omnis offensio orta est ex epistola quadam Nigri, quæ ille cum ad te de iudicijs hominum urbanorum de tuis epistolis pontificijs perscriberet, me illas uehementer uicuperare criminatus est, quomodo omnis hæc res acta sit, breuiter simpliciterq; narrabo. Ego cum in tabernali
braria

braria forte adessem, adessetq; Molsa noster, aliq;
 nonnulli; Niger autē, ut opinor, et certe non adesset,
 ortus est de his ipsis epistolis tuis sermo, quidamq;
 ex ijs, quid de illis sentirem, ex me quaesivit. cui ego
 sine ulla cunctatione respondi, satis eas sua prae-
 scriptione laudatas uideri debere, quid enim inquam
 à Bembo proficisci nisi doctum atque elegans po-
 test? tū hoc addidi, me illos libros tamen uendibilio-
 res putare fuisse futuros, nisi à certis uerbis obsole-
 tis illis quidem, sed tamen huic descriptioni pene ne-
 cessarijs, tantopere refugisses. cum enim tantum tuū
 nomen esset, nemo non solum harum liberaliorum,
 humanarumq; artium studijs deditus, sed ne scriba
 quidem ullus, aut librarius eos habere noluisset,
 praesertim cum eius generis epistolae sint, quae in
 maxima parte in caeterar. formular. libris non ex-
 tent. itaque me illas arbitrari pro dictatis, atque
 exemplis esse potuisse: sic uero cum tantum abhor-
 reant ab forensi uerborum consuetudine, horum di-
 co nostratum, neminem illos nisi doctum in manus
 sumpturum, eosq; ipsos magis ut, quomodo ueteres
 illi coss. aut praet. locuti sunt, agnoscant, quā
 quomodo nostri Pont. loquantur, addiscant. Atque
 haec summa sententiae meae, siue, ut uerius dicam,
 sermonis

sermonis fuit. nam non tam ut de illis statuerem, quod mea nihil referebat, quam ne nihil subito interroganti responderem, ea à me instituta est oratio. quæ si uere ad te perlata esset, quæ tua est non solum humanitas, uerum etiam prudentia, certo scio, æqui boniq; fecisses. nam prior pars, ut mihi quidem uidetur, perhonorifica fuit, quæ tatum tibi tribuerit, posterior non contumeliosa, quæ nihil tibi nisi quod tu tantopere uitaras detraxerit. neque tamen te eum puto, qui, si quis in tuis scriptis aliquid reprehenderit, ei continuo inimicitias denunciandas censeas, cuius enim id intemperantiæ est? aut qui obtineri potest, ut homines etiam quæ non probent, laudent? quandoque hoc non licuit? nihil faciam insolenter, nec tibi, homini historiæ peritissimo, cui hæc domi nascuntur, commemorabo, quæ uiri amicitia, cæterorumq; officiorum obseruantissimi, necessariorum, atque familiariss. scripta reprehenderint, neque solum sine offensione, uerum etiam plerumque cum gratia. Et profecto ita se res habet. ut qui alterius librum corrigere conatur, si quid affert, quod in rem sit, gratia sit habenda: sin autem, ut sedulitatem non ames, nihil tamen ultra sit, quam ut stultitia rideatur, odio certe, aut simu-
tate.

tate nihil dignum est. uerum hæc ego ita disputo, quasi te reprehenderim. à quo quando tantum absum, ut etiam amplissime laudarem, his missis, ad Nigrum ueniam; quem ego hominem neque uituperare debeo, cum ipse de eo male non existimem, neque laudare possum, cum ille de me bene nec existimet, nec mereatur: itaque tantum dicam: id ipsum quod in me grauius scripsit, siue odio mei, quod nullo meo merito susceptum ego mihi conscius sum, siue maleuolentia quadam, quod tamen nunquam putauit, sine errore, quod potius conuicio, id eum falso scripsisse. ac ne me putes testis locupletis, ut tibi appellas, inficiando eleuare fidem conari, dabo ego quoque testes, quos spero minime tibi capite censos nisi iri, atque ut sadoletum præteream, qui epistola sua grauiissime obsignatum testimonium misit, qui ita uir est non solum ampliss. uerum etiam constantiss. atque grauiss. ut nullius eum gratia de fide, et religione dimoueret, ita autem tum mei, tum tui, tum Nigri est amans, ut, etiam si sit gratiæ locus, nunquam me unum uobis ambobus, ut leuissimè dicam, præponeret: uerum quoniam epistola tua magis te significat huius auctoritati crimen condonare, quàm testimonio fidem habere, dabo alios
homines

homines itidem tui studiosos familiariss. meos, quos neque pro cotidiana consuetudine tale quicquam celare potuisssem, neque, si ijs me patefecissem, pro ea obseruantia qua te prosequuntur magis uoluntati meae, quam existimationi tuae consulerent: itaque tu uel Molsam, uel Io. Casam, uel Carolum Gualterucium roges licet. hi tibi omnes me non modo quicquam contra dignitatem tuam locutum negabunt, sed multa etiam cum tua summa laude coniuncta praedicare solitum affirmabunt. Poterit etiam tibi fidem facere Flaminius Tomarotius, qui etsi mihi pro suis suauiss. moribus est cariss, tamen, quod ita tempora eius tulerunt ut maximam partem aetatis abesset ab urbe, & in istis locis uiueret, minus mihi est quam cuperem familiaris. is aliquoties interfuit, cum ego cum communibus amicis de hac iniuria mihi a Nigro imposta quererer, uisusq; est, ut est uir optimus, & humaniss. uehementer aequitate expostulationis meae commoueri. sed quid ego his utor testibus? illum ipsum, qui in hac re mihi grauiss. est aduersarius, licet rogare, ecquid eo, quae me dixisse insinulat de me audierit? ecquid ex aliquo, qui is ex me saltem audisse diceret? utcunque neget necesse est, non solum ne mentiatur, uerum etiam

etiam ne impudenter, palam, aperte mentiatur. si quidem illi fingere iam id integrum non est, qui cōmunibus amicis, hominibus graviss. atque ornatiss. quos ad eum allegavi, ita respondit, se ea cōiectura duci, ut id à me crederet esse ortum, quòd quendam, quo ego plurimum utor, sit nactus, qui libros illos improbaret. quod ut verum sit, iam me non sadoleti, sed accusatoris mei oratio, & testimonium omni culpa liberat. nisi solus ego ea conditione sum, ut, cum ceteri uix, aut ne uix quidem se praestent, ipse tum me, tum amicos etiam meos praestare debeam, addo in eare, qua ne seruos quidem coercere possumus. quis enim unquam servum constrinxit, quod ei non placeret is scriptor, quem non probaret? & scilicet is uir est, quem Niger insimulat, qui, dum ego ei praescribam quid de quoque sensurus sit, exspectet, ac non potius propter ingenium, doctrinam, nobilitatem, dignitatem, opes, quibus omnibus rebus ille abundat, me arroganter facere arbitretur, si quando meum iudicium à suo discrepare intellexerit. quo homine ego ita clementi, commi, benigno utor, ut tamen his illius uirtutibus mihi non abutendum perspiciam. Quare ut aliquando tam longam epistolam concludam, Nigrum tuum
parum

parum amice; parumq; prudenter fecisse dico, qui ad te rem parum compertam, planeq; falsam pro certa detulerit; ex qua praesertim tantum odij excitatum iri uideret: te autem ipsum, quod tam cito credideris, quodq; ut tuis uerbis utar, eam opinionem penitus indueris, non tam miror, quam quod, cum te iam placatum ostenderes, tibi tamen temperare non potueris quin me asperrime admoneres, operam darem, ut quæ opinio de ingenio meo, doctrinaq; est, eadem de innocentia esset. ad quæ ego ita tibi rescribo, atque respondeo, uitam meam actâ monitis præceptisq; istis, quæ per se fortasse non in scita sint, apud me nullum locum reliquisse, sed à prima adolescentia semper me talem præbuisse, ut nemo tam mihi fuerit inimicus, qui me nocentem unquam appellarit. neque solum me industriæ, morumq; meorum, uerum etiam uitæ ualde pœniteret, si plus in me ingenij, aut doctrinæ, quam innocentiae esse sentirem. quippe, cum ingenium à natura tributum sit, doctrina autem non sine magnis facultatibus, quæ in fortunæ manu pleræque sunt, cōparetur, sola innocentia in nostra potestate relinquitur. itaque illis impune, ac sine uituperatione caremus, hac sine scelere, ac sine supplicio carere

non

possumus. Ego uero, qui me tecum nec ingenij magnitudine, nec doctrinae copia ne comparem quidem, idem, ut tu homo innocentiss. innocentior sis quam ego sum, tibi non concedo, mirorq; quomodo tibi istuc in mentem uenire potuerit, ut tam leui de causa homini minime malo, abs te certe non alieno tam grauius malediceres. ceterum quando ita se mores habent, quandoq; apud te hominum maleuolorum ficta crimina, quam grauiss. uirorum constantiss. testimonia, plus ualent; feram id quoque. à te autem tantum petam, ut hanc totam rem inquisitam ne amittas, ut & quantum cuique posthac credendum sit discas, & me abs te immeritissimo meo accusatum reperiās. Ego interea, ut ut haec sunt, nihil de mea erga te obseruantia diminuam. erit tamen sapientiae, humanitatisq; tuae, ut, quod ego mea sponte facturus utique sum, id etiā ut libenter facere possim curare. quam ad rem nulla alia opera, quam animi tui aequitate, opus est. quod si in me durior esse uoles, ego tamen hoc consequar, ut omnes intelligant me nihil maluisse, quam te mihi esse amicum, postea uero quam per te id non licuerit, nunquam tamen uoluisse me tibi esse inimicum. Vale. XIII. cal. Mart. M. D. XXXVII. Roma.

Cosmus

Cosmus Gherius Episcopus Fanensis Car-
dinali Contareno S. D.

LVDOVICVS Beccatellus familiaristuus,
necessarius meus, proxime ad me scripsit effectum
esse tua singulari humanitate, ut quaecunque mi-
hi opus hoc tempore esset à Pontifice Maximo ob-
tinere, ea nobis omnia per te unum cumulatissime
impetrarentur; itaq; mihi pro certo significauit
breui se tria diligentissime scripta diplomata mihi
missurum, unum, quò res mea familiaris ualde in-
uabitur, cum grauissimus portorij oneribus uecti-
galia nostra subleuentur: altera duo quorum au-
cloritate Christi rem, & causam in hac ciuitate
maxime defendemus: unum enim ad fœnerationis
turpissimum crimen comprimendum pertinet, al-
terum ualet ad instituendam rationem quemadmo-
dum egentes, & mendici facultatibus ijs non frau-
dentur, quæ bonorum hominum testamentis ad eo-
rum sustentationem sunt relictæ. ignosce mihi, quæ
tibi notissima sunt nihilominus tamen referenti.
Primum enim quorum beneficiorum impetratio ma-
gnopere me adiuvat, eorum etiam commemoratio
1 plurimum

plurimum delectat. Deinde uideor mihi, singulis eo-
 rum diplomatum causis enumerandis, satis etiam
 de ijs causis dixisse: quamobrem magnæ tibi gra-
 tiæ sint à nobis agenda. agam autem paucis, &
 cum res ipsæ per sese copiosissime loquantur, ego
 tantum breui dicam: quæ mihi obtinuisti, cū pro-
 pter cæteras causas grata mihi optataq; accidisse,
 tum etiam eo nomine fuisse maxime incunda, quod
 à te proficiscerentur: multum enim interest à quo
 beneficium accipias. ego uero non intelligo à quo
 magis defendi, et adiuuari uelle, quàm à te, debeã.
 itaque quod non uno nomine, sed tribus, ijsq; gra-
 uissimis, uno, eodemq; tempore tibi potissimum obli-
 gatus sim: sane uehementer cum mea, tum ecclesiæ
 meæ causa gaudeo. sed ad alia tria nomina mihi ue-
 niendum est, multo grauiora, multoq; clariora, quæ
 Ludouici epistola legenda mihi dedit, quibus non
 modo me, sed uniuersam ecclesiam maiorem in mo-
 dum tibi deuinxisti, eiq; iustissimam lætitiæ causam
 attulisti: quis enim recte sentiens ex Theatini, Sa-
 doleti, Poli summa dignitate summe non lætetur?
 ego uero non dubitabam, neque dubitari intelligen-
 bam, quin tuo maxime auxilio, ac studio, florentis-
 simi, ac sanctissimi ætatis nostræ homines in amplis-
 simum

simum collegium cooptati essent. Quamobrem gratulor tibi, primum quod ex Cardinalatus tui, quasi semente, eam Cardinalium tui similiū frugem Deus colligere uelle uideatur; quæ sit in ueterem suam dignitatem Christianam Remp. tristissimis temporibus uindictura: deinde pro meo Episcopi, & Christiani officio, qui Remp. rectissime, ut debeo, constitui desidero, gratias tibi immortales ago, quod eius rei spem quotidie nobis uirtus tua magis augeat: uerum quoniam neque gratulationem, neque gratiarum actionem te ab hominibus ex benefactis tuis expectare certo scimus, qui non his præmijs, sed Christi caritate ad bene faciendum moueare: non est ea mihi pluribus rebus utendum. sat erit officio & ueritati datum esse; quod ei liquido debebatur. De reliquo Deus orandus uehemēter est, ut te in primis conseruet, amplificetq; ; quo tanquam architecto pulcherrimam, & firmissimam ecclesie fabricam ædificatum iri speramus. ego, quod episcopatus mei patrociniū susceptum habes, operam dabo, ut hæc clientela uoluptati tibi sit: cum inteliges huius dioceseos rationes fideliter, & studiose à nobis administrari. Tibi quidem ex Ludouici literis, cum publico nomine, tum meo ipsius priuato

Christi uniuersæ etiã atque etiã magnopere gratulandum non dubito. Quæ cum à te præter ceteros tanquam carissima, ac sanctissima mater obseruetur: hoc certe nomine gratulari tibi quoque debemus, quòd ostendendæ in eam pietatis tuæ facultas tibi tanto maior est data, quanto gradus iste maior, & illustrior illo est, in quo eras, quòd si, te nullum magistratum gerente, sed à Christianæ rei publicæ administratione longissimè absente, eius tamen confirmandæ, & constituendæ maximam in te uno spem omnes boni positam habebant: quid nunc eos facere putas, cum ad eius gubernaculum diuino quodam auxilio te in primis uocatum esse, sentiant? Profecto nihil est tantum, quod à uirtute, sanctitateq; tua non expectetur. Quod uel summâ grauitas tua pateretur, uel adolescentiæ meæ conueniret, non commissem, ut in tam amplo, & excellèti argumento tam pauca scriberem: sed neque multis apud te uerbis opus est: & ego, multa potius silendo, quàm scribendo, modestiam eam tuebor, quam habere semper opto. quare, ijs prætermisissis præclarissimis maximisq; rebus, quæ à te Cardinali iure optimo expectantur, hoc duntaxat ascribam: mihi quidem Cardinalatum tuum, mirifi-

eam ac singularem letitiam attulisse. quæ letitia cum ad omnes bonos pertinere mihi communiter uideatur, quemadmodum initio scripsi, ego, qui esse in eorum numero uehementer uelim, teneri non potui, quin absens eius rei signum aliquod ac testimonium his literis, pro mea parte tibi mitterem. Deus modo faxit, ut gaudium, quod in Cardinalatu tuo nobis attulit, id ipsum in tua dignitate quotidie amplificanda magis cumulet. Vale.

Cosmus Gherius, Episcopus Fanensis, Petro Carnesiccio Protonotario Apost. S. D.

ETSI contra iudicium, uoluntatemq; meam factum est, ut hanc epistolam, quam multis ante diebus ad te dare decreueram, in hunc usque diem scribere distulerim, quia, ubi constitisses, nondum audiebamus: tamen sic accidisse non permoleste fero. neque enim dubito, quin meæ literæ si primis illis diebus ad te allatæ fuissent, quibus recens grauissimus dolor in animo tuo uersabatur, ita te affectum, atque commotum offendissent, ut amore, & consilio suo leuare, ac sedare perparum possent. nunc uero, cum summus animi tui dolor partim prudentia,

quæ

quæ singularis in te est; partim die ipsa magna ex parte diminutus esse debeat; sperandum est, quicquid etiam lenioris medicinæ adhibeatur, id ualde profecturum. quanquā ego non medicus, sed ægritudinis tuæ socius, & particeps potius sum: existimauiq; diem illum, quo Clementem VII. Pontificem Maximum, decessisse audiri, mihi quoque letuosissimum, atque acerbissimum accidisse. interrupit enim ille non solum ueterum consiliorum, & cogitationum mearum cursum; sed omnes meas nouas spes, quarum tu fautor adiutorq; esse solebas, intercidit, atque extinxit. sed tamen, cum nullum ex dolore fructum, nisi amarum, atque acerbum, colligi uiderem; frustra q; de ijs rebus homines queri intelligere, quæ aliter sese habere non possunt; faciebat mihi existimaui, ut non modo dolori meo non cederem, uerum, quoad possem, acriter illi ac fortiter repugnarem. est uero id multo magis laborandum tibi. nam præter illa, quæ afferri ad consolationem communiter solent, uerissimaq; sunt, est tibi uni præcipue cauendum, ne dolore grauius affligare, quam summa hominis uirtus, & constantia patiatur. iudicium enim illud, quod idem ille Clementis in te contulit, quo grauius aut honorificen-

idem, qui semel esse cœpi, in te semper ero, hoc est, tui amantissimus, atque observantissimus: idq; ut tibi persuadeas, uehementer uelim. Vale.

Cosmus Gherius, Episcopus Fanensis, Giberto
Episcopo Veronensi S. D.

DE quibus rebus, si præsens essem, te adire, tibiq; pro mea in te observantia gratulari maximo-
pere conueniret, de ijs, ut opinor, minime abhorret
ab officio meo, si tecum absens per literas agam. nā
cum est ad nos allatum magnos illos amicos tuos,
(tuos autem, cum dico, uirtutis & pietatis, & re-
ligionis intelligo) in Cardinalium collegium coopta-
tos esse, existimaui tantam letitiam te ex eo cepis-
se, ut non magis illis, quàm tibi, gratulandum es-
set. Primum enim Reipublicæ Christianæ caritas
uehementer te cōmouisse debet. s. ut gauderes, ad
eam gubernandam illos accedere, in quorum sapien-
tissimis integerrimisq; consilijs, non solum spes, sed
etiam salus, & incolumitas constituta sit. Deinde
propria quædam ratio letitiam tuam iure optimo
cumulare potuit, quòd eos, quos omni necessitudi-
nis uinculo coniunctissimos habes, non solum Car-
dinales

dinales factos uides, sed ipse quodammodo Romanum ad Cardinalatum deduxisti. Quare cum Reip. causa tibi gratulor, tum etiam tua: & ut ecclesiae salutaris, tibiq; quotidie magis iucundus accidat summorum uirorum honor, uehementer opto. sed altera noua res, iisdem nuntijs ad nos perlata fuit, de qua minime silendum uidetur: te scilicet iterum esse Datarium creatum. ego quidem in hoc uno nuntio tantam uim esse existimaui, ut magnam propterea & certam spem caperem, serio iam & uere de Christi ecclesia confirmanda tractari, et, ea re audita, Pauli III. Pontificis Maximi sanctitatem, & prudentiam plurimum amaui, qui uacillanti ecclesiae talium uirorum adminicula afferat. Facilitatem uero tuam, & pietatem incredibilem sane sum admiratus, qui magistratum laboriosissimum, & dignitate tua multo minorem, olim etiam à te reiectum, nunc tamen, ecclesiae causa, tibi suscipiendum, & sustinendum duxeris. Quod si gratulatio, quæ uirtuti et pietati debetur, multo maior ea est, quam quæ honoris, & dignitatis causa fit, certe non dubito, quin tibi sit hoc nomine uehementissime gratulandum, neque uero gratulandum solum, sed etiam ab omnibus ecclesiae ordinibus gratiæ singulares agendæ.

de . Haecenus officium illud his literis praestitum esse iudico, quod ego pro mea in te obseruantia tibi debebam. Quod superest, Deum quaeso, ut optimis, ac plane diuinis principijs exitus consentiant : id est, ut te, tuiq; similis quamamplissima semper auctoritate in Rep. Christiana faxit esse. Vale.

Cosmus Gherius, Episcopus Fanensis, Bernardino Maffeo S. D.

NAE istud silentij genus amabile, & pereloquens est: ad amicorum scilicet literas, & postulata, non literas, sed res ipsas studio & amore confectas remittere: quemadmodum nuper mecum fecisti: cum onere illius tributi, quod à Clemente superioribus annis impositum sacerdotibus fuerat, me patroni tui liberalitate leuari curasti. ego uero te ita facientem, cum nihil rescribis, non modo non tacere iudico, sed etiam elegantissime & significantissime loqui mihi persuadeo, laudoq; iudicium tuum, qui te à Lampridio Romam ad Alexandrum Cardinalem, alterius, & solidioris eloquentiae magistrum, contuleris. nunquam enim istos habuisses Patavi progressus, qui non solum laudi tibi, sed etiam tuis amicis

aut addi aut detrahi possit, uideatur, quippe qui eas nondum uidi, & tu fortasse in eo prudens, quòd non misisti. sed hæc iocati sumus. à te nihil nisi elegans, et limatū expectari debet. Vale.

Simon Villanouanus Hieronymo Sauorniano S. D.

VELLEM ut quo animo in te, ac liberos & fui semper, & nunc quidem sum, aut ego declarare, aut tu certo aliquo signo colligere posses. gratum tibi, opinor, esset studium meum. nempe intelligeres non mihi uoluntatem obsequendi tibi deesse, sed facultatem. in quo equidem mihi fortunam inuidere arbitror, nec sinere, ut præstanti natura adolentes perpolire, atque omnibus artis coloribus ornare possim, ut ne uidelicet sit id uinculum amoris inter nos perpetui, & monimentum industriæ meæ sempiternum. Itaque quemadmodum, si Apelles, aut si Protogenes, uel quiuis, eximiae pulchritudinis speciem animo complexus, cum ad eam exprimendam, artem manumq; dirigeret, subito casu prohiberetur, magnam credo molestiam traheret; sic ego qui ad singularem adolescentiæ formam, iam mente, & cogitatione designatam, pararam

ram omnes meas arculas, ut sum impeditus, non potui non uehementer dolere. Huic acerbitati accedit & illa, quod uereor inconstantia, ac inhumanitatis nomine suspectus tibi sim, qui operam meam sponte oblatam antea quidem non praestiterim, hoc uero tempore denegare cogar. mihi in tanta solitudine ad leuandum animum meum uehementer opus est sapientia, & aequitate tua. Quam ob rem peto, a te bonae de me opinionis usuram tantisper, dum utriusque temporis rationem paucis apud te explico, ut illam, si me culpa uacare ostendero, perpetuo retineas, sin minus, deponas confestim, atque abijcias. Ego, quo die primum sum a te accersitus, complexus sum libenter conditionem, quod de tuis, ac liberorum laudibus saepe audieram: cumque grauius febre tum opprimerer, statim, ut per ualitudinem potui, contuli me Venetias, ea mente, ut te isthuc prosequerer, quo quidem animi causa excurrisse putabam. Illic ut fui, mihi narratum est de consilio tuo & profectionis, & remansionis. ego qui in luce hominum, & uixeram antea, & uiuendum esse statueram, deterritus sum cum solitudine loci, quae dicebatur, tum aeris insolentia. Itaque mihi meum consilium displicere coepit, nec putauim proficiscendum

proficiscendum ad te, cuius uoluntati obsequi posse desperabam, præsertim qui intelligerem quam molestus foret aduentus hospitis adhuc languentis è morbo. Vides Sauorniane nihil dum à me factum esse, quod animum tuum offendere debeat, aut in quo tu officium meum iure accusare possis. Mea in te uoluntas clara exitit, & consilium errore captum non sine causa mutatum est. alterum sequitur, in quo si est crimen, profecto necessitatis est. Nam cū statutum haberem quærendum omnino mihi aliquid, in quo certum esset fortunis meis præsidium, Ventidius bibliopola, homo singulari & fide, & pietate erga te, multis uerbis cohortatus est, ut ad te irem. respondi me uelle omnia tua causa, sed esse opus festinatione: nam eum, quo cum uiuebam, ita mihi molestum, ut ipsius fastidium non modo præceptori, sed ne libero homini ferendum esse putarē. postridie Idus Nouemb. aut ab eo discedendum, aut, quod nollem, prorogandum molestiæ tempus. ille recepit se scripturum hac de re, ego me expectaturum ad præstitutum diem, quo animo esses. interea relicto præclaro hospite, pactus sum cum familiaris meo de uictu certo pretio in dies singulos, ut mihi integrum esset, si annuisses, proficisci ad

uos. præterit dies de quo cum Ventidio conuenerat
 item unus, & alter. Tum mihi magna, & difficilis
 ad statuendum res proponitur. nam multis mensi-
 bus ante egregius ille, & hospes, & discipulus
 meus, primum sua sponte, ut est ingenio malo, dein
 de ab inimicis meis incitatus perfecerat, partim
 precibus, partim minis, denique etiā maledictis in
 meam uitam, ac mores meos, ne quisquam aut uel-
 let, aut auderet recipere me tecto, ne dum opibus iu-
 uare: atque hæc iccirco, ut cum omnia mihi obstru-
 cta essent, coniectum in angustias, quibus uellet
 conditionibus astringeret, extorqueretq; ab inuito,
 quod & præmijs, & beneuolentia eliciendum est.
 ac mihi discedenti nimis importune id quidem, &
 ualde insolenter, tamen ausus est uim denunciare,
 & adijcere illud, dum se ad ulciscendi tempus re-
 seruaret, prouisurum, ut quæcunque mihi domus
 patuisset, excluderer ea. quid quæris? in eo metu
 biduum fui, ut quoties hisceret nouus hospes, di-
 cturum putarem, migrandum mihi esse. Dum hæc
 aguntur, ecce narratur mihi familiaritas uerusta,
 ac magna, quæ tibi, & Theupolo genero est cum
 Tito Mænio, & P. Druso perēnibus inimicis meis,
 uel potius inuidis, qui quia exorientis meæ laudis
 splendorem

splendorem ferre non possunt, cum obscurare, adhibitisq; omnibus machinis ocium meum oppugnare conantur. horum ego inuidiam facile, opinor, uirtute superabo. tamen ueritus sum ne impedimento essent ad copulandas uoluntates nostras. itaque spem omnem abduxi à te, cui non modo non probatus, sed nec cognitus adhuc sum. in tanta perturbatione rerum tantisq; tenebris, nactus sum casu adolescentem nobilem, & percupidum mei Andream Pascalicum, qui etsi Mæuios ciues suos magni faceret, & P. Druso philosophiæ laudem non adimeret, ingenuarum tamen artium spem suam præferret alienæ cupiditati. Lux quædam mihi oblata esse uisa est: itaque cum omnia & benigna, & copiosa ostendisset, nullam moram interponendam putavi, quin me ad eum conferrem. Non defuerunt facti ab obrectatoribus testes, qui iniquius de me loquerentur: ipse egregius adolescens aureis quidem dedit, sed uicit & fides & optimarum artium studium. ergo ut pridem errore, sic modo necessitate sum prohibitus, ne tibi, cum cuperem ipse, obsequerer. habes factorum meorum consilium. Nunc quod reliquum est, postulo te mihi æquum præbeas: & quoniam amicitia tua ampla mihi semper uisa est, te

K rogo,

rogo, atque obsecro, patiari, si minus, ut in eam me penitus insinuem, tamen inniti in ipsa, & acquiescere possim. De me autem sic habeas, eximia in te pietate futurum, liberis uero tuis singularem memoriam, beneuolentiamq, praestiturum. quos etiam crebris literis ad scribendum, & excolendam utriusque orationis facultatem excitabo, si sensero gratum tibi ea in re officium meum. Vale. Patavij, ad X. cal. Decemb.

P. Danesius Ia. Colino S. P. D.

TERTIVS hic iam fere agitur annus, cum ego omni qua potui contentione abs te petij, ut ad eam incredibilem uisendam Italiae cupiditatem, quam flagrare uerius quam teneri mihi uidebar, tuam quoque uoluntatem accommodares. existimabam enim id quod res erat, si illud impetrauissem, me Regis etiam uoluntate, quae non fere solita esset à tua discrepare, suscipere eam peregrinationem posse. Ac tu quidem, qui mihi à primo mirifice aduersatus esses, credo quia id nascenti tum pene gymnasio regio damnosum fore arbitraberis, tamen perlecta mea quadam ad te scripta epistola, cum, quanto
pere.

pere id uellem, cognouisses, ita te facilem, atque æquum præbuisi, ut confirmares, si tibi non esset indecorum quam causam paulo ante, non tu quidē oppugnauiſſes, sed certe non probauiſſes, ei patro-
num repente exiſtere, libenter id pro me eſſe factu-
rum: sed tibi ſcilicet, poſteaquam ita cœpiſſes, ſer-
uiendum eſſe conſtantia: mihiq; omnino uidentū, ne id à te petere perſeuerarem, quod tuæ dignitati labem aliquam aſperſurum uideretur. Nimirum tã-
ta uis in me cupiditatis eſſe tibi tum niſa eſt, quæ ſe illis literis plane oſtenderat, ut, quod nullæ ne-
que meæ, neque eorū, quos ad te ſane multos allega-
uerā, honeſtiſſimorum hominū preces auferre potue-
runt, id ſola impetraret epiſtola, ut te, qui ſecſti an-
tea nequiſſes, totum iam nobis remitteres, ac ſi non ſuffragaturum, (id enim ne poſſes, iuſtiſſima cauſa impediri) certe nō aduerſaturum pollicereris. quod quidem procul dubio ita eſt à te, ut promiſeras, factum. ſed uidelicet uicta ſemel apud Regem te agente cauſa noſtra, obtineri ne tum quidem, cum tu contra agere deſtituiſti, potuit. itaque fregi me ipſe, & qua potui ratione, à ſummo dolore, quem e a re ceperam, ad æquitatem animum reuocaui, ſed ita tamen, ut ſemper in eo reſideret eadem illa
uoluntas,

uoluntas, cum primum possem Italiam adeundi, et
 quasi ex eo collo, ubi Cicero parens, & auctor elo-
 quentiae spirauisset animam ducendi. Haec omnis
 anteaeti temporis recordatio quò pertineat, etiam
 antequam id dica, intelligere te spero. Neque enim
 tu nescis Georgium Seluam meum, posteaquam a te
 discessi, patronum, Venetijs in illa grauissimi sena-
 tus luce legationis amplissimo munere nunc fun-
 gi, cum illi ad eam rem tua & multa, & praeclara
 testimonia, quae tu eius uirtuti apud Principem ue-
 rissime tribuisti, adiumento fuerint. Ab illo igitur
 cum semper alias a gerrime pati soleo me disungi,
 tum hoc tempore abesse, cum est ibi, ubi uel sine eo
 non illibenter esse possim, plane mihi ferendum non
 uidetur. et certe non mediocriter iudico ad rationes
 meas pertinere, me aliquando tade domo exire, in Ita-
 liam praesertim, ubi tam multi sint doctissimi ho-
 mines, tanta librorum omnis generis, graecorumq;
 in primis copia, tot denique, ac tam illustria anti-
 quitatis uirgilia, ut nullo pene in loco possis pedem
 ponere, ubi non in aliquod incurras uetustatis mo-
 numentum. Eo etiam accedit, quod ego Venetijs
 orium nactus, quod hic quidem propter docendi oc-
 cupationes perexiguum mihi est, ea potero literis
 mandare,

mandare, quæ & tibi, in cuius nomine apparebunt, incunditatem, & studiosis philosophiæ nonnulli fortasse utilitatem, & mihi denique ipsi aliquem laboris, & industriæ fructum allatura esse non desperem. Hæc nanque una in re totum illud tempus, quo ero Venetijs, neque id quidem plus erit annuum, ponere constitui: quo illis satisfiat, qui me crebro inertia insimulant, ijsq; probem, si quo modo id assequi possim, me non omnino sine fructu tot annos, quot pene natus sum, in literarum studijs esse versatum. Huic tui rei Coline per immortalem Deum auctor, adiutorq; sis. fueris autem, tantum si ostenderis principi te consilium nostrum non improbare. Hæc uero à te postulo, ut illum, nisi is ultro sententiam tuam exquisierit, de ea re appelles. Id enim iam ante menses aliquot, tum cum inde abesses, à Theocreno est factum, cuius ad Budæum literarum exemplum una cum his ad te misi, quibus literis princeps Budæo mandabat, uti de eo, qui mihi, dū abessem, sufficeretur, ex re ac commodo studiosorum statueret. Neque hic porro in danda uenia difficilem se princeps præbuit, sed ultro etiam consilium, & propositum nostrum amplissimis uerbis collaudauit. tantum excepit, ut ego missionem hanc, non

commeatum interpretarer : & simul uti Budæus ,
 cuius arbitrio rem permittebat , existimaret , an is ,
 quem ipse muneri meo fungendo uicarium relin-
 querem , idoneus , cui res committi posset , uideretur .
 Quæ cum ita se habeant , cumq; hoc quod tanto tem-
 pore , & tam ardentem concupierim , ab ipso rege
 mihi constet esse permissum ; tu unus Colimæ reliquus
 esse uideris , cuius de uoluntate laborare , & sollici-
 tus esse debeam . Certum est enim , idq; adhuc ex
 quo me tibi totum addixi , obseruauisse uideo , nihil
 aggredi unquam , nō modo quod nolle , sed nec quod
 non ualde etiam probare te cognouero . Quæ autem
 ratione hoc assequar , te ut ad partes meas adiun-
 gam ? nempe una , si ex eodem tempore , cuius an-
 tea feci mentionem , quædam attulero , quæ mihi be-
 nignissime tum , & amantissime promisisti . Non
 enim is es profecto , qui , quæ semel pollicitus fueris
 te facturum , ea possis , cum dies promissorum uene-
 rit , non præstare . Amabo igitur recordare , cum
 multa alia , quæ mihi , cū desperata re tristis , ac mor-
 rens ad te aduisssem , perhumaniter cōsolandi mei cau-
 sa commemorasti , tum illud in primis , cuius si for-
 te oblitus es , memoriam tibi nunc remouabo : fore
 aliquando , neque id quidem ita multo post , ut Geor-
 gius

gius Selus, cuius tum desiderio non minus quàm Italiae memoueri scires, aut Romam ad Pontificem, aut Venetias legatus mitteretur: quo tempore datum te operam, uel perfecturum potius, ut mihi quoque proficiscendi eodem potestas fieret. Crede mihi, uno illo uerbo, ne plane animo conciderem, steti. tantum enim in summa mea desperatione adipiscendi eius, quod unum tum uolebam, pusillum id spei, quod tu mihi tua oratione asperseras, apud me ad minuendum dolorem ualuit, ut reliquo omni postea consecuto tempore æquo animo essem, nec magnopere iam quererem tam opportunam, quàm illa tum uisa erat, Italiam adeundi occasionem mihi ereptam esse. en igitur hoc iam illud Coline tempus est, quod tu mihi pro tua summa, ac prope diuina prudentia futurum tanto ante prædixeras, in quo posses de me, ita ut maxime optarem, mereri. Quare æquum est patiari iisdem te uerbis compellari nunc a me, quibus est Terentianus ille amore, ac desiderio perditus adolescens usus, in suo tam, ut ipsi tum uidebatur, necessario tempore. Fac sis nunc promissa appareant. Quem locum, ut te promissi admoneam, non urgebo equidem diutius; ne, quod sine scelere haud possem, tuæ uidear constantiae gra-

uitatiq; diffidere . tantum autem te cogabo , quod
 ego scilicet in tuis plurimis , ac maximis erga me
 beneficij , primum ponam , ut ad meam infinitam cu-
 piditatem , cum ea praesertim reprehendenda non
 sit , tuam etiam uoluntatem accommodes , mihiq;
 ignoscas , qui , ut animo obsequer in hanc nouam
 spem erecto , & tanquam imminenti , nec ueritus
 sim tibi fieri molestior , nec satis tuarum occupatio-
 num , quae & multae , & grauissimae sunt , ratione
 habuerim . Quod cum facies , non nouum aliquod ,
 sed saepe alias a te . usurpatum , teq; certe dignis-
 simum officiũ facies . Vale . V . cal . Aprilis , 1534 .

Iouita Rapicius magistratibus ciuibsq;

Brixianis S . D .

VETVSTISSIMA & praeclara urbs ue-
 stra tum inexpugnabili isto mœnium ambitu , &
 publicorum ac priuatorum aedificiorum magnificẽ-
 tia , ac mira circumiacentis agri hubertate , tum
 multo magis ipso loci situ & cœli tẽperie , & , quod
 omnium longe maximum est , ciuium humanitate
 ac uirtute nulli non admirabilis uideri merito de-
 bet , mihi uero etiam amabilis , & perpetua quadam
 ueneratione

ueneratione digna uideatur, necesse est: tum quod maiores mei, tennes quidem, sed innocentes uiri, an nos iam ab hinc ducentos & amplius in agro uestro suarum sibi fortunarum sedem delegere: tum quod ipse quoque istic natus sum, & bonis artibus institutus. Itaque etsi per omne tempus, quo iam inde ab extrema adolescentia patrio solo absui, nullas peregrinationis sordes, nullam obscuritatem passus sum, benigna quadam hominum de me opinione semper honestatus, & publica ab honestissimis ciuitatibus mercede conductus, à vicetinis etiam, cum nihil tale peterem, aut expectarem, ciuitate donatus, ac non ita multo post ab illustrissimo decemuirali consilio Venetias accitus; urbis tamen uestrae mihi desiderium adeo non excidit, ut in dies atque horas magis magisque crescat. nam ut olim iuuenis amœnitatem locorum, & agri habertatem admirabar: ita nunc in senium uergens, uel potius iam plane senex, urbem ipsam mirabiliter expeto, & ab ea tanquam à carissima parente in gremium, in quo & dum uiuam, & post obitum perpetuo conquiescam, recipi desidero. peto igitur à uobis summi uiri, ut me in ciuitatem uestram, si nulla alia re, studio tamen erga uos incredibili dignissimum

gnissimum asciscatis. quo ego beneficio atque honore si afficiar, uel potius affectus cum ero: non enim dubito quin meae cupiditati uestra benignitas respondet: praestabo patriae, quod debeo, pietatem sempiternā; uos autem ea, quae uitae annos aequet, obseruantia ita colam, ut nullum à me grati ciuis officium, nullum plane studium praetermittatur. Valete. IIII nonas Maias, M. D. XXXVIII.

Venetijs.

Io uita Rapicius Ioanni Baptistae Rhannusio S. D.

A M O animum, & curam tuam, quod filium optimae spei unice diligas, quod illius educationem tam sancte procures. quod uero me potissimum delegeris, cui illum instituendum commendares; etiā gratias ago. magnum enim, ut ille ait, hoc ego ducō, quod placui tibi, qui turpi fecernis honestum. atque adeo male peream, nisi uel hoc uno nomine etiam mihi placere iam possum. Paulum uero tuū, cum per meam & illius ualeitudinem licuerit, ita tractabo, ut, non praeceptorem modo, sed custodem etiam rectoremq; illi me fuisse, plane intelligas. nēhil sane ex me audiet, nisi profuturum: nihil dis-

cet,

scet, quod nescisse præset. admonebo illum sæpe,
 quibus patris & maiorum uirtutibus tanquam
 onere grauissimo urgeatur; quanto illi labore opus
 sit, ut patri similis adolescat; quanta diligentia, ne
 à maioribus degenerasse uideatur. adnitar denique,
 ne præclara ista spes tua te fallat. te autem non tan-
 tū, ut iubes, redamabo, sed obseruabo etiam, ac ue-
 rebor. Vine, ualeq;. Brixia, VIII. cal. Sept.

M. D. XLIII.

Ionita Rapicius magistratibus ciuibusq;

Brixianis S. D.

TANTO me ordinum omnium consensu,
 quod à uobis absens proxime petiueram, uestra ciui-
 tate donastis, ut nihil aut humanius, aut amantius
 fieri potuisse uideatur. quod ego factum uestrum
 nisi læto & grato animo excipiam, & uoluptatis
 sensu prorsus carere, & omnium plane ingratis-
 mus esse merito existimarer. siue enim rem ipsam,
 siue animum uestrum considero; tantum me uobis
 debere facile intelligo, quantum persolvere nullo
 pacto possum. id enim munus dedistis, quod uel im-
 mortale, uel certe diu mansurum putastis, quodq;
 ante

ante oculos semper positum omnem ingratae obli-
 uionis ignauiam discutiat. extat enim, atque emi-
 net, & haeret animo beneficii uestri magnitudo, nec
 mecum modo, sed cum posteris etiam meis uiuet.
 mihi enim praestitistis, ut post diuturnam peregri-
 nationem multo iam latiore animo ad uos tandem
 non hospes, sed cinis reuerti queam. illis autem uia
 aperuistis, qua facilius per honestas artes in claram
 lucem prodire audeant. quod genus beneficii etsi in
 alios quoque plurimos contulistis: mihi tamen mul-
 tis modis maius, quod in me collatum est, uidetur.
 nam cum nec à maioribus meis fortiter adita pro
 uobis pericula ostentare, nec census magnitudine
 & publicorum munerum participatione ciuitatem
 leuare possem; uos pro ijs omnibus, quibus alij fa-
 uorem promerentur, innocentiam meam, & medio-
 crem in bonorum literarum studijs doctrinam, at-
 que industriam ita amplexi estis, ut nec professio-
 nis meae immunitas, nec peculij tenuitas, nec Cla-
 rensiū iniqua obrectatio, & pertinax contentio
 uos deterrire potuerit, quo minus, quod me uehe-
 menter optare intelligebatis, libenter concederetis.
 Quale uero quantumq; illud existimari oportet,
 quod totum hoc negotium ita temperastis, ut nec
 grata

grata mora longior quidquam demeret, nec consi-
lij maturitatem celeritas impediret: atque, ut mihi
uidetur, illud quæsiuistis, ut non beneficium solum,
sed iudicij etiam uestri honorem præstaretis. quorū
alterum si optandum sit, iudicium equidem malim,
quā beneficium. nam, ut in quam uellem cisalpi-
næ Galliæ aut Venetiæ ciuitatem adsciscerer, non
magno, opinor, negotio impetrassem: talium autē
uirorum, quales uos estis, iudicia assequi difficilli-
me potuissem. quamobrem id longe gratissimum
mihi sit necesse est, in quo ita beniuolentiæ uestræ
liberalitas elucet, ut iudicij quoque æquitas adhi-
bita fuisse intelligatur. qua in re quia neque refer-
re, neque agere, quas debeo, gratias possum, habeo
saltem; et, ne uos aut iudicij de me uestri pudeat,
aut collati beneficij unquam pigeat, operam dabo.
Valete. Venetijs, M. D. XXXVIII.
V. cal. Iun.

Iouita Rapicius Paulo Rhamnuso S. D.

GRATAM mihi ac iucundam aui tui memo-
riam literis tuis Paule renouasti. amavi hominem
multis magnisq; de causis. fuit enim prudens iu-
risconsultus

risconsultus; index integer, bonus plane uir, atque
 officij plenus, ideoq; carus omnibus, sed Venetis
 principibus longe acceptissimus. quibus & in iure
 dicundo, et magnis praeterea in rebus maximo usui
 fuit. uerum ego illud in eo maxime mirabar, quod
 grauitatem personae, quam sustinebat, tanta inge-
 nij suauitate temperabat, ut dubium omnibus reli-
 queret, maior' ne in illo grauitas esset, an comitas.
 scribebat uersus ingeniose, et plurimos quidem, ac
 pene omnes ex tempore, ubi grauiora negotia ua-
 cuum curis animum reliquerant: et, quod alijs la-
 bor ac studium esse consuevit, hoc illi lusus fuit, &
 iucunda animi remissio. is nullas delicias huma-
 nioribus literis anteponebat: & homines nostri or-
 dinis ac loci mire diligebat. me certe ita complecte-
 batur, ut nihil esset, quod de illius mihi beneuolen-
 tia polliceri non auderem. uerum, ut defuncti quo-
 que memoriam post tot annos uenerer, illud uel in
 primis me impellit, quod patrem tuum, unum om-
 nium hominum animo meo longe carissimum, ge-
 nuit. itaque non possum non laudare tuam istam in
 seruandis tam rari atque excellentis aui monumen-
 tis pietatem, & diligentiam. rem laude dignam,
 & mihi sane admodum gratam facis, quod lucu-
 brationes

brationes illius perire non pateris, sed summa diligentia collectas, ad liberos ac nepotes & posteros tuos peruenire desideras. quamobrem, quidquid istud est oneris, quod imponis, libenter suscipio; et, si quid uacui tēporis nancisci potuero, totum istud uolumen, collatis, ut optas, archetypis diligenter perlegam, & quantum licuerit, emendare tentabo. quod autem huius beneficij memorem te fore & gratum polliceris: nihil est, quod hoc nomine sollicitus sis. in promptu tibi est, unde mihi facillime possis satisfacere. nullam enim aliam gratiæ relationem abs te uel peto, uel expecto, quàm ut assiduo studio illi te similem præstare contendas; & cuius nomen refers, eiusdem sis uirtutibus insignis. Vale, & in aui ac patris tui uitam, quasi in speculum, oculos mentis diligenter intende. Venetijs, cal. Augusti, M. D. XLVII.

Iouita Rapicius Hieronymo Montio S. D.

NISI, uiri optimi, patris tui obitu uehementer doleam, me nec hominem arbitrer. quanquam enim aliquanto serius, quàm decuerat, id accepi; nihilo secius tamen sum perturbatus. diligebam
enim

enim ex animo illum absentem absens: nec amicitiam, iustissimis de causis cum eo semel initam, aut studiorum dissimilitudo, aut locorum intervalla diuellere unquam potuerunt. ita hærebant, et adhuc hærent animo multæ illius, magnæq; uirtutes; quæ hominem reip. utilem, omnibus, qui uel leuiter norant, amabilem, mihi uero etiam dignum rara quadam ueneratione reddebant. gratulabar illi tacitus, quòd senex in optimorum liberorum amore conquiesceret: & uiuere illum diutissime optabam, atque eos ex tua ista excellenti uirtute ac dignitate fructus capere, quos illius in te honestis artibus instituendo diligens cura postulabat. Verum, quando necessitati ne dū quidem possunt obsistere, me ipsum, si non plane consolor, certe colligo &, quæcunque accidunt, ferenda censeo. quod te quoque, quæ tua prudentia est, et animi uigor, facere certo scio; neque hac in re ullius consilio indigere. ideoq; nihil eorum dicam, quæ in huiusmodi casu dici consueuere: sed ambobus potius gratulabor; illi, quòd non prius è uita excessit, quam te eximia ista doctrina excellentem, & multis alijs bene constituti animi dotibus florentem, non principibus modo uiris placere, sed uniuersæ ciuitati, quod maxime optauerat

uerat, esse carissimum perspexit. tibi uero, quòd diuino quodam dono datum sit patris prudentissimi consilijs ineuntis pueritiæ inscitiam regere, & lubricum illud adolescentiæ tempus stabilire, & bonam iuuentæ partem ita ducere, ut iam non patriæ modo, sed uniuerso hominum generi prodesse possis. itaque arbitror illum, si quis eorum, quæ hic fiunt, mortuis sensus est, gaudere, quòd in te filio multo iam uiuat illustrius, quàm in se ipso unquam uixerit. sed hæc tu pro tua eruditione, ac prudentia multo melius. ego, quòd te scire uelle desidero, uiuo adhuc, & ualeo; si modo senes ualere possunt. addo illud, me adhuc amicis carum esse, & operam meam illustriss. huic ciuitati non esse ingratam. Paulus noster non sine integritate, & iuris prudentiæ fama apud Maternenses, qui Benacū accolunt, ius dicit, & te unice diligit. Vale. Venetijs, cal. Sept. M. D. XLVIII.

Stanislaus Orichonius Ruthenus Paulo
Rhamnufio S. D.

NON puto id sine numine diuum euenisse,
Paule Rhamnusi, ut ego, qui præceptis, institutisq;
L Italia

Italiae ineuntem aetatem meam transmiserim, uobis
nunc studia mea probem, qui in Italia doctrina an-
tecellitis: ut, si quid dignum uestra cogitatione ac
approbatione in nostris studiis uideatur esse, id uos
ametis, expetatis, et, quasi debitum uobis à me mu-
nus, flagitetis. utinam uero id ego ingenio possem
assequi, ut uos, communis orbis terræ magistros,
huius quoque discipuli non pœniteret. efficerem
profecto, ut hoc ipsum, quod iam diu probauistis,
cumulatum reponerem; et, quod à me expectatis,
omni mea opera uobis aliquando emetirer. quod
cum nondum posse uidear; quantum potero conten-
dam, ne hanc spem de me uestram, tuam autem in-
primis, fallam: qui in me suauissime effusus, tan-
tum amoris indulxisti tuo, ut non solum Thomæ Iun-
tæ, uiri præclari, opera nos eruditis hominibus Ita-
lis commendaueris; uerum etiam literis tuis me,
ignotum hominem, ac toto cælo abs te disiunctum,
ultro humanissime expetiueris. quod mihi ipsius fe-
licitatis instar est. quid enim in hac nostra mortali
uita optandum magis est, quàm aliquo loco, ac nu-
mero à uobis Italis censei, quorum de rebus ipsis
grauissimum semper iudicium fuit? itaque tuas li-
teras legens, uidere uidebar diuino animi tui mo-

tu admoneri me, ut, non tam ubi natus, quàm à quibus sim institutus, memor essem: ut uidelicet uestris præceptis, atque disciplinis fretus, non putarem mihi aliquid obstare, ad speratam gloriam, rudem patriam, ac barbaram, quæ Martem semper, Mineruam autem nuper cœpit colere. fuit enim Russia Scythiæ antea, cui finitima est, non multum sane genere, ac moribus dissimilis: quæ tamen ipsa consuetudine Græcorum hominū, quorum sectam, religionemq; sequitur, inhumanitatem illam feritatemq; Scythicam deposuit. mitis enim iam est, mansueta, ac benigna: literis etiam uestris latinis, atque græcis plurimum delectatur. quorum beneficio est assecuta, ut apud finitimos Scythas nihil iam uehementer probet præter Toxarim, & Anacharsim illum ueterem. horum enim exemplis admonita, multos existimationis bonæ cupidos adolescentes istuc ad uos Patauium in Italiam quotannis mittit. quorum sunt apud uos ciues, ac necessarii mei, Stanislaus Vapouius, & Stanislaus Drohoionius, adolescentes nobiles, ac summa spe, atque expectatione præditi. quos tibi notissimos esse uel ob id cupio, ut ex horum duorum moribus & ingenio de tota gente nostra coniecturam facias. qui, quòd

Russia prouincia Polonorum ditionis sit, uno quo-
 que nomine cum reliquis Polonis Pataniū nunc cen-
 sentur. Sed iam ad me redeo. Velim existimes me
 tuis literis confirmatum esse uehementer in ea stu-
 diorum ratione, quæ tu, in ista principe Venetia-
 rum urbe, commendatione tua ornasti, Thomæ
 uero Iuntæ, optimi uiri, prælis illustrasti, ac publi-
 ce legenda omnibus præbuiſti. quare nihil mihi ad
 conatum deesse patiar, ut tibi operam meam pro-
 bem fideliter: cuius iudicio quantum sit tribuen-
 dum, cum ex tua ad me epistola, tum uero ex his
 eclogis, quibus Petri Bembi Cardinalis defles mor-
 tem, sciri potest. in quo tamen ipso admiratus sum
 modestiam tuam, Italo homine dignam. quum enim
 luctū illū carmine ita exquisito prosequaris, ut ne-
 scias, carmen ne tuum an mors Bembi maiorem do-
 lorem legentibus faciat: in summa tamen tua laude
 nullum tuum nomen ponis. ita tuum illud excellēs
 ingenium, Italica modestia temperatum, laudem
 fugiens, ueram gloriam apud nos est consecutum.
 Dabis tamen hanc mihi ueniam, si ego correxero
 modestiam hanc tuam; idemq; in tuo Bembo fecero;
 quod tu in Sigismundo meo cumulate fecisti. nam
 eclogas tuas Craconiam ad impressores misi, cum
 præfatione

præfatione ac mentione nominis tui honorifica. ne
que enim tam præposteram (ignosce, quæso) mode-
stiam ferre potui, quæ tu te iusta ac debita laude
tua priuasti. idem uisum est ijs quoque, quibuscum
eclogas tuas communicavi. nam cum eclogæ ip-
sæ, tum uero humanitas hæc tua, quam summam
esse multis argumentis perspicio, digna cognitione
nostrorum quoque mihi uisa est. Caue autem putes
literas ipsas, tam græcas quàm latinas, maiori au-
thoritate, ac gratia usquam esse, quàm sunt in Polo-
nia; quæ ipsius Sarmatiæ caput est, ac regina. qua-
re, nostris ego te hominibus quamnotissimum esse
cum cupiam, nolo te priuare debita laude tua: ne-
que committam, ut carmen tuum, uenustum, ac le-
pidum, circumferatur in Polonia incerti auctoris
nomine: cum auctor ipse præsto adsit certissimus,
idemq; locupletissimus. id ergo mihi curæ erit. tum
etiam abs te peto, ut, si quid postea edes, ad nos quo-
que mittas. mittes autem commode, si Craconiæ in
manum dari iusseris * is ad me Premis-
siam, quod oppidum Russiæ est non ignobile, per-
ferri curabit, si quid miseris. qui si quo casu Craco-
uia abfuerit; ut eius fratri detur, inbebis. Quod
autem à me petis, ut tibi aliquid mittam denuo:

etsi ego nihil habeam, quod dignum sit oculis, ac au-
 ribus tuis eruditis; tamen, ne quid tibi à me negetur,
 misi nuper Patauū Stanislaō Drohoioiō, cuius
 supra mentionem feci, nonnullas orationes meas,
 unam de lege cælibatus contra Siriciū Romanum,
 alteram uero de bello Turcis inferendo, tum etiam
 Diatribam: ex qua disces omnem uitæ meæ statum.
 hæc opuscula ut tibi reddātur quamprimū, egi per
 literas cum Stanislaō Drohoioiō diligenter. uelim
 uero has orationes cuestigio ipso tibi reddi. quid-
 quid enim habui de rebus ipsis aut iudiciū, aut fa-
 cultatis, id totum in illas contuli: in quibus quantū
 profecerim, nullius iudicio certius id examinabo,
 quā tuo. Quod reliquum est, abs te peto, ut, quo-
 niam me dignum beneuolentia tua esse semel iudi-
 casti, hanc eandem mentem retineas: tibiq; persua-
 deas, me curaturum diligenter, ut id nonnullo etiā
 merito nostro facere uideare. Bene uale. Thomam
 Iuntam, humanissimum uirum, atque optimum,
 saluere iubebis meis uerbis plurimum; meq; illi cō-
 mendabis diligenter: eiq; has literas reddes: qui-
 bus illi pro nauata opera gratias egi. gratum, &
 memorem huius uestri diuini in me beneficiū ut me
 esse tu, & ille indicetis, curabo sedulo, iterum bene
 uale

uale. Datæ Premislia, oppido Russiæ, die assumptionis beatæ uirginis, anno Christi, dei nostri, M. D. XLIX.

Reginaldus Polus Cardinalis Paulo

Rhamusio S. D.

CVM Iouitæ Rapticū librorum proœmium libeter legi, tū me epistola tua delectauit, quam mihi una cum eo proœmio misisti; non tam quidem, quia pure & eleganter scripta est, quanquam ob eam quoque causam delectauit, quā quod gratum animum, & pietatem, qua doctorem tuum et uiuū profecutus es, & mortuum adhuc prosequeris, facile declarat. quo te non modo ex Rulli, familiaris mei, testimonio, sed ex ipsis etiam literis tuis dignum esse intelligo, qui à me, atque omnibus diligere. Quod uero ad Iouitam attinet, quem ex illo proœmio tam honorifice de me sensisse uideo: ut laudes eas, quas mihi tribuit, minime possum agnoscere; ita hæc amoris eius erga me significatio grata sane, ut debuit, mihi, & incunda fuit. cui quod uiuo studiū ac beneuolentiæ debui, neque mortuo iam præstare possum; id in ipsius liberos, atque in

EPISTOLAE

te, qui ab eo institutus es, & in filij loco habitus, libentissime conferam. Vale, & honestissimum uirum, patrem tuū meis uerbis saluta. Bruxellis, V. cal. Iunij, M. D. LIII.

Petrus Bunellus Iosepho Magetano S. D.

ITA esse ut tu scribis, prorsus mihi persuades suauissime Iosephe, me de Reuerē. Episcopi immutata uolūtate temere suspicatu. Tibi sane in hac parte maiorem quā mihi ipsi fidem habere uolo. neque enim, nisi ita res haberet, tu, quem mei amātissimū esse cognoui, tam ualde affirmares, & ego uirum nobiliss. ac inter suos facile principem, semper de studijs meis non male existimasse mihi persuaderi cupio. quibus tamē rebus, ut plane à me abalienatū existimarem, adductus fuerim, quanquam in ea epistola, quam ad Cornelium scripsi, satis aperuit, tibi tamen familiarius exponam. Audieram Pataniū esse qui Iulio Camillo partim obscure inuiderent, partim aperte eius existimationem oppugnare non desisterent. quorum institutum equidem laudare non poteram, quòd homini, ut ego sentio, optimo, ac eloquentissimo, qui nihil de eorum laude,

de, aut quæstu detrabere uellet, nulla præsertim ab eo iniuria læcessiti, nocere cogitarent. Nam, ut largiar illis, quo maxime nituntur, artificium istud, nunc primum ab eo excogitatum, & inuentum, omnem fidem excedere, fauere tamen pulcherri-
mis conatibus, non obsistere debuerunt. Gallorum fortasse partes istæ fuerint, ei, qui per fraudem, ut quidem isti putant, aliquid à Rege auferre uelit, aditus omneis præcludere: ab Italis quidem certe homo Italus in re tam honesta adiuuandus fuit. sed hoc ipsi uiderint. redeo ad id quod cœperam. Intellexeram Iulium Camillum flagrare inuidia: cuius commendationem, ut apud Cornelium gratiosam, sic apud nonnullos inuidiosam fore, ubi primum res agi cœpta est, prædixi. hanc meam prædictio-
nem non nonnulla, quæ ab episcopo in eo congres-
su, unde nata est suspicio, dicta sunt, uehementer sane confirmarunt, uultus tristis, oratio seuera, in-
certa quidem signa, signa tamen animi non satis beneuoli. quid illa? cum ego dicerem me daturum ope-
ram, ut expectationem, quam de me Iulius Camil-
lus excitasset, aliqua ex parte sustinere possem: re-
spondit, commoto, ut mihi uisus est, animo, incredi-
bile quiddam sibi uideri. quis has uoces maleuolo-

rum esse non crederet ? praesertim cui nota essent,
 quae Iulius Camillus de me scripsisset ? ad extremum
 adiecit, se, genus scriptorum meorum quale esset,
 ignorare : redirem quo die uellem, unam de meis
 epistolis afferrem : sibi quoniam aliquò proficiscen-
 dum esset, pluribus mecum agere non posse. respon-
 di, me omnia, quae uellet, esse facturum. ita disces-
 simus. Non longe abieram, cum ego extrema ista
 cum superioribus. contexens, rem totam attentius
 cœpi perpendere. ne multa, hanc feci summam co-
 gitationum mearum : eos, qui Iulium Camillum
 odissent, mihi quoque inuidisse : ex illo fonte procul
 dubio fluere uoces illas : me uix præstare posse, ut
 is essem, quem Iulius Camillus fore recepisset : eo-
 dem illa de meis epistolis. pertinere : quòd tanti ui-
 ri testimonium, quod ille multo amplius, quàm uo-
 lebam, dederat, in dubium uocaretur, id quorun-
 dam minime amicorum artibus effectum esse : ne-
 què uero tam accurate quicquam me unquam scri-
 pturum, quod animos istorum ipsa maleuolentia
 ieiunos satiare posset : mihi iam non cum Cornelio,
 sed cum Iulij Camilli æmulis rem esse : cum illis, si
 Patauium irem, suscipiendam necessario dimica-
 tionem. itaque deliberationem conclusi : è re mea
 nequaquam

nequaquam fore, si in has turbas conijcerer, à quibus & natura, & uitæ meæ ratio penitus abhorreret. ueni domum, non iam dubitans, quid mihi faciendum esset: ualde tamen iratus ijs, qui & talem patronum, & tuam, & Bernardini consuetudinem mihi eripuissent. Incensus dolore ea ad Cornelium scripsi, quibus maleuolos accusans, quid facere decreuissem, non aspere, sed aperte, sine ulla circuitione explicabam. Hic tu me rogas, in quo amicitiae nostræ iniuriam facis, ut me totum uobis remittam, & placabilem præbeam: quæ bono animo dicta sunt, ne durius accipiā. tu ergo alicui me iratum putas? uehementer erras mi Iosephe, si hoc de me tibi persuades. An ignorare me credis, quā ridiculum fuerit, me hominem transalpinum in Italia Italo uel ignobili irasci? ueni igitur, si præteritis nihil offensus es. amabo, mi Iosephe, sustine te parumper, et, ubi rem omnem audieris, consilio me iuuā. ego simul ac mea uobis exclusum credidi, dixi oratori, de Patauina illa conditione quod sperabam mihi non successisse. In quem sermonem cum ingressi essemus, multa mecum ille humanissime, ut solet, disseruit. De discessu nihil certi se ante constitutuere posse quā literas è Gallia accepisset: & quoniam

quoniam à uoluntate Regis hæc penderent, fieri
 posse ut hic quartus annus quintum adduceret: se
 in utrâque partem æquissimo animo esse: optimum
 sibi uideri, si non prius me commouerem quàm de
 uoluntate regia certior fieret: siue enim manen-
 dum, nihil esse, quod laborarem: siue decedendum,
 tunc quoque satis maturum, ut meis rationibus
 prospicerem, fore. Dixi mihi uehementer consilium
 probari, & in utranque partem uideri tutissimum:
 itaque me eo usurum. in quo sine maxima leuitatis
 suspitione non perseuerare non possum: hoc loco
 non urgeo, ut mihi consilium des, & sententiam
 de his rebus exponas tuam. mihi certum est quid-
 uis potius perpeti, quàm constantiam non retine-
 re. Duo modo abs te peto: unum, ne me iracundia,
 aut arrogantia, sed iustissimis causis, quo minus ad
 uos hoc tempore ueniam, prohiberi putes: alterû,
 Episcopo Cornelio ut istud ipsum persuadeas: cui
 quidem propter eam uoluntatem, quam erga me
 declarauit, tantum debere me existimo, quantum
 si me omni beneficiorum genere cumulasset. Bene
 Vale, et Bernardinum, si placet, meis uerbis pluri-
 mum saluere iube. Venetijs.

PETRUS

Petrus Bunellus And. Cornelio Episc. Brixienfi S.

IULIVS Camillus, uir summa eruditione, & rara probitate, ita mecum discedens egerat, quasi de re mea amplius deliberandum non esset. Cuius ego promissis impulsus statim à discessu illius Patavium sum profectus, tum ut fidem, quam is tibi de me dederat, liberarem, tū ut, si uelles, eruditionis meae, si modo ulla est, periculum facere posses. Itaque domum tuam ueni: cum Iosepho primum, deinde cum Bernardino, optimis sane uiris, sum collocutus: hoc responsum tuli, eo die te minus recte ualere, de medicorum sententia, ne quid ad morbum accede: et, a rerum grauiorum administratione in totum abstinere decreuisse: neque uero dubitandum, quin tibi ratum, gratumq; esset, quicquid Iulius Camillus de mercede mecum tuo iussu confecisset. redirem modo Venetias, ab oratore, cuius uoluntatem semper excipiebam, de abitu impetrem: tibi quidem certe meum aduentum expectatissimum esse. ut illi te uelle confirmarunt, ita feci: & iam libros meos in nauem imponere cogitabam, cum te Venetias, quasi colligendi tui causa, uenisse de

de nonnullis audierā, Ne multa, nihil mihi prius faciundum putavi, quā ut te primo quoque tempore quamhonorificentissime salutarem. Ex eo congressu capere suspicari, dicam aperte, ut mea fert natura, te maleuolorum quorundam obtrectationibus immutatum esse. ita enim mecum locutus es, quasi dubia, & incerta plane adhuc essent omnia. te scriptorum meorum nihil legisse: quā longe per linguæ Græcæ studia processissem, nescire. uehementer sane admiratus sum hæc tum demum abs te dici, cum integrā mihi non essent omnia, & cum iam in eum locum me demissem, unde non facile exitum reperire possem. quodcum neque familia Corneliorum, neque prudentia, neque uero fide tua mihi dignum uideretur; totum hoc ab inuidis hominibus manasse, mehercule non dubitavi: facileq; intellexi, quam rem apud te mihi adiumentum allaturam sperarem, eam uel maxime contra me facere. commendatio non uulgaris Iulij Camilli, quæ me apud te in gratia ponere debuit; magnas inuidiæ procellas, quæ nullo negotio hominem Gallum in Italia obruere possent, excitauit. et quidem uir mei amantissimus nihil prætermisit, quod meis rationibus conducere existimaret. uerum ut nunc re ipsa

sa

sa exerior, abundantia quadam amoris lapsus est, ea enim me inuito ac reclamante scripsit, quæ maximam, ut temporibus istis, ad conflandam inuidiam, multorumq; odia concitanda uim habent. Quod igitur mihi plurimum prodesse debuit, id quorundam iniquitate in perniciem meam conuersum est totum. illud tamen in hac mea infelicitate percommode cecidit, quòd priusquam penitus in familiam receptus essem tuam, cognoui tum ex uultu, tum ex sermone, me occulte, & per cuniculos à nescio quibus oppugnari. semel enim admissus in tuorum numerum, sine summo animi dolore eijci non potuissem. nunc autem excludi me tum facile patior, tum etiam gaudeo. quid enim miseriùs medici, aut fingi potuisset, si in domum quidem tuam essem ingressus, ex qua aut statim cum ignominia exeundũ, aut, si in ea permanere uellem, perpetuo animi dolore contabescendum esset? tanti, Deum obtestans iuro, apud me non sunt omnes omnium diuitiæ. equidem animi tranquillitatem mihi eripi nolo: quam ut retineam, cedam inuidiæ, cedam maleuolentiæ, neque de hac re posthac me tibi offerã. quanquam enim tibi homini doctissimo, & humaniss. satisfacere, nisi fallor, possum: Cornelio tamẽ,
idest

ideſt hominì locupletiffi tam multis literarum nomine aliquid expectantibus obſeſſo, ſatisfacere non poſſum. Hæc ſcripſi ad te ſumma libertate, ut ingenium meum, & ſtudia noſtra, a quibus omnis ſimulatio abeſſe debet, poſtulant, quæ ſi tu non aliter accipies, atque à me ſcripta ſunt, meam hanc querelam ad alios quosdam; ad te nulla ex parte pertinere iudicabis; Ego cæteris in rebus meum officium, operam, diligentiam, obſervantiam ad te deſero; tu, ſi placet, non eo minus, quod apud te non uiuam me tuum eſſe exiſtimabis. Equidem quæcunq; tum ſanctiſſimo religionis Antiſtite, tum benigniſſimo literarum patrono digna erunt ſemper dete, & ſentiam, & prædicabo libenter. Venetijs.

Petrus Bunellus Carolo * S. D.

NISI Petrus à Monte aureo te ualde amaret, & niſi ſalus tua mihi curæ eſſet, nunquam aut ego illi id oneris impoſuiſſem, aut ille tam duram tui admonendi prouinciã ſuſcepiffet. officium noſtrum ab optimo animo, tuiq; amantiſſimo proſectum eſt. quod tu aliter ſi accipis, non facis ut te dignum eſt. nos quidem certe, ut pro utroque tibi pollicear,
freti

freti conscientia, in quam partem accipias minus laboramus. Nam quod tibi Petrus noster durior uisus est, ita comparatum natura esse certo scio, ut qui grauissime ægrotant, facere medicinam uolentibus irascantur. sed rursus iðdem morbo depulso, recuperatâq; pristina ualetudine, se, quid ualeant, quod uiuunt, illis ipsis, quibus antea succensebant, debere præferunt, & prædicant. Quod te aliquando facturum non dubitamus. Nunc quidem si tibi acerbi sumus, illud uicissim tibi fac in mentem ueniat, nos longe maiorem ex hac tua morum intemperantia traxisse dolorem. te ne iuuenem Gallum, honesto inter tuos loco natum, literis tinctum, & nunc non optima inter Italos conditione uiuentem, addo etiam, quod caput est, christianum, meretricio amorì deditum esse? Quid attinet tam multis de pietate christiana disputare? & ea, quæ à primis illis nostræ religionis antistitibus de bene uiuendi instituto tradita sunt, legere: nisi uita, & actionibus illorum præcepta coneris exprimere? Quod si tu dum Italici quodammodo seruis, inops a pecunia, ad has res turpes animum adijcis: cum te aliquando in libertatem asserueris, in magna rerum abundantia quid te facturum credibile est? An re-

liſta patria, tot periculis aditis in Italiam uenien-
 dum tibi putaſti, ut iſtis pulcherrimis uirtutibus
 ornatus, domum aliquando redires? Niſi forte fla-
 gitioſis iſtis illecebris delinitus adeo, & captus es,
 ut patriæ, & tuorum charitatem ex animo deleue-
 ris. Recordare quaſo, quæ tibi Raynerius, adole-
 ſcens ſane ut nobiliſſimus, ita omnium quos ego in
 uita unquam uidi optimus, dixerit, cum domi no-
 ſtræ in hortis deambularem. Iam tum illi pru-
 dentiſſimo inueni uitæ tuæ ratio ſuſpecta erat: &
 tu quaſi male tibi conſcius hæſitantibus uerbis re-
 ſpondere uiſus es. habeo alia multa minime dubia
 argumenta, & non nullorum firma teſtimonia,
 quibus ſane uterer ſi neceſſe eſſe ducerem. ſed ne-
 que te ego reum peragere in animum induxi, ne-
 que tu ea, quæ comperta ſunt (ut puto) negare au-
 debis, ne ad priorem culpam impudentiæ crimen
 adiunxiſſe uideare. tu quidem ut pulchre tibi con-
 ſulueris, ita abunde nobis ſatiſfeceris ſi, animum
 tuum in cogitationibus impudicis occupatum ad
 ſtudia bona, & pietatem colendam totum traduces.
 hoc à te omnes tui expectant, hoc religio chriſtiana,
 in quam tu non ut uulguſ ſolet, ſed præcipua qua-
 dam ratione ingreſſus es, hoc inquam à te requi-
 rit.

rit. Nos qui tibi bene cupimus, qui te honestissimū
esse uellemus, monemus, hortamur, obsecramus de-
nique, ut fidelissimis amicorum consilijs pareas,
& ne potius hanc ætatem teterrimis uitijs impro-
borum exemplo prouocatus corrumpi patiare. Be-
ne uale. Venetijs.

P. Bunellus Paulo Manutio S. D.

EGO mi Paule Patani in præsentia ita liben-
ter uiuo, ut præter tuam, & Rhamberti nostri sua-
uissimam consuetudinem nihil admodum desiderē,
simulq; interdum mihi succenseam, quod non reli-
ctis uestris paludibus, in quibus ocio, & desidia
marcebam, citius huc aduolarim, ubi paucis hisce
diebus plane totus recreatus, & in antiquum sta-
tum pene restitutus mihi uideor. itaque totam hye-
mem, nisi quis casus mea consilia perturbabit, cum
libris meis hic iucundissime traducere deliberatum
est. ineunte uere, si ita rationes nostræ postulare
uidebuntur, aliud consilium capiemus. Interim quo-
niam ego domum tuam uentitare, & pomeridia-
nas horas, quemadmodum Venetijs solebam,ambu-
lando, & colloquendo consumere non licet, literis
crebro mittendis hoc incommodum sarcire uolo,

si modo, ut mihi in nostris sermonibus quicquid in
 buccam uenerat impune effutire licebat, ita tu epi-
 stolas nostra garrere, & interdum uel potius sem-
 per hallucinari æquo animo patiere. nam si tu me
 aliquid industriæ in scribendo ponere uoles, quod
 nihil nisi elaboratum, & tuorum scriptorum simile
 tibi legendum putes, prædico tibi, raras, aut etiam
 nullas a me posthac literas accipies. Quare si of-
 ficiū hoc literarum uulgare quidem, sed amicitia
 nostra minime indignum non aspernaris, noli plus,
 quàm aut ingēnium meum, aut studia patiantur,
 à me exigere. sic igitur tecum agam ac si præsens
 essem. quicquid in mentē ueniet, in epistolam cōij-
 ciam: neque, quàm inter se cohæreant, mihi curæ
 erit. et quidem occurrit primum illud: me plurimū
 tibi debere: a te in me beneficia profecta innume-
 rabilia, gratiam hoc tempore a me haberi posse,
 referri non posse. Quod si tū memoria sola conten-
 tus es, nemo omnium qui uiuant me in ea præstan-
 da superabit. Nolo pluribus tua merita erga me
 commemorare, ne aut ego blandus à te existimer,
 aut amicitia nostra, quæ per se firma est, huiusmo-
 di ineptiis egere uideatur. Tantum hæc attin-
 gere uolui, ne tu officia, quibus me obstrinxisti, ma-
 le

le posita aliquando existimare posses. Verum de his haftenus. sequitur illud. Quod tu mihi discedenti in mandatis de Osio dederas, curavi diligenter. conueni hominem, sed is iam, ut mihi dixit, epistolas fa. ad Anianum miserat. hortatus sum ut non nihil literarum ad te daret. negauit à se quicquam latine, & eleganter scribi posse. ut uideo nemo in hoc genere me uno est faciliior, aut, ut uerius dicam, stultior. cæteri sua scripta premunt, à nemine legi patiuntur, quod lente, fastidiosèq; ab eis elimatum est, rude, & impolitum sibi excidisse queruntur. neque uero hæc à me ideo dicuntur, quasi Osium in eo hominum genere ponam, quem ego et probum, & doctum esse cognoui. sed sunt alij ad quos magis hæc pertinent, quorum exemplo in hoc artificij genere ego quoque fortasse aliquando non nihil proficiam: tecum tamen, & cum amicis, ingenue, candidè, simpliciter agam. habes epistolam, quæ ut diligentiae parum, ita beneuolentiae plurimum præ se ferat. ad quam tu, si uidebitur, & cum per ociũ licebit, rescribes. et siquid rerum nouarum habebis certiores nos facies. Vale. Honorato, & Magnulo tuo, uel si pateris nostro, ex me salutem plurimam dicito. Patani. XIII. Cal. Dec. M. D. XXXIII.

qui, ut officium deserant, facile spe aut metu cogi
posse uideantur. illud tamen persuasum habeas ue-
lim, utcunque fors cadat, me tibi strenuam operam
esse nauaturum. Apud omnes, de quibus scribis,
te commendabo non leuiter, sed quantum ponderis
sermoni opportuno addere potero. quod iam multo
antehac feci, nec, si admonitus non essem, facere de-
stitissem. in summa illud contendam, ut nulli un-
quam occasione in te ornando uidear defuisse. Vale.
Venetijs, IIII. cal. Maias; 1519.

Victor Faustus Iohanni Baptistæ Rhamnusio S. D.

LIBET hoc mearum literarum initio, suauis-
sime Rhamnusi, tecum ita præfari: Adsum atque
aduenio Acheronte uix uia alta atque ardua, per
speluncas saxis structas asperis, pendentibus, ma-
ximis, ubi rigida constat crassa caligo inferum, ut
ait poeta. hæc enim, paucis immutatis, Veneto na-
uali conueniunt; ubi anno superiori, magno meo
cum labore, talem sum denique uisus gloriam as-
sequi, qualem, si priscis licet nostra componere, &
Hercules olim ab inferis reportauit. siquidem ille,
non tamen sine Theseo, Cerberum, ab orchifanci-

bus abstractum, cœlo atque huic luci ostendit, unus
 ego, nemine adiuvante, immo utinam non multis
 eorum, qui minime debuissent, contra nitentibus,
 tot ab inuitis, ut ita dicam, Cerberis ignorationem
 quandam cum malignitate coniunctam auulsi, ue-
 ramq; græci, hoc est antiqui remigij rationem, tot
 annos iam sepultam, quæ cum diu olim ubique gen-
 tium uiguisset, post Augusti monarchiam pacato
 mari, ac demum scythicis armis omnia uastanti-
 bus, una cum imperio Romano conciderat, amota
 barbarie, unum è ueteribus nauigijs maxime habi-
 le, quod quinis agitur remis, ædificando ita, ut ue-
 tusta illa mensura ad præsentem usum accommoda-
 retur, mundo iterum & huic nostræ ætati, magno
 cum decore ac emolumento urbis huius, si sua bona
 nouerit, ostendi. nam quid, per deos immortales, in
 hominibus eruditis literæ disciplinæq; laudentur,
 si nihil ex ijs, quod patriæ, aut amicis prodesse pos-
 sit, eruatur? quid autem aut inuentu difficilius, aut
 factu laboriosius à quoquam, nostra saltem ætate,
 editum est, quàm quod ipse nulla mediis fidijs alia
 de causa magis, quàm ut hanc doctrinarum profes-
 sionem ornarem, doctorumq; hominum dignitatem
 augerem, nuper effeci? sed nescio quo fato fiat, ut
 nihil

nihil usque adeo egregium, atque ab omni parte politum reperiatur, quin id multi usque quaque non probent; uelut in me nonnullos fuisse audio, & quos mehercule rerum aestimatores, qui interim, dum nauem ædifico, meæ, qualescunque sunt, literæ, tibi certe et uniuersæ ciuitati decennium iam & amplius cognitæ, ne picis credo forte maculam aliquam contraherent, uererentur. quasi uero aut in Alcæi carminibus, quæ dura nauis dura belli inter pericula scripta sunt, nauticum quippiam sit, quod ipsi possint agnoscere, aut in Xenophōtis, philosophiæ præsertim, libris quidquam, quod uel castræsem fremitum, uel classicum etiam ipsum referre uideatur, ipsi forte animaduertant, quoniam eorum alter in mari pugnando, alter, ductando exercitu, in ultimo pene oriente maiorem ætatis suæ partem contriuerit. an fortasse, quia græce nesciunt, hoc est, ut puto, recte eruditi non sunt, in Tibullo, atque Catullo aliquid, quod militia ipsis detraxerit, oculatissimi homines uident, propterea quod alter diu in Messallæ, alter in Pisonis cohorte fuerit? ignauiæ, mihi crede, potius est, quàm ullius sapientiæ, sese perpetuo in testudinem quampiam abdere, aut cancellis concludere, nec quicquam toto uitæ spatio,

maiores sibi laudem acquisuerit, quam quantum infamiae fidibus publice canendo, quod munus aliqui libenter literati homines ad se trahunt, sibi uero princeps pepererit. Verum quid tibi ego Reges tantum architectos nominem? cum Deum ipsum optimum maximum ea potissimum de causa suspiciamus, quod machinae huius tantae, quae mundus appellatur, olim artifex fuerit, ac, si usquam alibi per se huiusmodi architecturae professio possit antiquam illam retinere dignitatem, profecto hac in urbe, quae medijs in undis posita, maris imperium sibi iam tot annos uendicare contendit, magno in honore habeatur, necesse est. nisi quis forte usque adeo uecors sit, ut, dum ipsam uituperet, se praecipuum simul patriae suae studium damnare non uideat. At, inquit ille nescio quis, sit quantum libet nobilis tua ista industria; te distrahit tamen, totumque literis uacare non finit. quid rogo istuc ad te pertinet? num tua res agitur, si ego propterea uel poema nullum componam; uel meorum temporum historiam non scribam; uel aliud nihil literarum monumentis, quod mei nominis posteritati consulat, tradam? quid autem, quod & haec simul fortasse facio? atque, ut non faciam, satis certe literati uiri fungor officio, si tantum quotidie

tidie literis impendo, quantum ijs, qui græce multa nesciunt, atque adhuc indigēt præceptore, satis faciat. quid igitur modū alienæ ponis industriæ? memini equidem superioribus annis, quod te quoque memoria tenere certo scio; me diu nihil, nisi quod eloquentiam aleret, fuisse meditatū; sæpiusq; frequētissimæ concionis tanto plausu orasse, quanto uix alius. at cum ad rauim usque desudasset, ne obolo quidem benignitate cuiusquam auctior factus sum, sed nihilo secius, quam pridie, olusculum fuit in cœna. qui, malum, ergo inuidiosum usque adeo sit, si, iam uergēs in senium, maiorem mihi pecuniam mea non nisi honestissima industria parare decreuerim? Cæterum, ut mei semper instituti fuit, parum quid pessimus quisque de me sentiret curare; iam missa hæc faciam: quid tibi cum quartana, nimium tua familiari, negocij sit, quo studiorum, quo'ne rusticæ uoluptatis genere diem traducas, quando ad nos cogites, ad me si scripseris, magna ex parte, quo pene conficior, meum tui desiderium lenies. sed heus: quid si ego, quando tu à Rhamnusia tua uilla ægre auelleris, naualis rei paulum intermissa cura, ad te, ut tecum per aliquot dies, hoc est, ut ipse mihi uinam, excurro?

non

non ita, inquires, nostri amans, non ita strenuus es, ut eripere te tuis occupationibus, tanquam compedibus, & ergastulis, possis. uix equidem potero: sed tua me tamen suauitas, omnium suauissime Rhamnusi, allicit, tua uirtus trahit. quanquam uolens libensq; à me ipso ducar: ut in Marsangi uiridi ripa, solutus omni cura, tecum ad lenē undæ furrum canam: O fortunati nimium. Vale: & aut te nobis redde quamprimum, aut me magno cum comitatu: ne timeas: me, inquam, unum expecta. Vale, Venetijs, M. D. XXX. Idibus sept.

Paulus Sadoletus Lazaro Bonamico S. D.

IN omnibus tuis ad patrum literis amabilis quædam est accessio mentionis de me tuæ, itaque ex earum lectione duplici uoluptate semper affici soleo, & ea quam ex tuorum scriptorum humanitate atque elegantia capio, & ea quæ propria est amoris erga me tui. postremæ uero tuæ hoc amplius suauitatis habuerunt, quòd una uenustissimū carmen tuum ad Hipp. Medicem cum eis fuit, & quòd de eo iudicium meum requisuisti. quorū mihi utrunque ualde gratum fuit, & legere amicissimi hominis,

re, & in utroque haberes ingenij tui fructus præ
stare nobis quæas, uerū habes ad ea parui literas.
Nos in Aristotelis Politicis uersamur hoc tempore,
magna quidem spe, sed maiore delectatione. caue
enim putes quicquā me antea auidius legisse, quā
hos maximi illius philosophi libros. in quo studio te
aliquando, ac tuam opportunam mihi operam desi-
dero, ut quo auctore huius philosophiæ, quæ ad mo-
res pertinet initia attingi, quandoquidem tu me ad
libros τῶν ἡθικῶν omnium princeps admonisti, eo-
dem hæc adiutore extrema persequerer. sed hæc o-
ptari melius, quā sperari possunt. Tu quod me
multum amas, idq; iussis de causis te facere existi-
mas, facis quod tua uirtute, & bonitate dignum
est. sed est eiusdē bonitatis, atque humanitatis tuæ,
cogitare, me, cum non pauciores causas habeam di-
ligendi tui, ne in amorē quidem, ac beneuolentiā ti-
bi concedere. Vale, & meis uerbis Bembo, & Polo
summis uiris, quorum ego uirtutem magna obser-
uantia, atque admiratione prosequor, plurimam
dic salutem. Carpentoracli, V III. cal. Decemb.
M. D. XXXIIII.

Bernardinus Maffeus Lud. Castelnitro S.

ACCEPI ex amantissimi, & suauissimi fratris literis, quas ad me proxime dedit, te Romæ esse; quod quidem me summa uoluptate affecit, cum te inde inuitissimum superiore anno discessisse recorderer. Nunc uero ita te in urbem reuertisse mihi persuadeo, ut diutius istic tranquillo, pacatoq; animo esse possis, longe à domesticorum tuorū acerbitate seiunctus, à quibus quidem honeste dissentire non poteras, teq; ad eorum uoluntatem accommodare animi tui altitudo minime patiebatur. quam ob rem quieta esse omnia, ex isto tuo reditu coniectura assequi mihi uideor, ex quo non solum tibi, sed mihi ipsi gratulor. Illud uero hæc me minus æquo animo ferre cogit, hoc est mirificum tui desiderium, quod quomodo tanto temporis interuallo ferendum mihi sit, profecto nescio, nisi id crebra literarū missione leniatur. quid enim dicam de iucundissima illa nostra consuetudine? deq; familiarissima sermonis communione? quid de studiorum similitudine? qua superioribus temporibus coniunctissimi uiximus: quibus omnibus cum me priuatum intelligā,
quo

quo me animo esse censes? ueruntamen mi Ludouice tu hæc omnia mihi ex quadam quasi tristitia ingaudium poteris conuertere. neque enim tam acerbæ hæc mihi accidisse existimaui, quàm illud gratum, si fratrem meum, tui studiosissimum, completaris, ames, foveas, eumq; minime firmata uirtutis stirpe, de uia decedere nullatenus patiari. nosti enim quàm lubricas uias adolescentiæ urbs nostra ostendat, iucundissimarum rerum uarietate, ac tot tantisq; uitiorum blandimentis referta, quibus facile illa ætas capitur, sopitaq; conninet uirtus. Quamobrem te oratum uelim, ut eum cunctantem, ac sibi quodam modo diffidentem excites, tuaq; uirtute, ac prudentia à lapsu sustentes, eumq; ad incepta studia cohorteris, ut dignus parentibus, ac maioribus suis appareat. Sed hæc tu melius. Iulius Arcanus nonis Sept. Patanum uenit, seq; ad Ricci nostri amicitiam adiunxit, nobiscumq; paucis diebus commoratus Venetias nauigauit, in Carnos profecturus: at Riccius X. cal. in patriam excurreret, ut cal. Dec. reuertatur: postq; eius reditum familiarissime uicturi sumus dum hic erimus. Arcanus uero domesticorum iniurijs agitatus, simul ac ex meis literis te istic esse cognouerit, in urbem ad-

uolabit, cum ad summā, atque incredibilem ipsius
in ista loca proficiscēdi cupiditatem tui desiderium
acceserit. De Cataneo nostro, noui quid ad scribam
nihil habeo, nisi me ad eum literas saepius misisse,
quibus me totum patefeci, nec ullum adhuc respon-
sum accepisse. quare illas interijisse puto: durius e-
nim aliquid de illius uoluntate dubitare, necessitu-
do, quæ iam pridem mihi cum illo intercessit, mu-
tuis firmata officijs, minime patitur. Tu si quid ha-
bes quod nostris dignum literis indices, me quam-
primum facias certiore. Vale.

IO. Baptista Egnatius Matthæo Aduocato S. D.

NON licuit mihi, id quod uehementer opta-
bam, aut celerius, aut uberius ad te scribere; quòd
aduersa uoletudine mensem amplius afflictatus, in
hunc usque diem conualescere adhuc omnino non
potui. quæ enim quotidie morbi tentationes acce-
dunt, eæ etsi permolestæ ita non sunt, ut eas facile
robustiores ferre non possint; mihi tamen uel lenio-
res quæ accidunt, & corpus, & animum sic exer-
cent, ut literis operam dare, à quibus auelli gra-
uissimum per se est, corpore affecto, animoq; exerci

to non detur. Accipies tamen interim à me, si non rerum omnium copiam, quod & pro tua erga me uoluntate, & pro publica utilitate cupiebam, saltem, quod ad rem præsentem attinet, tantum, quantum tibi uiro doctiss. & Veneti nominis studiosissimo satis esse possit. Iam primum, quod de Timauo quæris flumio, tametsi accurate tu quidem, & copiose multa tuis literis, id tamen scias uelim; nunquam à ueteribus addubitatum, quin ad extremam Carnorum oram, è septem fontibus labens, inter Carnos, & Iapides limes esset, ab eoq; Carniæ oræ auspiciu sumeretur. Atque, ut Plinium, Strabonem, quos tu testes adducis, omittam; (nam de poetis mox) Mela certe noster, solertiæ, & eloquentiæ in eo genere scribendi non uulgaris, in ora à Tergeste proximam esse Concordiam fatetur: apud quã Timauus, nouem capitibus exurgens, uno postea ostio in mare mittitur: deinde Natissam non longe à mari ditem attingere Aquileiam. sed sicui hoc in genere credas, Antonino principi, qui uniuersum imperium Romanum peragrauit, dimensusq; est suis spatijs, certisq; interuallis, fidem præcipuã tribuas. ille igitur in suo itinerario non modo Timauum Carnis uendicat, sed, dum eam describit

oram, à Timauo semper auspiciatur. primum enim sic per Liburnicam Sceſiam M. paſſ. CCXIII. à fonte Timai, & iterum ab Aquileia per Hiſtriam extra mare Solonas M. paſſ. CIC. ſic fonte Timai. quo plane principis alioqui magni teſtimonio nihil certius, nihil luculentius eſſe poteſt. nō ſolum enim inter Liburnos eum locat, ſed principium inde ſemper ducit. Iam nec Vibij Sequeſtri iudicium contemnere haudquaquam debeant, qui aduerſantur publico noſtrati iuri. Sequeſter igitur Timauum Aquileiae Gallicae aſtruit. Quid, quod Sontium amnem ueterum agnoſcunt nulli, ſed tantum recentiores? ut, niſi me memoria fallat, Sontij amnis nomen primum legatur ſub aduentum in Italiam Theodorici Gotthorum regis, prodeſſentibus certatim ſcriptoribus, ad Sontium uictum Odoacem memorabili praelio à Gotthis. qui alioquin, ut inter Carnicos fluuios, minime contemni à ueteribus debuiffet. is iuxta Iapidiam, quae hodie magna ſui parte in Caruiolam, & Carinthiam abiit, ex alpibus fluens, Septentrionem primum, mox brumalem occaſum petens, inter ſaxa, montesq; praecipit fertur. iam Plytiana inſinuatus ualli ſatis placidus, iterum uiolentus inter ſaxa, rupesq; deprehenſus occurrit rurfus prope

pe Caporetum, (id loci est nomen) ponte sexagenū
 pedum longitudine; unoq; fornice utranque ripam
 complexus, mitior labitur; Tulminiāq; arcem præ
 tergressus, Hydriāq; amne auctus, in Sontiacam
 uallem (Runcinam accolæ uocant) apertis campis
 liber, Vipano amne ditior, & iuxta Aquileiam
 Natifone leui alueo in mare erumpit. ut credere
 possis Natifonem tantū à ueteribus cognitum. quo
 fit, ut minime ueterum scriptorum auctoritas suf-
 fragari his possit, cum Sontium limitem fori Iulij
 indicant, cuius ne meminerūt quidem. quid, quòd
 recentiorum nulli calculum pro his ferant? an Ae-
 neam Siluiū testem laudent? qui stirpis Italicae su-
 um in Germanos studium ubique testetur? quod in
 posteros etiam transmiserit. quis igitur eius testi-
 monio aut derogat, aut abroget? audi igitur, quæ
 uir sane in multis diligens in sua Europa prodide-
 rit. Carni, inter quos Iapides enumerantur, Histros
 sequuntur. Sclauī tamen, quorum sermo in terris
 uiget, Carnos bifariam diuidunt, Carniolam dupli-
 cem fatentes, alteram siccam, aquarumq; egentem,
 in qua Histros collocant, et Chersos, qui medios in-
 ter Labacum, & Tergestum incolunt montes, &
 ad Timanum usque proferuntur: alteram irriguā,
 N 3 aquisq;

aquisq; abundantem, in qua sanus ortum habet,
 & Nauportus, qui Labacus dicitur. hodie uero flu-
 uium, & oppidum in eo tractu Lubianam accolæ
 uocant. sed ille idem, dum Histriæ paulo ante me-
 minit, hæc uerba subtexit. Histri hodie Sclau sunt:
 quamuis maritimæ urbes Italico sermone fere utan-
 tur. provinciae huius pars maritima longe melior
 Venetis paret: mediterraneam Austriæ principes
 obtinent. Et paulo post. In hac terra nihil memo-
 rabile inuenias, præterquam quod Australes, &
 Venetos magna de finibus cõtentio agitet: ad quas
 lites componendas sæpe à Cæsare arbitri dati, in-
 ducias quidem dedimus, summam rei amputare nõ
 potuimus. Hæc Pius. cuius scriptis quis hodie
 Germanici nominis non tantum tribuat, quantum
 Palladis, ut aiunt, suffragio? nam Senis Etruscis or-
 tus, à secretis Friderico Cæsari fuit, summa cum au-
 ctoritate, & gratia. cuius principis fauore digni-
 tatibus amplissimis ornatus ita est, ut pontificatũ
 adeptus, omnem eam dignitatem ad Friderici nu-
 tum rexerit. De Histriæ igitur finibus ille dubita-
 tum, atque disceptatum se arbitro est auctor. De
 Carnorum finibus ne uerbum quidem unquam fa-
 ctum. Quid quod proferre habeant, ni fallor, nul-
 lam

lam unquam contentionem de finibus Carnorū inter Cæsarem, & Venetos fuisse, nisi post Gradiscam ab his receptam, & bellum postremo gestum? Cæterum quando huc Ventum est, non possum, in hac præsertim causa, non omnia colligere, quæ omnem tibi scrupulum ad præsens eximent, reliquis postea doctis ingrata nō sint futura: Hanc Carnorū oram Venetiæ finibus à ueteribus inclusam: quod Linius sit auctor, qui Aquileiam in Venetia deductam coloniam prodat, pulsus inde Gallis, et iterum Aquileiensem agrum Gallorum appellet: quæ res Martialem ab errore vindicet, qui Euganeum Timanū appellet, id est Venetum, cuius alueo felicem Aquileiam mox canat, nam Lucanum ab errore, in quē satis apertum atque insignem lapsus est, id asserat, quod suam Pharsalidem inemendatam reliquit, Pisoniæ coniurationis pœnas morte immatura luens. satis enim constat, præter tres primos libros, quos cum Argætaria Polla uxore diligentius emendarit, reliquos informes, ursinæ carnis in morem, esse editos. Nec sane est, cur quis miretur Blondum, alioqui non pessime meritum, illustrandis Italicis rebus falsum: qui sane multo jœdius est lapsus in multis. sed & ea ætas hominem tulit, ut magis

mirari possis hominis per ea tempora solertiam, et industriam, quàm accusare aut ignauiam, aut negligentiam, præsertim cum poeta prudentiss. ignoscat facile ijs, quibus magno in opere somnus obrepit. Omitto igitur Sabellicum tibi notum, omitto Volaterranum abs te citatum, adde huc Ioannem candidum Foroiulensem, qui & ipse patriæ suæ corographiam aggressus, quæ uulgo excusa legitur, à Timauo exordium sumit. ille igitur in hæc fere uerba. Timauus ex Iapidie finibus ortus, non longe à suis fontibus progressus, in cuniculū quasi manufactū præcipitatur, atque ita absorptus diu per subterraneos meatus haud procul à mari, pluribus fontibus erumpens, statim uno nauigabili alueo mare ingreditur: ut intelligere iam possis, unde eminentiss. uates Iapidis arua Timauī dixerit. sed & statim à principio operis: Portus habet præcipuos, Timauum, antiquum Italiæ terminū, (Fontanellas accolæ uocant) ex Timauo Pontianum, ex fontibus Montis Falconi Sdobium; quem Sdoba amnis efficit. ij tres Tergestinum sinum prospiciunt. Hæc sunt, uir ampliss. quæ ad præsens respondere ad tuas potui literas. non dubito, quin tibi meliora multo domi nasci possint, si modo incumbere

huc

huc uolueris. quod te facturum, & præstans erga
Venetam remp. studium, & spectata in omnibus
negocijs probitas tua facile persuadeant. Vale.
Venetijs, VII. cal. Dec.

Io. Baptista Egnatius Romulo Amaseo S. D.

ET amo te mi Romule plurimū, quod tibi per-
spectum plane non dubito; & amare te prius non
desinam, quā uiuere desiero. quod si etiam apud
inferos erit nobis superstes sensus, illuc quoque sen-
sum summi amoris, & beneuolentiæ mecum defe-
ram. quod si quid liberius Lazarus meo nomine
tecū aget; id ipsum à summa mea in te animi pro-
pensione profectū, dubitare haud sane debes. quis
enim saltem in sinu, quod aiunt, querelas non defe-
rat? o securum te hominem, ne beatū dixerim, hac
de fortuna; cum tu in patria inter tuos, uxore, &
liberis, multorumq; gratia sic flores, ut inuidere ti-
bi multi, nullis inuidere ipse possis. ceterū, ut quā-
secundiss. tibi res sint, fluantq; ex animi sententia;
quod perpetuum deos immortales precor: memini-
se tamen amicorū etiam in magna fortuna debes, es-
eorum præsertim, qui non minus te diligunt, quā
admi-

admirantur. potuisti, amabo, citra piaculum huic
 tam amplæ, tam magnificæ interesse lætitiæ, ut
 Egnatius interdum non occurrerit tuus? An sine
 amicis dulce aliquid esse, aut iucundum potest? Dii
 immortales opulentiores tibi amicos propter egre-
 giam uirtutem tribuere potuerunt, amantiorem nō
 potuerunt. sed, quocunque eris in nos animo; ego
 nūquam esse desinam, qui erga te tuosq; omnes esse
 debeo. quod ut re intelligas ipsa, conditionem tibi
 honestissimam, & quam optare uotis etiam debeas,
 offero. in Thilesiū nostri locum, uiri sane & egre-
 gie literati, & certe plus boni, quàm ut hæc ferant
 tēpora, cupio te adsciscere. capies ex industria tua
 centena quinquagena annua: idq; ἀναλίσσει φάσι.
 nam pomeridianis horis duabus ad summum præle-
 gendum tibi nostris scribis, bonarum artium ut nec
 ignaris, sic plane sitientibus, sentientibusq; fru-
 ctum in his maximum esse repositum: quod ad pro-
 fectum mirum in modum facit. Thilesius cente-
 na tamen meruit. tu quinquagena insuper refe-
 res, mea commendatione. quàm honestum, & tu-
 tum tibi Venetiarum perfugium sit, familiariq;
 rei tuæ commodum, facilius tu multo tecum, quàm
 me consiliario, statues. fac saltem, per ueterem ami-
 citiam

citiam nostram, animum intelligam tuum. Procuratoribus cleri nostri, qui tibi hasce reddent, uiris haud improbandis, meo nomine, quantum poteris, *in te uolunt* ut commodos uelim. quicquid in hosce contuleris beneficij, in me collatum existimabis. fac quaeso intelligant, Romulum non minus esse bonum uirum, quam gratum. tametsi qui gratus est, non potest non bonus esse. Vale. Venetijs, calendis Ianuarij, M. D. XXX.

Romulus Amasæus Io. Bapt. Egnatio S. D.

ACCEPI ab te literas X. cal. Ianuarij, in quibus tuum in me amorem, tam multis in rebus mihi cognitum, & perspectum, tuam etiam pristinam iocandi consuetudinem, atque urbanitatis plenissimum leporem agnouì. respondebo prius ei parti, in qua cupere uideris, mihi testatam esse tuæ in me beneuolentiæ constantiam, ac perpetuitatem. me tibi deinde, uel per iocum subaccusanti, quod fecit et ante Lazarus noster tuis uerbis, purgabo: ut, siqua forte alienior ab amicitiae nostræ sanctitate, ut ita dicam, suspicio in eo ioco latet, ostendam, causam certe non fuisse, cur quidquam de mea
in

in te obseruantia, ac fide dubitares. Ac primum, quod affirmas te, quo ante erga me animo, & uoluntate fueris, eadem nunc esse, ac semper futurum, fuit mihi incundissima hæc amoris tui in tuis literis tam expressa testificatio. etsi eam pro eo iudicio, quod de gravitate tua semper habui, proq; mea officij, ac pietatis uerius erga te conscientia, minime necessariam fuisse iudico. Quod uero, secundis me rebus elatum, putarete dicis & nihil ad te iampridem literarum dedisse, & nuper, cum Pontifex maximus, & Cæsar ad hanc urbem aduentarent, te non inuitasse: primum ita uelim existimes, ea uitæ honestius paulo, & commodius agenda adiumenta, quæ summis contentionibus comparata, quotidianis, ac magnis laboribus tueor, non interpretari me adeo secundas res esse, ut uel leuissimi hominis animum fastidiosorem, atque insolentiorum reddere debuerint: sed, ut mihi omnia ex uoto, & ex animi sententia euenerint, tu quidem, si tua me dignum amicitia, id est uirum bonum esse putas, ab ingrati, & immemoris animi uitio longissime abesse existimare debes: aut, si tam longe tibi uideor ab humanitatis officio discessisse, quid est, quod me tantum diligas, quantum & ipse prædicar,

cas, & mihi ipse persuadeo? sed iocaris tu scilicet, ut soles, & me iuuat id tibi per secundissimam, & certissimam fortunam licere. me uero plurimum doleo esse adhuc iniquiore, ac duriore fortuna conflictatum, quàm ut referenda gratia uel minimam tuorum erga me meritorum partem consequi possim. At, inquires, in quauis fortuna ad me scribere potuisti. Ego mediusfidius toties scripsi, quoties scribendi se mihi argumentum obtulit, neque tu, opinor, sæpius. inanium autem, & ambitiosarum quoddam literarum genus à tam confirmata, & inueterata amicitia abesse oportere semper duxi: præsertim cum, ut mihi non defuerunt, à quibus de ualitudine, rebusq; tuis prope quotidie certior fierem, ita tu istic habueris Virgilium affinem meum, ex quo de me, quicquid quæsissem, facile posses cognoscere. Atque ego ei quoties per literas mandavi, ut tibi à me salutem diceret, deq; statu meo te diligentissime doceret? quod uero ad illum potius quàm ad te scripserim: ad ipsum certe, ac multos eius ordinis, cum res cogeret, scripsi, & populari sum scribendi genere usus: ad te uero neque ualde fuit quod scriberem; & qui semper non modo negocijs distretus, sed maximis etiam molestijs obrutus fuerim,

cum

cum quales uellem non possem, malui nullas, quàm indignas, quas legeres, ad te literas dare. At non inuitaui te: ne patrem quidem meum. nam quid ego eos inuitem, in quorum officio ac potestate & domum totam, & mea omnia magis, quàm in mea ipsius, & esse uelim, & uelle debeam? & certe ἄρα δὴν ἦ δαῖτας ἱάσιν αὐτόματι ἄρα δὴ. neque uero ut te non inuitaui, ita nō expectaui, qui adduci poteram, te quamprimum ad nos non aduolaturū. et quoties intuebar tempus illud cogitatione, quo te cōplecterer, tecum loquerer, tecum ambulare. tu uero non meam modo, sed meorū omnium, quibus aduentus tuus optatiss. contigisset, expectationem fefellisti. quare non ego, qui te ad communes penates, & ad nos, qui tui sumus omnes, non inuitaui, inhumanior, sed ipse durior, ut agam tecum familiaris, quem neque pulcherrimi spectaculi, & tantæ celebritatis fama, neque nostri uisendi studium ab ocio tuo, ac tuo isto Gelarini secessu potuerit dimouere. Hæc, quæ mei purgandi causa primis literarum tuarum partibus responderem, habui. Illud, si non est omnino superuacaneū, addam: neminem esse, quem quanti te faciam, cuiusq; tam & frequens mihi, & iucunda sit recordatio.

tio. Erat in extrema pagina tua de Thilesiana conditione, in quo tuam de me benemerendi pristinam curam agnoui, me atamen causa, in hoc genere quod labores, nihil est. nam Bononiensium me senatus ornauit, atque honestauit accumulatissime, & se quiduis potius, quam me à se diuelli passurum prae se fert. ei ego abhinc annum fere tertium in quinquennium operam locavi meam. capio S. C. annua certissima HS XII. siue malis aureos coronatos CCC. et est cum auditoribus mihi negotium per temporum intervalla horis singulis, non plusquam nonagies toto anno. Quae quoniam mihi conditio turbulentissimis temporibus in officio mansit, non dubito quin iam tranquillis, & pacatis firmior, ac prolixior etiam futura sit, cum praesertim ad eam tuendam, atque etiam augendam, neque optimorum civium uoluntas, neque summorum hominum studia, nec Clementis pont. max. ac, si quid ad rem attinet, Caesaris etiam ipsius Imperatoris gratia defutura uideatur. Quare nisi eiusmodi quid hinc me exturbarit, qualia praeter spem, atque opinionem multa possunt accidere, unum id mihi certe cogitandum est, ut his, qui de me quamoptime meriti sunt, cum nullis fere alijs facultatibus possim,

sim, officij saltem, atque operæ perseuerantia satisfaciam. De cleri procuratoribus, quos mihi commendas, scito redditas mihi tuas fuisse literas à tonsore meo, qui sibi eas ab homine plane ignoto datas esse dixit. illi me si conuenissent, ac si qua in re opera mea uti uoluissent, tuæ commendationi studium, officiumq; meum non defuisset. respondi epistolæ tuæ tardius, quòd aliquot dies orationis de pace, quam nominatim mihi pontifex maximus decreuerat, me detinuit meditatio. eam cum cal. ipsis Ian. habuissem, Pont. max. ac Cæsare sacris præsidente, in plenissimo flaminum, minorum pontificum, legatorum, & principum confessu; successerunt aliæ nihilo leuiore occupationes: à quibus quod primum ad rescribendum tempus datum est, eo sum usus. te obsecro, ut, qua in te sum fide, non scribendi minus plerunque necessario hoc officio, sed moribus, naturaq; mea, quæ si tibi non esset probata, me tu certe non diligeres, metiare. Vale.
Bononia, X. cal. Febr. M. D. XXX.

Georgius

Georgius Selua Petro Bembo S. P. D.

CVM singularis tua uirtus, qua nihil amabilius esse potest, multis rebus mihi perspecta, me totum ad amorem atque cultum tui iampridem conuertisset, effecit hæc proxima amoris significatio; quæ sese ostendit in ijs literis, quas ad me perhumaniter scriptas dedisti, non ego quidem ut te plus amarem, (nec enim poteram) sed ut tua facilitate fretus, aliquando tandem meum erga te studium tibi per literas declarare auderem. quod equidem coram facere decreueram, eoq; consilio me Patanum contuleram. sed cum mihi tum tui conueniendi potestas facta non esset, quod tu eo ipso die, quo illuc adueneram, rus discessisses, petij ab ijs, quos tecum familiaritate & amicitia ualde coniunctos, à me autem pro sua humanitate non alienos esse scirem, ut te uerbis meis plurimum saluere iuberent, tibiq; de mea uoluntate prolixè pollicerentur. nunc autem animaduerto illos, intra fines mādatorū haudquaquam constitisse, cum ea tibi de me, quæ scribis, prædicarint. quibus si te fidem habere, uirum summi iudicij, ac non potius ita ea interpretari, quasi
 O ab

ab amicis beneuole & indulgenter dicta, existimarem; hunc ex animo tuo errorem euellere conarer. sed ne ipse mihi nimium fauere uidear, si aliū facile adducar ut credam sibi quicquam magnum de me persuasisse; nihil de hac re addam. Vnum illud est, quod & tum eorum sermone significari tibi uolueram, & nunc meis literis confirmari oportere iudico; cum ab omnibus certatim ameris propter diuinas tuas uirtutes, nulli tamen me concedere, qui tui sit amantior, ac studiosior, quā ego sum. Quod autem spem mihi affers aduentus tui, simul ac negotia tua isthic explicaris: est id quidem eiusmodi, ut me in aliquod tempus sustinere possit; sed si tuæ occupationes diutius te retinebunt, ego uel reclamantibus publicis negotiis, in quibus me nūc uersari oportet, accurrā ad cōplexum tuum: quo mihi caue putes quicquam posse esse optatius. cum enim ex scriptis tuis grauissimis & elegantissimis, in quibus, ut breuiter dicam, ipsius antiquitatis uerissime mihi expressa imago uidetur, animum tuum quasi intueri nobis sæpius contigerit: hoc unum ad summam nostram felicitatem deesse uidetur, ut uultu quoque ipso & conspectu tuo aliquando perfruamur. quod quoniam cito fore ostendi, reliqua

liqua in nostrum congressum referuabo. Literas, quas ad Bollinum dedisti una cum p̄sīde, cum primum fieri poterit, ad eum perferendas curabo. Dantesius, cui ego ex tuis literis salutem dixi, in magni beneficij loco habuit memoriam sui tuam: meq; rogauit, ut tibi uicissim suo nomine salutem plurimam ascriberem. Vale. IIII. idus septemb. M. D. XXXIIII. Venetijs.

Cosmus Gherius Paulo III. Pont. Max. S. D.

CVM expectatissimus, atque optatissimus nuncius in hæc loca uenisset, Sanctitatem tuam mirifico omnium Cardinalium consensu, ac incredibili totius urbis lætitia Pontificem Max. esse declaratam; ego quidem pro ea, quam suslineo Christiani hominis, & Episcopi persona, duo munera mihi obeunda esse quamprimū duxi: unum ut Deo Opt. Max. gratias agerem, qui tali quidem tempore eū nobis Pontificem benignitate sua quasi de cælo demisisset, quo neque meliorem, neque sanctiorem, aut reip. Christiana rationibus accommodatiorem optare potuissemus: alterum ut in sanctissimis pedibus tuis deosculandis, beatitudineq; tua ueneranda,

O 2 atque

atque adoranda partes meas desiderari ne paterer. horum ego duorum munerum, primo quidem ut Deo gratias agerem, diligenter sum persunetus. alterum uero etsi praesens iam iam istic persolvere ardebam, tamen eo iudicio usus sum, ut cum Patauï iustissima de causa nunc adessem, scilicet, ut literarum, bonarumq; artium praesidijs instruerer: maturitatem quandam eius rei mihi expectandam existimarem: quæ cum uenisset, tum illud officium meum opportunius, sanctitatiq; tuæ gratius fore arbitrabar. hæc me ratio Patauï tenuit: eadem uero ardorem illum extinguere non potuit, quin quoquo interim possem modo ad sanctitatis tuæ pedes Romam usque deuolare. quod cum alia ratione absens, quam scribendo, facere non possem, ad has literas accessi, quibus non secus ac si istic adessem beatiss. pedibus tuis oscula darem, omnesq; meas industriae, uitæq; partes sanctitati tuæ, quam aliquot iam annos summa fide coluissem, nunc certe in perpetuum dicarem, atque consecrarem. hæc literarum mearum fuit causa, quibus scriptis sanctitatem tuam mihi ueniam facile daturam sperabam, si, ut officio, pietatiq; meae satisfacerem, grauissimas occupationes suas interpellauissem. ego uero Deo suppli-

care

care non desinam, ut quæ lætitia prius urbem Romanam, paulo post Italiam totam, iam iam uero omnes, ut credo, Christianæ reip. partes, ac regiones peruagata est, eam orbi quamdiutissimam, tibiq; pontificatum istum quamfelicissimum, ac faustissimum uelit esse. Vale. Patauio, XV. cal. Nouemb. M. D. XXXIIII.

Cosmus Gherius Episc. Fanifortunæ

Benedicto Rhamb. S. D.

DE literis, quas mihi obtinuisti, multū te amo. quod autem rem istam leuem, ac tenuem appellas; eo sum magnopere delectatus: amoris enim uim in ijs uerbis maxime perspexi: qui facile facit, ut nihil, quod amicorum causa suscipias, graue tibi, aut difficile uideatur; omnesq; , ut etiam de honore scribit Xenophon, ἐπινοῦνται ὅς τε πρὸς. Missei oratiunculam uideo abs te probari; cū scribas summa cum uoluptate legisse; lætorq; amici nostri causa. Ego in dies melius habeo: ita ut medicos omnes imitatione tui contemnere incipiam: sed à me tamen excipiuntur ij, qui nimiam librorum consuetudinem tanquam κακὸν νόμον ualde accusant. hos

E P I S T O L A E

enim libenter audio, qui mihi ueram tenere medicinæ rationem uidentur. tu nescio quantum ijs credas. sed certe, quanto maiorē ijs fidem habebis, tanto melius ualitudini tuæ consules. Ottoboni salus mihi carissima, tua Ludouico, & Nicolao pericunda fuit: quare cum ego illum, tum ijs te amantissime resalutant. Vale mi carissime Rhamberte. Patauio, XI. cal. Quintil. M. D. XXXVI.

Cosmus Gherius Benedicto Rhamberto S. D.

QUANTVM & humanitatis, & benivolentiae duæ illæ causæ præ se ferunt, quibus, ut scribis, commotus es, quo multo maturius, quam expectabam, mādatum curares meum. una est, (lector enim eorum commemoratione,) ut ex hac celeritate intelligam eam rem non habuisse difficultatē: altera ut siquid aliud interea mihi abs te opus esset, ne forte petere uererer, cum intelligerem adhuc te in altero meo negotio laborare. Itaque ut uideo neque tibi graue quicquā ducis, quod mea causa facias, et, ut aliquid imperē quotidie tibi, minime recusas. Næ ista tua singularis humanitas est: & quæ te mihi amandum, et iucundum, et suauem facile

facile præstet. sed de hoc hæcenus. Quod literas meas præsertim latine scriptas tantopere à te desiderari significes, an tu id facis quia me usum eius linguæ tenere putes, et Romane loqui? at ego quidem longe aliter sentiebam. sin tu aliter existimas; malo in sententiam tuam uenire, quàm meum iudicium limatissimo tuo anteponere. sed tamen extra iocum, neque literas meas dignas esse, quæ tanto studio à te expetantur, certo scio, & tamen, te falli cum eas desideres, uehementer gaudeo: nam id quoque tuæ in me beneuolentiæ tribuo. aduentus tuus longe abesse non potest, si quidem, ut scripsisti, non plus decem diebus opus erat, ut quod reliqui est ex Bembi libro imprimeretur. sed amabo te, non ne iam illi pauculi lapsi sunt dies? mihi quidem, qui te uidere ualde cupio, præteruisse uidebantur. Ego tibi Ludouici nomine, tu meo Barocio, & Ottobono sal. pl. dices. Vale. Patauio VI. id. Quintil. M. D. XXXVI.

Cosmus Gherius Benedicto Rhamberto S. D.

VTAMVR literarum sermone mi Rhamberte, qui nos quodammodo copulet, quando loco-

rum intervallo nunc disiungimur, & si ne antea quidem simul unquam fuisse mihi uidemur, ita ut ex istis ego locis, uetus meum tui aliquando fruendi desiderium mecum deportauerim. Ego Fanum- fortunæ ante diem cal. Nouemb. saluus ueni: quo in loco multa habeo, quæ me delectent, in primis autem, quod non parum diœcesi meæ rationibus interest me hic adesse. In quo si mihi assentarer, mirandum non esset, cum omnino causas aliquas quærere debeam, quamobrem Bembi primum, deinde optimorum amicorum desiderium patientius feram. nam quid dicam tui? quem nunquam didici non desiderare, cum tui præsentis quidem facultas data mihi nunquam sit. de quo paulo ante querebar tecum. Nicolaus noster, non inuitus, ut mihi uideatur, in hoc uitæ genere, mecum, & in his locis uersatur, in discipulis suis recte instituendis magna diligentia utitur. Mihi quidem & satisfacit, et probatur, & carissimus est. literas à te non postulo, quia non dubito te non missurum esse. de quo si quid uererer, magnum efflagitatore haberes, & quidem iure. nam minime mihi probare debebas, me abs te unice, ac singulariter amari, nisi omnibus officijs mutuo mihi respondere paratus esses. sed
hoc

hoc genere tecum nihil opus est. De communibus amicis nostris non nihil ad me scribas oro, non solum de meo Barbaro, de Barocio, deq; ijs, qui istic sunt, sed etiam, si quid ex Aegypto de Contareno affertur, fac ut sciam. Dominico Mauroceno, excellentissimo uiro, mihiq; amicissimo, meo nomine salutem dicito, item Ottobono tuo. Fasciculum Bembo inscriptum ualde tibi commendo. Vale, et me, ut facis, ama. VI. cal. Dec. M. D. XXXVI. Fano Fortunæ.

Iannus Parrhasius A. Manutio S.D.

NON stetit, nec unquam stabit per uanum Ligurem, quin aliquid de beneuolentia erga me tua decedat. ita nihil omittit, quod offendere possit alterutrius animum. non dicam quid ad aures multorum quotidie garriat. indignissime te ferre, quod eum dimiserim, quod ea de causa non integra mihi gratia tecum sit. et insulsi nugatoris alia multa. cum satis constet eum non modo nihil habere, quod ingenuos adolescentes doceat, præter inalpinam strebliginem, sed esse prorsus indocilem. quo nomine & pristinus herus eum non retinuit, & alium sibi

sibi, uel minimi, uel etiam gratis ad hanc diem parare non potuit. At hæc in eo lenia, sed audi quid in amicitiam nostram patrauit. auctoratus ad exscribenda nostri laboris monimenta, quas scis obseruariunculas in quatrimum sustulit, in causaq; fuit, ne tibi, sicut scribebam, mitterentur. demum mentitus habere se certum hominem, cui recte ad te darem, per aliquot dies penes se retinuit, ad exscribendum credo. nudius tamen quartus, an quintus est? ad multam noctem, cum forte sacerdos opt. & ætatis suæ cantorum peritissimus Francinus Gaphorus apud me cœnatus esset, ecce tibi nescio quid frigidi causatus, illum cui dederat in aliud tempus distulisse profectionem suam Venetias, epistolam, quam tibi iam redditam cum codicibus arbitrabar, mihi retulit. Ego tum stomachabundus ad te Francino hospiti dedi, nec dubito quin acceperis. Aliud insuper, & atrocius attentauit. Heri sui. F. nomine Lysiam finxit apud patrem de nobis obloquutū, quo me cum Capris (ita familia Vincentiæ primaria dicitur) aliquo pacto committeret. Ego, qui delatoris ingenium noram, statim per literas accersui Lysiam. Ligur ait, se nunquam, quæ mihi, Lysie confessurum, quid tum? multis ultro, citroq; iactatis,

eis, ex conscientia solum uertit. quò se receperit
 ignoratur. isthuc auguramur. habes historiam Li-
 guris olim tui, meiq; nunc, ut puto, neutrius. nã
 quem non caperet inducta illa persona? quem ue-
 ro deprehensa non moueat? Caue putes esse quen-
 quam aut ita uersipellem, aut bilinguem. sed uitiũ
 gentis est, ideoq; non adeo culpandum, quàm fugiẽ-
 dum. Vale. Ego adhuc ex acerbissimo morbo iaceo.
 Vicentiae.

Nicolaus Draco Baptistæ Egnatio S. D.

CVM tertio abhinc mense istic tibi occurrif-
 sem in ea urbis uia, quæ ab area Martiana ad Riuũ
 altum ducit, quæsissesq; à me, nunquid Vincentinã
 conditionem, quæ in tua esset manu, accipere uel-
 lem; scis me tibi nulla interposita mora respondi-
 se, * quotidie mihi nouas honestissime apud se ui-
 uendi spēs, rationesq; ostentare, quas si temere de-
 seruisssem, omnium fortunarum mearum naufragiũ
 uidebar esse facturus: propterea nihil noui esse mi-
 hi in animo moliri, dum expectarem, quorsum tot,
 tantæq; eius hominis, quibus me semper obrueret,
 pòllicitationes tenderent. Tali itaque animo præ-
 dictus

ditus oblatam à te celeberrimæ illius ciuitatis conditionem, è manibus dimisi, nihil unquam fore suspicans ut splendida illa, ac magnifica uerba, toties ab eo passim iactata, tam breui temporis spatio me deficerent, ad nihilumq; reciderent. ex illo tempore, quò huiusmodi sermonem inter nos instituiamus, ad hanc diem, nihil, quod ad eorum rem, dignitatemq; pertineret, quod equidem sciam, prætermisi. ntinamq; tibi per pudorem meum, qua innocentia, atque animi moderatione apud hosce iam per biennium uixerim, commemorare possem. nam si cætera iam me defecissent omnia, sperarem ita rem, causamq; meam tibi sapientissimo uiro probaturum, ut uel magnam ex eo apud æquitatem tuam patientiæ meæ commendationem ferrem. uerum hæc te malim ab alijs, quàm à me, cognoscere. Cum ergo ita uiuerem, atque meum animum totum ad eorum uoluntatem, nutumq; conuerterem, nihilq;, quod aliqua ex parte pœnitendum foret, id quod uere, & sancte affirmare possum, committerem, ecce mihi Venetijs ab * fulmina afferuntur, quibus mecum grauitè expostulabat, quòd suorum iuuenum in perdiscendo negligentiam, apud se, quam ab alijs compertam habere diceret, neque literis, neque

neque sermone, ex quo hic habitare coepimus, unquam condemnauerim: aliaq; praeterea multa in eam rationē, quae sciens praetereo. quasi uero quidquid illi pueriliter deliquerint, ego, qui semper ad bene agendum paratus sum, praestare debuerim: quod quam inique statuatur, ipse, qui omnem eorum superioris temporis uiuendi rationem omnium optime perculluisti, iudices uelim. Quandiu mi Egnati istorum ineptias per meam existimationem, quantulacūque ea de me habetur, tolerare potui, eas uirtute plus quam herculeae pertuli. nunc uero, cum iam meus honos, non dico apud pueros, qui leui quadam ratione repelluntur, sed apud talem uirū, qui nihil iam per imprudentiam peccat, haud ullo meo hercle merito, in periculum ueniat; nolimq; inter malleum, & incudem, quod aiunt, assidue uersari; constitutum, atque iam plane mihi animo affirmatum est, quam maturrime id fieri possit, per te potissimum, quem multos iam annos parentis optimi loco habendū, colendumq; duxerim, rationibus meis mederi. Quā in re tibi etiam atque etiam mi pater uidendum est, ut me eo constituas loco, unde tibi aliquando totius ocy mei rationes reddam. Circumspice ergo per totam Italiae longitudinem, atque

atque exquire mihi non onerosam aliquam prouinciam potius, quæ lucrum mihi afferat, quàm honestam, ac leuem, cum minori emolumento, conditione, qua mea literarum studia tueri, atque alere possim. ipse ex animi tui sententia mihi locum statue. scis tu, quid meæ postulent rationes, neq; ego etiã quantum mea causa uelis dubito. interim, quod mihi edideris oraculum, hic, uel in patria mea expectabo: cuius ad normam totius navigationis meæ cursum dirigam: proq; uirili mea parte enixe operam dabo, ut de officio erga te meo nunquam in his præsertim, quæ ad diuinam uirtutum tuarum admirationem spectent, iure conqueri possis. Vale. Lampridius per me salutem non uulgarem tibi ascribi uoluit. Patavij, I I I. Idus Ianuarij.

Ant. Thilesius Benedicto Rhamberto. S.D.

ME uero ad reditum ultro paratum nonnihil incitauit epistola tua. sed quis homini iam senescenti, ac naturæ præterea imbecillis, si se per hyemem itineri longinquo metueret committere, ueniam non

non daret? quare Martio mense, qui proximus est, statui, rebus omnibus posthabitis, me accingere. atque eo animo reuertar, ut Venetijs tecum, ac cum ceteris, quos mihi communia literarum studia conciliarunt, reliquum omne ætatis meæ tempus tranquille ducam. Equidem mi Rhamberte nisi in tot, tantisq; rerum fluctibus, quibus sciebam meos fuisse uexatos, non accurrissem, præter quàm quod semper uersatus essem in metu, iure poteram grauius accusari. quam meam causam, etsi nunquam dubitavi, gaudeo tamen Decemuiris summa humanitate præditis fuisse comprobata. quibus quoniam placuit, ut scribis, neminem prorsus substituere, priusquam de meo reditu certiores fiant; agnosco amplissimi ordinis grauitatem, æquitatemq; atque in me, qui illum semper suspexi, & sum ueneratus, non leuem beneuolentiam. unde debeo ei immortaliter, teq; unice rogo, ut, quàm memori, ac grato animo, beneficium hoc insederit, apud eundem ordinem pro illius amplitudine, ac maiestate uerbis ostendas honorificentissimis, meq; breui affuturum meo nomine pollicearis. Cur autem reditum non maturauerim, ex alteris literis, multo quàm hæc prolixioribus, quas arbitror tibi iam esse redditas, facile potes intelligere,

intelligere. illud tamen in praesentia scias, & nauigandi tarditate, uix enim quadragesimo, postquam conscendi die, domum perueni fere naufragus, & rerum mearum statu, quas longe aliter, atque opinabar, offendi, fuisse deceptum, quo minus eodem, quo discessi, nauigio recurrerem ante dies, ut constitueram, brumales. spero tamen, uestro omnium ingenio, ac studio fretus, mea; item solertia, nullum querelis futurum esse locum, ac neminem uestrum doliturum ex hac paucorum mensium intermissione. dabitur mi Rhamberte reditus ad literas, id; fiet alacrius. quanquam (de te loquor uno) damni ne aliquid tu è meo discessu? quid si, ut uide re uideor, quæstum potius fecisti, Triphonem nactus præceptorem, patricium uirum, uaria doctrina expolitum, ac summa (utrūque omnes una uoce, cū istic essem, prædicabant) probitate ornatum? quin tibi, quem alioqui summe amo, pene inuideo, doleo; ante me discessisse, quàm aliquid ex eius lepore degustassem. sed liceat redire: non committā, ut solus uiro fruaris tam egregio, quem quoniam totum habes, quid petis quippiam aliunde? amabo te excipe omnia, quo possis, ubi affuero, benigne amicum impertire. sed cupio tecum, quamuis serio
hæc

hæc scribam, coram iocari, & cum Mario meo, elegantissimo, ac modestiss. adolescente, cuius quoniam consuetudine careo, uiuo, uelim crederet, acerbe. unice dicerem à me illum amari, nisi esses tu, quo nemo unquam fuit, aut futurus est mihi carior. Vale: parentibus tuis opt. fratriq; plurimam salutem. Cosentia. XII. Feb. M. D. XXX.

Ant. Thilesius Andreae Franciscio scribarum Principi S. D.

NVNQVAM ex quo à uobis discessi fui non miser. nam principio cum necessitate coactus domum festinarem, quæ ego non pertuli aduersa, ac diuturna tempestate fatigatus? unde pene naufragus, uix tandem ad meos peruectus, nihil inueni, quod auribus non esset, atque oculis iniucundum. Ad extremum omnia paraueram ut reuenterer, iamq; ante triduum discessurus, ecce, nescio quoniam meo fato è duobus tantum scalarum gradibus, recenti pluuia lubricis, delapsus, utriusque pedis talos ita intorsi, ut aliquot dies ex eo casu decubuerim, dolore affectus acerrimo. quo iam medicamentis, ac die ipsa sedato, ulcus infra genu in interior

P parte

Ant. Thilesius Benedicto Rhamberto S. D.

O' mi Rhamberte, quàm suavis est sermo literarum tuarum: non caret tamen aculeis, quibus partim me stimulas, ad uos ut redeam, partim subacufas, quòd tandiu reditum distulerim. utinã meo modo liceret uiuere. essem non inuitus quòd me reuocas. sed non tantum ætas, atque imbecillitas; corpusq; ualitudine aduersa affectum, ab itinere, & profitendi labore me deterrent, sed multa me impediunt; quæ non est hic scribendi locus. aliæ semper ex alijs me premunt molestiæ, quibus uideo iam præcludi profectionem. quos meos labores futuros cum uelut è specula prospicerem, scripsi non semel ad scribarum maximum, uel uicariũ substitueret, uel certum hominem sibi pararet, quo iuuenes uestri erudirentur. quòd si apud alios, à quibus sæpe fui honestissima conditione ultro inuitatus, literas profiterer, (quãuis cui non permittitur uiuere, ut uult?) haberes cur posses si nõ merito, saltem rationem inuenire, cur me quasi uelleres. sed si non modo Raguseis, qui aureis CC. bis me publico decreto uocarunt, & Mediolanensibus negaui, uerum pa-

triæ ipsi, & huic urbi florentissimæ, nescio unde
 exoriuntur querelæ. uideo mei desiderio eas nasci.
 mutuum est, mihi crede, ac nullus fere dies abit,
 quin doleam, me tibi sapienter, & amice suadenti
 non paruissse. an apud uos non cuperem uitam age-
 ret, & in humanitate, ac lepore tuo acquiescere?
 sed multa me prohibent, & simul professionis læ-
 dia ita me capiunt, ut quiduis potius agendum mi-
 hi esse censeam, quàm oneri molestissimo me post-
 hac denuo subiiciendum. habes animi mei sensum.
 ama me. quod nisi feceris, ferreum te putabo. Ma-
 riumq; meum, illustrem adolescentem, nostri aman-
 tissimū, in me amando supera. nihil enim mihi tam
 accidere posset iucundum, quàm si intelligerem tuū
 in me amorem non modo non minui loci, ac tempo-
 ris interuallo, sed etiam augeri. quod ut fiat, in tua
 est enim manu, te summe rogo. Theupolo uiro cla-
 rissimo, cuius ego & doctrinam, & morum san-
 ctitatem nunquam non prædico, Marioq; eruditis-
 simo salutem plurimam. Vale opt. Neapoli, XII.
 Decemb. M. D. XXXI.

Ant. Thilesius Benedicto Rhamberto S. D.

LITERAE tuæ, quo sunt frequentiores, atque etiam longiores, eo mihi maiorem afferunt voluptatem. quamvis cum mecum ipse cogito, qui tam suauiter scribit, tam copiose, tam amanter, eo me iuvene diu caruisse, atque esse cariturum, non possum non angi, & cruciari. quod desiderium auget querelæ, & mærores tui, quibus acerbe fero te plus nimio confici. quorsum afflictatio ista? pater inquis obiit. tibi ne soli id accidit? absenti mihi. hoc, quia oculis non aspexisti, minus dolendum. at omnibus carus. id uero debet consolari. Nam quod de matris uoletudine scribis, uideo te animo esse admodum leni. age mi Rhamberte, te obfirma, quo filij opt. reditu possit illa, si quam tempus adhuc non deleuit, ægritudinem funditus tollere. Ego, ut ad me redeam, uitam ago sine Musis, hoc est sine uoluptate. quas animi delicias scelus mihi eripuit, famulum dico, qui, ut alias scripsi, ita me compilauit, ut pene nudum reliquerit. quas pœnas fateor me iure, ac merito dedisse. cur enim tuis opt. consilijs non parui? aut agello saltem meo contentus, ci-

tissima tui mentione accepi: ut facile appareret eū,
 cum id faceret, de homine mihi charissimo, meiꝫ
 amantissimo scribere. superiore uero anno, cum
 exactionū acerbitate grauius in mea sacerdotiola,
 præsertim in illud Leonicenū, sæuiretur, cui rei
 non aliud, quàm absentia mea, & eorum, per quos
 habebatur census, iniustitia causam dederat: incli-
 nant enim illi sine ulla moderatione à se atque suis
 in alienos onera: rediturus fui ad ueterem consue-
 tudinem meam, ut tibi de meis incommodis perscri-
 berem omnia: teꝫ, sicut ante hanc diuturnam pere-
 grinationem meam semper faciebam, in auxilium
 aduocarem. sed me illud quoque scribendi tempus,
 meo certissimo cum damno prætermisisse, nunc pro-
 fecto, nunc uehementer delectat: certissima enim
 hæc tibi fides erit, maius hoc, de quo nunc scribo,
 direptione rerum mearum mihi uideri, qui illum
 dissimulare potuerim, hoc non possim. Effugisse mi-
 hi uidebar una cum istis locis ueterem quoque illā
 tibi notissimam fortunæ acerbicatem; & omnia su-
 periorum temporum aduersa, obliuione altissima
 obrueram; cum mihi ex inopinato eisdem è locis ue-
 rustum malum, quod non modo consenuisse, sed pla-
 ne extinctum, sepultumꝫ esse uidebatur, nunc de-

nique ab inferis reuiuiscit, meisq; coniunctissimis
 exitium intentans, nec me quidem tam longe posi-
 tum quiescere patitur. Ludouicus Mercantis, mea-
 rum aliquando, ut quidem ipse uoluit, me inuito,
 ac nesciente, iniuriarum ultor, post illud notissi-
 mum factum, quo Patauij debacchantem pernicio-
 sissimi hominis licentiam compefcuit: cui facto pu-
 blica tunc bonorum omnium uoce, non ulla indi-
 ciorum animaduersio, sed honestissima præmia, de-
 bebantur: posteaquam, in iudijs re cogni-
 ta, & apud ipsos denique Decemuiros acta, ex il-
 lius summi magistratus auctoritate absolutus est,
 nunc rursus duodecimo post anno in eiusdem facti
 inuidiam, atque in periculum uocatur. Hoc ita mi-
 hi inusitatum, ita ab illius grauissimi magistratus
 constanti consuetudine alienum uidetur, ut non du-
 bitem irritos omnino fore conatus eorum, quicun-
 que has contra Ludouicum procellas commouerunt,
 sed tamen quia in amicissimi hominis metu nefas
 mihi esse ducere non timere, literas quàm accu-
 ratissime potui tota de re ad clarissimum uirum,
 & mei amantissimum Antonium Surianum dedi:
 qui præcipue ab inimicis contra Ludouicum inflam-
 matus uidebatur fuisse. Ponderis fortasse non nihil
 mea

mea deprecatio apud humanissimum hominem, meiꝫ; amante, pro meo amicissimo habebit: sed maxima in te uno spes est charissime Valeresi. plus tu Ludouici rebus, siue apud Decē uiros, siue alibi opus fuerit, præsentia, & auctoritate tua, quàm omnes homines, prodesse potes. tua est ciuibus tuis, ut cognita, sic clara uirtus: tua uox nobis pro multis testimonijꝫ erit: idem tu rem omnem, ut illo meo tristissimo tempore gesta est, melius omnibus tunc uidisti, & nunc puto meministi. Quam ob rem te potissimum toto negotio testem in illa ad Surianũ epistolâ nominare non dubitauĩ. quare te per amicitiam nostram, per fidem, per sanctissima communium studiorum, & totius nostræ necessitudinis fœdera obsecro, atque obtestor, causam hanc totam, in qua multus etiam labor tuus initio fuit, nunc quoque suscipe, & amici mei salutem uiribus tuis omnibus tuere, ne mihi unquam obijci possit, quasi ego amico homini ruinæ, atque exitij causa extiterim, quæ sola etiam falsa existimatio uitam omnem mihi acerbam faceret, causam autẽ facillimam habes, in qua nihil nisi Decē uirorum acta tueri oporteat: ultimus hic impetus inimicorum cum à te repulsus fuerit, quies erit per te nobis in perpetuum comparata:

10. Petrus Crassus Episc. Viterb.

Gaspari Contareno S. D.

T V A singularis erga me humanitas, qua præcipuum quendam semper mei amorem præ te ferre uoluisti, nunquam antea mihi uel dignitatis plus attulit, uel uoluptatis. ita enim ad me homines in hac publica tui summi honoris lætitia gratulatum ueniunt; quasi ad quem maxima ex tuis secundis rebus uoluptas peruenire debeat. in quo illi quidem minime falluntur. sed ego gratulantibus mihi undique amicis, tum demum me solido gauisurum esse respondeo, cum, te oblatam dignitatem non repudiasse, rescuero. unus enim hic metus animum meum pro ingenti, atque immodica lætitia, qua me uel ante omnes frui conueniret, cura, & sollicitudine implet. itaque nihil tantopere uellem hoc tempore, quàm me consilijs tuis, deliberationibusq; interesse: qui etsi monere te, summæ auctoritatis, & prudentiæ hominem, non auderem, rogare tamen, & obsecrare non dubitarem. Quid enim tam necessarium, quàm ut Christiana resp. optimorum uirorum, eorundemq; prudentiss. doctiss. nobiliss. consi

consilio administratur? quid autem tam raro uel no-
stra, uel patrum nostrorum, uel etiam maiorum æta-
te obseruatum est? sed fuerit ea sane quorum uis,
quia non hoc agimus, culpa: nunc te sancta Chri-
sti Ecclesia nominatim appellat, auxilium tuū im-
plorat, sapientia tua, et fide se indigere profitetur,
gubernacula tibi, atque habenas rerum tradit. tu
ne igitur optimæ, ac sanctiss. matris uoces auersa-
beris? operam tu illi tuam negare audebis? cum ad
illius propugnandam incolumitatem, si nemo uo-
cet, te opum tuarum omnium, & famæ, capitisq;
periculo ultro accurrere, omni pietatis iure opor-
teat; eidem tam benigne, ac maternelle petenti, ad
præmia te, ac honestamētā prius, quàm ad labores,
& certamina inuitanti, non parere, non obsequi
poteris? An preces etiam, & lachrymas optimæ
matris in summa orbitatē positæ expectabis? ferre
ne id tua pietas, tuus pudor poterit, ut ea se ad pe-
des etiam tuos abijciat, ut prostrata supplicibus uo-
cibus duritiem tuam inflectere conetur? Quid si
non precibus, & lachrymis agendum putet; sed
auctoritate sua, & imperio in te seuerè uti uelit,
non ne tibi Deum fore iratum credas, non ne te om-
nibus diuinarum, humanarumq; legum execratio-
nibus

nibus obnoxium fore metuas, si materni apud te imperij auctoritas lenior uisa fuerit: Quanto, si id feceris, dolore tuo, & ipsius Ecclesiae dedecore, deserta abs te praesidia ab indignissimis inuadi, & occupari aspicias? Prorsus enim, si tecum reliqui etiam boni exemplum tuum secuti abesse à gubernaculis christianae rei decreuerint; aut desertam eam ab omnibus concidere, ac deficere, & in hostium crudelissimorum potestatem uenire necesse est; aut iniquiore etiam conditione improbis bonorum loca inuadentibus, turpissimorum hostium sceleris, ac libidini ludibrio esse. Quantum ergo isto exemplo noceas, fac etiam atque etiam cogites.

Quod si ambitiosum est honores cupere, ac quærere, uide ne ambitiosius sit ultro delatos superbe aspernari. Postremo iam ea tua ratio est, ut tuto aliter Dei gratiam tibi polliceri nequeas. si enim sua cuique uocatio sequenda est, & in ea permanendum; ad Remp. in qua uersaris, te fortasse nemo uocauit: tu aut uoluntate tua, aut tuorum impulsu ad eam ultro accessisti, in hunc uero summum, sacrumq; ordinem, in quem tanta omnium approbatione allectus es, Pontifex ipse, cuius uel nutui obluetari non debes, te uocat: uocant ipsi Ecclesiae procures,

rectissimam in re christiana uoluntatem noueris .
 Vale , ac cogita recusationem tuam bonis quidem
 doloris plurimum , sed improbis , & hostibus longe
 plus uoluptatis , & spei allaturam . Viterbij , X
 Cal. Iunias .

* S. D.

CUM Venetijs proxime discessi , ut in hanc so-
 litudinem ex ista frequentia me conferrem ; magna
 sane lætitia perfruebar ; & quòd ad ea , quæ homi-
 ni carissima sunt in uita , uxorem ac liberos meos
 redibam ; & quòd mihi , ocium ad studia , amœni-
 tatem ad ualitudinem quærenti , hunc esse præter
 ceteros locum expetendum atque adamandum in-
 telligebam . sed , ut in rebus humanis nihil est sim-
 plex , in summa uoluptate molestiæ tamen hoc erat ,
 quòd ita fortuna tulisset , ut , quo tempore tibi per
 anniuersarias Patavini gymnasij ferias Venetijs
 esse & commorari liceret , tum ego à te disiunge-
 rer , magnamq; manendi cupiditatem maxima di-
 scedendi necessitas uinceret , nec uero mihi dubium
 est , quin cum meo sensu tuus quoque sensus con-
 gruat .

gruat, & quæ me cura torquet, eadem te pungat. uinci enim in officio, atque amore, quàm sit turpe, si te non mea uox aliquando docuisset, ipsi te libri, unde hauris illa præclara, quibus ad laudem informamur, penitus erudirent. quòd si, ut una sumus, quod & tu, ut opinor, sperabas, & ego certe cupiebam, per intervalla locorum non licet: at, quod proximum est, ut una esse uideamur, non uideo cur præstare literis & consequi non liceat. nam si propterea, simul esse, iucundum est, quia mutuo sermone fruimur: in literis non ego quidem tuam uocem audio, neque tu meam, sed, quæ uoci subest res, eam nihilo minus, quàm una cum sumus, percipimus, hoc etiam maiore cum fructu, quòd aliquanto scribimus accuratius, quàm loquimur. quare uelim ad scribendum te des: & cum me tuæ consuetudinis usura, ob ingenij tui suauitatem, & sermonis elegantiam, mirifice capiat; hæc, quæ in te amo, quæ nunc abesse doleo, fac, si me diligis, ne omnino desiderem. debes hoc mea causa non nolle, tua uero maxime cupere. nam cum te aliquot abhinc annis in rectam illam antiquæ eloquentiæ uiam dederis, patris tui, uiri optimi ac sapientissimi uocibus, consilijsq; commotus, patrui uero clarissimi

clarissimi ac præstantissimi ciuis, exempli incitatus: turpe tibi est, in mediocri laude consistere; & ad summam peruenire, sine stilo assiduaq; exercitatione non potes. quid enim ille noster, cuius tu liberos nunquam de manibus deponis, quid aiebat? timere se, nisi frequenter declamaret, ne, quod habebat in arte oratoria facultatis, exaresceret. attende mi Paule, & tuam causam, à qua mea disiuncta non est, si placet, mecum considera. ille sibi, homo Romanus, latinæ orationis inopiam metuebat; cum tamen omnibus in hoc genere diuitijs abundaret: nos, quibus latina lingua peregrina est, qui in optima scribendi aut dicendi ratione rudes & infantes pene sumus, de summa eloquentia, sine summo studio cogitabimus, & unam omnium difficillimam rem, eandemq; omnium gloriosissimam, ludi- bundi consequemur? uides me ipsum, qui quid sim, ego quidem non statuo; sed sunt, quibus non esse nihil uidear; nullum pene diem intermittere; quin aliquid latine scribam? cum tamen, ex quo lapidem, hunc uoluo, annus iam uigesimus abierit. est adolescens in uestra nobilitate, tibi non ignotus, mihi admodum familiaris; quem optimo ingenio præditum, & gloriæ cupiditate flagrantem,

Q nisi

nisi à Romanæ eloquentiæ laude ad huius uernaculæ ac maternæ linguæ studium falsa quædam opinio traduxisset: erat, cur de illo sperarem ea, quæ summa sunt. tantam enim operam in scribendo ponit, quantam tu uidelicet in legendo. sed neque illi in summa industria iudicij satis est, qui de latiniæ linguæ dignitate non optime sentire uideatur: neque tibi, rectissime iudicanti, ad id ipsum, quod probas, obtinendum suppetit industria. Quare uellem, ut & tu illum in diligentia, & ille te imitaretur in sententia. quod utrunque si fieret, næ ego in eo uestræ laudi optime consultum putarem. sed ille de suo consilio uiderit. iccirco enim se non existimat errare, quia, quos sequatur, auctores habet eos uiros, qui, quod optimum esse ducunt, in eo facile omnibus hominibus antecellunt. te uero, qui mecum in meis laribus per triennium ferè uixisti, qui, quidquid es, de meorum consiliorum præceptorumq; fonte fluxisti; cuius à laude mea laus quodammodo pendet; te inquam mi Paule, quantum in me erit, errare non patiar; teq; coactus amore & officijs tuis hortari nunquam desinam, ut in ueram ac sinceram eloquentiæ formam, cuius ego tibi excellentem pulchritudinem duorum ueterum oratorum exemplo

exemplo sæpe demonstraui, tuæ mentis oculos acriter intendas; eamq; tibi à me ueris, ut arbitror, lineis designatam, tu aliquando tuis scriptis quasi coloribus coneris exprimere. graue, inquires, onus imponis, & difficilem mihi laborem mandas. fateor ita esse: addo etiam illud, non esse nobis optandum, ut aliter sit. nam cum omnium hominum in appetenda laude par prope uoluntas, similisq; sensus sit; quod omnes appetunt, id si esset eiusmodi, ut consequi multi possent; quanti, obsecro, æstimares? opinor, minimi. copiam enim uilitas, et uilitatem sequitur contemptus. quare non tibi est dolendum, quòd de sudoribus manat gloria. letare potius, quòd, cum eam omnes amabilem esse, ualdeq; expetendam sentiant, plerosque tamen laboris magnitudo terret, & æmulandi studium rei difficultas imminuit. est autem tibi ad hanc laudem, quò te uoco, aditus eo faciliior, atque apertior, quòd, quæ duo sunt ad comparandam eloquentiam instrumenta maxime necessaria, ingenium, & memoria, utrunque sic tenes, ut in altero eccellas, in altera ijs, qui excellere putantur, non admodum concedas. hæc tu bona si languere sinis; gratiam naturæ non optimam refers: quæ non in te. beni-

gna fuit, ut suum beneficium negligeres, sed ut ad
 decus, ad immortalitatem, ad dignitatem, æternâq;
 laudem conferres. neque uero is ego sum, qui te ue-
 lim eloquentiam à philosophia seiungere, totosq;
 dies in hoc uno expoliendæ orationis studio consu-
 mere. erras, si me ita sentire putas. ego philoso-
 phiam diuinum quiddam esse dico, indicem ueri-
 tatis, magistræ uitæ, omnium uirtutum, omniumq;
 laudandarum artium parentem. sed idem ita sta-
 tuo; si, qui optime sciat, non optime loquatur, ple-
 runque fieri, ut id ipsum, quod sciat, nescire uidea-
 tur: & ut in conuiujs non parum interest, qua
 epulæ ratione condiantur; sic in sermonibus aut
 scriptis, magni refert, quibus animi cogitata uer-
 bis enuncientur. Quod si cui ita stupidus, aut
 ita deprauatus est sensus, ut ornata & bene stru-
 ctæ orationis suauitatem, & tanquam harmoniam
 auribus non percipiat hunc tu, si sapis, neque con-
 sules in re tua; quia, recte qui non intelligit, is ut
 recte iudicet, sperare non licet: neque ipsum mone-
 bis; quia, quibus desunt principia naturæ, ijs inu-
 tilem artem esse constat. tu, si me audies, musarum
 uocem ab rusticano sono distingues; & ut inanem
 multorum loquacitatem oderis, sic elingnem quo-
 rundam

rundam sapientiã non amabis. qua in sententia uideo fuisse, quos uiros? Platonem, & Xenophontem quibus ego plus crederem soli, nutu significantibus, quam omnibus, qui nunc ubique sunt philosophis cum iureiurando confirmantibus. non ne uides magnum utrunque & excellentem in philosophia fuisse; utrunque tamen in hac, quam homines inepti reprehendunt, exornanda orationis facultate ita præstitisse, ut, eorum scripta cum legimus, nihil fieri posse purius, nihil elegantius, nihil illustrius indicemus? à qua laude plurimum abfuis-
sent, nisi temporis industriæq; multum in eloquentiæ studio collocassent. neque uero eloquentiæ studuissent, nisi ex ea decoris ornamentiq; plurimũ ad philosophiam accedere, tanquam ad formosam uirginem à corporis cultu, iudicassent. hos igitur ego te imitari malo, quorum nomina adhuc uigent, cũ ipsi duobus abhinc annorum millibus obierint, quam istos, si qui sunt, qui te infirmis rationibus à pulcherrimo consilio conantur abducere. Perge, ut facis, in disciplina philosophiæ, in qua Patanij artificem habes eximium M. Antonium Genuam: eloquentiam uero, cuius, ut opinor, in uia me ducem non contemnis, ne dimitte. utrunque

Q 3. enim

enim & debes, si tibi magna proposita sunt; & potes, si, quod me sæpe dixisse memini, diei horas apte & cum ratione distribues. Vale, & patrem tuum, & patruum, quos ego plurimi sane facio, & communes amicos meo nomine saluta. ex Plebe Saccij, X. cal. sept. 1552.

Victor Faustus Andreae Naugerio, Venetæ reip.
in Hispania oratori, S. D.

SI per negocia, quæ mihi publice iniuncta sunt, clariss. Naugeri, licuisset; fecissem equidem libenter, ut singulo quoque mense, quemadmodum et alias facere solitus sum, ad Rhamnusium, tibi literas daturus, accederem. sed ea est temporum conditio, atque ea adhuc ingeniorum ueluti nox, Hercule illa longe prolixior, quæ iam inde usque ab Romani imperij ruina tot simul egregias artes, græcorum præcipue hominum studio expolitas, tenebris inuoluit, nostram etiam ætatem infuscat, ut nonnunquam ex hac mihi semper gratissima umbra in puluerem & solem auocer necesse sit: quoniam, nisi solers aliquis uir, laboriosus pariter et bonarum artium studiosus, qui diu multumq; in literis

teris uersatus sit, multa generis humani ornamenta ex antiquorum monumentis eruta in lucem conetur asserere, periculum sit, ne nostrum hoc seculum, cui iampridem alioqui ea illuxit aurora, quæ pene possit cum antiquitate contendere, bene magna sui parte nubilum diem & uera luce carentem penitus habeat. nam paulo ante nostram ætatem, ut probe nosti, cum rudia omnia esse putarentur, alij ad studia literarum, alij ad musicen, alij ad picturam sculpturamq; alij ad alia, principum liberalitate excitabantur. in præsentia uero ubi nonnullæ excellenter fieri cœperunt, iam exquisita omnia se habere uulgus hominum arbitratur. proinde, ut securitatem semper negligentia sequitur, in ijs, quæ ardua sunt, atque ex magnitudine difficultatem in se aliquam habent, nullis præsertim, aut certe pere xiguis propositis præmijs, multorū cessat industria: unde necessario euenit, ut multa quæ ut aliquo pacto fiant quotidie usus postulat, et præsertim quæ machinamēto aliquo idest ingenio simul atque acri iudicio egeant, ab imperitis hominibus, & duntaxat fabris inuita quamuis Minerva tractentur: tantumq; absit ut sua in dies meliora facere studeant, ut nunquam alias quicquam melius factum fuisse

aut posthac fieri posse contendant. nactiq; aliquem
sui similem ex ijs, qui opibus aut potētia polleant,
cuiusmodi rudium hominum ingens ubique nume-
rus reperiatur, necesse est, dum laborem discendi
ocio ac uoluptate permutant, antiquitatem omnem
modo derident, modo historiæ quantum libet uete-
ri fidem abrogando, nequam mediisfidius homines
nihil non interim mentiri aut negare ausi suo arbi-
tratu interpretantur. et quoniam sua quisque natu-
ræ quodam uitio facile admiratur, interdum etiam
persuadent publicæ existimationis inimicum esse il-
lum, profanum, impium, qui antiqua præsentibus;
hoc est, ut ipsi autumant, suis aliena præponat. tan-
toq; illum peius odere, quanto id clarius non argu-
mentis tantum dicendo, uerum etiam exitu aliquo-
rerum ac experimento ipso uerum esse ostenderit.
quasi uero in artibus, perinde ac in hominibus pro-
pter affinitatem fieri conuenit, non quæ optima,
sed quæ maxime domestica sit, inter suas unicuique
cēsenda esse uideatur. quare si, hoc mihi semper in-
cundiss. officio ut caream, aliquando necessitas co-
git; te obsecro, Naugeri, per fortunas, & quæ-
cunque tibi carissima sunt, ne id nimium ægre fe-
ras. Quod uero ad te ipsum attinet; facile mihi per-
suadeo.

suadeo, te istic non esse inuitum, qui patriæ tuæ ci-
 uis amantissimus publica negotia sustineas: te ta-
 men rogo, ut, si quæ tuis commodis uel uoluptati
 auferuntur, ea patriæ tuæ utilitati ac ornamento
 accedere, æquo animo patiaris. Bene agitur cum
 Rhamnusia tuo: qui, depulsa illa satis diuturna ad-
 uersæ ualetudinis molestia, præclare et ipse sibi, et
 amicis restitutus, animo lætissimo rusticatur, sum-
 mamq; ex duorum pene quotidiana consuetudine
 uoluptatem percipit, Petri Bembi, & Andrea Ric-
 cij, alterius omnium uirtutum laude insignis, alte-
 rius fingendi arte ita clari, ut, quod eius egregia
 monumenta declarant, cum omni antiquitate con-
 tendat. quid quæris? quodam modo villa Rhamni-
 sia, & Nonianum, & Ligunti insula, cum hi ta-
 les uiri absunt, solitudo uidetur: nunc ego qui-
 dem, ut meus est sensus, in ijs locis, quandoquidem
 ibi nunc cum huiusmodi uiris uirtus habitat, mi-
 ram statuo esse celebritatem. ac mihi magnam feli-
 citatis partem uiderer obtinere, si, cum assidue ami-
 cissimorum hominum suauitate ac uirtute frui non
 liceat, saltem tertio quoque die accurrere ad eos
 possem. sed se is, quæ me implicent quotidie magis
 occupationes. te quoque, nisi fallor, pungit seluæ
 tuæ,

EPISTOLAE

tuae, & Muriani, quibus nunc cares, iucunda simul & molesta recordatio: ubi cum Gaspare Contarino, Nicolao Theupulo, Augustino Pisauero, eorūq; simillimis uiris, uiuebas, uiuebas, inquā, Naugeri. ea enim uere uita est, quæ cum uirtute præditis hominibus traducitur. sed hæc, intermisso fructu, cariora tibi erunt, cum redieris: tuq; sermones amicorum tuorum, nos tuam doctrinam, tuam suauitatem, multo, quàm antea, iucundius, ex intervallo regustabimus. quod cum à Deo precamur: tum uero, quia Deo, qui diuina studia in humana uita colunt, curæ sunt, non optamus magis, quàm speramus. Vale. Venetijs, cal. Iun. M.D.XXVII.

*

EPISTOLAS à te habeo duas, utranque scriptam elegantissime, sed illam pleniorē, quam XI. cal. Sept. dederas: nam hæc recentior, cui nonarum Oct. dies erat ascripta, argumentū habuit ferè nullum. uenio igitur ad priorem: in qua cætera iucundissima, illud permolestum, quod te minus commode significas ualere: scribis enim, ob aduersam ualeitudinem te uereri, ne non illud, quod ordi-
ris,

ris, possis pertexere. mi Catiane excita prudentiam tuam, & occurre morbi principijs, ne ille grauior deinde factus, & te, & amicos tuos, qui te ægro- tante ualere non possunt, diutius uexet. hoc loco mihi ueniunt in mentem, quæ tu me olim, minus recte cum haberem, prudentissime & amantissime monuisti. illa, illa ipse tibi nunc in memoriam redige, & quæ tuæ tunc partes erant, eas nunc fac esse meas. tu mihi nõ ex Galeno, aut ex Auicena, sed ex ueterum philosophorũ libris remedia dedisti: ego nunc idem in te facio. uis, quæ meum morbum te medente sanarunt, ea tuo ipse in morbo præmittere? non uis, opinor: non enim id te dignum est, qui ea sæpe legisti, unde homines alijs cauere cum discant, sibi eos non cauere turpe est. quare adhibe eam, quam ad omnes res soles, ad te curandum diligentiam: & quod oneris suscepisse te scribis, id si tibi grauius uidetur, quàm ut perferre possis, depone prius, quàm opprimare. magnum est, quod moliris, & magni non solum ingenij, quo tu non eges, sed etiam otij: quo nisi abundas, quo modo te speras ea, quæ in iure ciuili dispersa sunt, primum posse cogere, deinde coacta ita disponere, ut ex certis generibus totum ius ciuile cognoscatur? atque

atque ego tamen sic existimo: si quis est qui hoc præstare possit, aut eum te esse, aut neminem: sed quoniam res tuas ita ferre scribis, ut tibi in forum necessario sit eundem; quæ ratio, si modo & tibi, & populo placere uelis, multi temporis exercitationem desiderat; hæc autem quæ à te est iuris civilis instituta digestio, eiusmodi est, ut nihil operosius existimetur: uereor, ne, duarum rerum difficillimarum tractatione distractus, utrâque dū uis, neutram assequare. quamobrem, quid suscipias, tui consilij est: ego monendi. partes, quæ sunt prudentiæ, non assumo: neque enim plus ulla in re me existimo uidere, quàm tu uides: id, quod est beneuolentiæ meæ, faciam, ut magnopere te non solum horter, uerum etiam rogem, ualetudini tuæ minus, quàm gloriæ, ne seruias. quæ quidem nobis, qui te summe diligimus, tantæ curæ est, ut plurimas nostræ salutis partes in tua salute positas existimemus. De Alciati libro, ualde te amo, sed eum hoc tempore cur mittas non est. sunt quædam, quæ magis urgent. Quæ scis à nobis anno proximo superiore instituta, iam pene absoluiimus. Reliqua sunt in rebus nostris cuiusmodi fere uolumus. fratres ualent ut cum optime, ego sicut soleo, amamur à multis,

tis, colimur etiam à nonnullis; qui falsa de nobis opinione adducti, nostram consuetudinem, quasi docti hominis, uidentur expetere. quibus scilicet hunc errorem eripiam, cum ijs me patefecero. Vale.
XVII. cal. Non. Venetijs, M. D. XL.

* S. D.

SI nescis fortasse, quantum ego amorì nostro tribuam, cognosce ex hoc, quòd & superioribus mensibus, licere mihi per eum putavi ad tuas literas humanissime scriptas nihil respondere; & nunc etiam male respondeo. non est hoc, inquis, officium tolerare. quasi iam probaueris, quia non coluerim, ideo me turpem esse. non placet ita duris legibus amicitiam astringere, ut nunquam relaxentur. summam diligentiam maximis in rebus si ab amico requiris, iure facis: sed si etiam in minimis, non æquus es. est enim profecto quædam suauitas in negligentia: quam qui ex amicitia tollit, horridior est, quàm ut urbani mores ferre possint. quare si amabilis esse uis, (quanquam tu te uno amabilior es) & ueruntamen si id tibi propositum est, ut omnibus in rebus æque amabilis, æque iucundus sis: permitte

permitte mihi ut liceat aliquando tecum esse negli-
 genti. ego de tuis literis ita iudico, scriptas esse non
 solum eleganter, in quo tamen non minina laus
 est; sed etiam sapienter: quod quia solet ab ætate
 tua longius abesse, non solum laude, sed etiam ad-
 miratione dignum est. uitium hoc in plerisque ado-
 lescentibus, atque etiam in robustioribus quibus-
 dam fama celebratis animaduerto, ut inania colli-
 gant, & eloquentiam non, ut ueteres illi, in sen-
 tentiis & uerbis à communi consuetudine alienis,
 sed in quibusdam uulgaribus ac pene puerilibus
 ineptiis constituent. quare non ego te Luise hor-
 tabor, ut ex ista imperite scribentium turba te exi-
 mas: sed gratulabor potius, quòd ita effecisti, ut
 hortationi locum non relinqueres. hoc cum adole-
 scens adhuc, & pene imberbis, nondum ea pruden-
 tia, quæ extrinsecus assumitur, propter ætatem
 plane instructus, naturali quadam ingenij faculta-
 te, & assidua Ciceronis lectione sis consecutus:
 cum illa accesserint Aristotelica, in quibus nunc
 totus es; usumq; rerum, qui in adolescentem non
 cadit, percullueris; qualem te uirum futurum pu-
 lemus? nō sum natura blandus: neque soleo cuius-
 quam au-
 bus inservire: potius offendit quosdam
 libertas

libertas mea. quare, quod dicturus sum, gratia causa dictum ne putato. si quando accidit, ut interroger de ijs, qui antiquam illam perfecte scribendi laudem posse nobis uideantur iam pene amissam restituere: soleo te duobus præstantissimis adolescentibus, meis familiarissimis, Calino, & Amaltheo tertium inferere. Calinum puto non nosti: qui clarissimum iuuenem, Adorsium Cornelium, singularis uiri, Iacannis Cornelij filium, in Cyprium insulam secutus, tertium iam annum abest. sed mihi hoc uelim credas affirmanti: ea bona, quæ magister tuus Aristoteles laudabilia esse dicit, omnia fere in illo adolescente aut esse iam, aut breui, ut ego augaror, futura. de Amaltheo autem, quid sentiam, non expectas opinor ut significem, neque ut ego tibi eum quasi latentem indicem, quem in illustri quadam specula uirtus constituit. quare coniunge te cum his, & eloquentiam tres optimi adolescentes, ætate fere pares, concordi studio, sicuti pulcherrimam uirginem, diligite: quod si me etiam socium recipitis, & riualem in hoc amore fertis: erit præclara consensio, & latinæ lingue formam, quam, superioribus temporibus, ^{potius} barbarie uitiatam, nunc agnoscere uix possis, post-
hac

EPISTOLAE

hac, ut opinio mea fert, intactam, illibatamq; tue-
bimur. Vale. Venetijs, M. D. XLVII. III. cal. Ian.

* D. S.

VBI te audiui Episcopum esse creatum, leta-
tus sum non tam ob ipsam rem, quae sane est per ho-
norifica, propterea quod Episcopatus & sacerdo-
tium est, & maximum sacerdotium: quam quia de
te ipso cogitans, intelligebam te eum esse, cui ad
istam honestandam dignitatem facultas in optima
uoluntate non deesset. tibi erunt quae multis solent
esse laboriosa, uirtus & uigilantia, ex tua ueteri
& consuetudine facillima. non erim honorem quasi
legem bonitatis, ad quam te fingeres, accepisti, sed
ad honorem bonus accessisti, multis primum, ma-
gnisq; rebus Paulo III probatus, cui Pontifici? o-
mnium sapientissimo, & optime, qui & ipse Deo
probarus est, & non probat nisi sui similes: gratu-
lor igitur tibi, non ut gratulantur ij, qui fere, quibus
fructibus ausus sis, unum cogitant, caetera magno
percontantur: sed ut ij, quibus dignitas & re-
ligio, quae tu coles maxime & eris in
Christi uirtute antesignanus, gratiam per, quam Ep
sco

scopi sustinetis. uestrum est errantes animos in uia
reducere. et reducit is uos quidem præceptis diui-
næ doctrinæ tradendis: sed magna uis est in exem-
plo, cum ea, quæ traditis, ipsi uita & moribus ex-
primitis. quod tu præstabis utrunque omnium ma-
xime: qui & habes doctrinam, atque eloquentiam,
quarum altera imperitos erudias, altera languen-
tes excites; & uiuis, ut homo, satis extra culpam.
quod memini me multis ab hinc annis in tua pri-
ma adolescentia miratum, cum ea in te laudarem
quæ tamen imitari non poteram. quod fecisti ado-
lescens, cum tua te singularis, optimaq; natura ad
decus inuicaret, & quasi manu prehensum duce-
ret, nunc ætate confirmata, cum ad uoluntatem ac-
cesserit ratio, dubitem quin idem multo sis alacrius
constantiusq; facturus? dubitet qui te ignorat. mi-
hi, cui tua studia, tui sensus ex nostra familiaritate
notissimi sunt, dubitare non licet. quare ut ad pri-
ma redeam, non eo solum nomine tibi gratulor,
quod Episcopus es, in summa dignitate constitutus,
quod tibi scis esse commune cum multis; sed quod
is es, qui cum ista dignitate uirtutem æque pos-
sis. quod quia uides quàm non multi poterint, eo
magis tu, qui potes, hoc ipsum, quod es, acce-

R

ptum

EPISTOLAE

ptum Deo referre debes, tantumq; munus in te col-
latum, illud quidem plurimi facere, sed, quoniam
est proprij erga te amoris argumentum, muneris
causam multo, quàm ipsum munus, pluris æsti-
mare. Vale. Venerijs, cal. Maij,
M. D. XLVII.

I N D E X .

ANTONIUS THILESIVS

Andrea Franciscio c. 113.

Benedicto Rhamberto, charta 111: 114. 115.

BENEDICTVS ACCOLTVS

CARD. RAVENNAE

Paulo III. Pont. max. c. 53. 56:

Iacobo Sadoletto Card. c. 56.

BERNARDINVS MAFFEVS

Ludonico Castelnutro c. 96:

BENEDICTVS RHAMBERTVS

Philippo Gherio fratribusq; c. 58.

Paulo Manutio c. 59:

COSMVS GHERIVS EPISC. FAN.

Cardinali Contareno c. 65.

Cardinali Theatino c. 65:

Petro Carnesecio c. 67:

Giberto Episcopo Veronensi c. 69:

Bernardino Maffeo c. 69.

Paulo III. Pont. Max. 106.

Benedicto Rhamberto c. 108.

GEORGIVS SELVA

Petro Bembo 105.

IACOBVS SADOLETVS

Lazaro Bonamico c. 25. 34. 27. 36. 41.

Reginaldo Polo 38. 43:

Petro Bembo c. 47.

Card. Rauennae c. 54.

IANVS PARRHASIVS

Aldo Manutio 109.

IOVITA RAPICIVS

magistratibus ciuibusq; Brixianis c. 76: 78.

Io. Baptistae Rhamnusio c. 77:

Paulo Rhamnusio c. 79.

Hieronymo Montio c. 80.

IO. BAPTISTA EGNATIVS

Matthæo Aduocaro c. 97:

Romulo Amaseo c. 101.

IOAN. PETRVS CRASSVS

Friderico Valeresio c. 115:

Gaspari Contareno c. 118.

LAZARVS BONAMICVS

Mario Sauorniano & Benedicto Rham-
berto c. 2. 3.

Petr. Hosio Polonis c. 4.

Iace Sadoletto c. 5. 11. 12. 15.

Paulo Iannutio c. 5.

Mario Sauorniano	c.
Gasspari Contareno Cardinali	c. 8.
Principi Melphitano iuniori	c. 9.
Reginaldo Polo	c. 13.
Ioanni Turitiano	c. 15.
Instauratoribus Patauini Gymnasij	c. 16.
Raynutio Farnesio, Venetiarum Priori	c. 20.

NICOLAUS DRACO

Ioanni Baptista Egnatio	c. 110.
-------------------------	---------

PETRVS BEMBVVS

Ioanni Baptista Fideli	c. 47.
Cosmo Gherio	c. 49.
Hieronymo Nigro	c. 49.
Paulo III. Pont. max.	c. 50.
Iacobo Sadoletto	c. 52.

PETRVS BVNELLVS

Iosepho Magetano	c. 84.
Andrea Cornelio	c. 87.
Carolo *	c. 88.
Paulo Manutio	c. 90.

PETRVS DANESIVS

Iacobo Colino	7.
---------------	----

PAVLVS SADOLETVS

Lazaro Bonamico	c. 93.
-----------------	--------

EGINALDVS POLVS CARD.

Lazaro Bonamico c. 14.

Iacobo Sadoletto c. 20. 29.

Paulo Rhamnusio c. 84.

ROMVLVS AMASAEVS

Io. Baptista Egnatio c. 102.

SIMON VILLANOVANVS

Hieronymo Sauorniano c. 71.

STANISLAVS ORICHOVIVS

RVTHEVVS

Paulo Rhamnusio c. 81.

VBALDINVS BANDINELLVS

Petro Bembo c. 61.

VICTOR FAVSTVS

Marino Bezichemo c. 90:

Io. Baptista Rhamnusio c. 92.

Andreae Nangerio c. 123:


S E R I E S L I T E R A R V M .


A B C D E F G H I K L M N
P Q R .

Omnes quaterniones , præter R , duernionem .

V E N E T I I S , M . D . L V I .
A P V D P A V L V M M A N V T I V M ,
A L D I F .







2503



